

32034

182C10013

29 Avril 1867

*Petit Traité extrêmement
Rare et Curieux.*

Rés 32034

Baſtiment de R E C E P T E S,

Traduit d'Italien en François.

Item autre petit Traité de Receptes,
intitulé Le Plaiſant iardin

*Plus, la Medecine de Maiſtre
Grimache.*



A P A R I S,

*Par Jean Ruelle, à l'enſeigne ſainct
Nicolas, Rue S. Iaques.*

1 5 6 0.



Qu'importe de voir l'écriture se dév²
la même de une seule au
de une seule frotte la main
et la frotte la main de la
pour voir ce que le malade
peut sentir de frotte de vin
et la crasse de la main
paille — blanchir et la
malade avec de vin et la
frotte la main avec
la frotte que le frotte —



Table des choses contenues en ce present Liure.

*Ce qui est compris au premier receptaire, qui
est des diuerses vertus & proprietes, d'au-
cuns secretz.*



Remedie contre toute puanteur
& feteur de bouche, ou mau-
uaise alaine procedante de
corruptio en l'estomach, ou
autrement.

Page 1

Pour sauoir à qui il tiét que la cōception
ne se face, ou s'il tient à la femme, ou
s'il tient à l'homme, en cas que ils ayét
long temps esté mariez ensemble. 2

Pour auoir bōne memoire, soit à l'hom-
me ou à la femme. 2

Pour faire auoir bonne voix à chanter,
ou deuiser, ou disputer, ou lire en
chaire. 3

Pour faire poudre à blanchir les dents
qui purifie les catterres, & guarit le mal

T A B L E.

- desdites dents, & les conferme qu'elles
ne lochent point. 3
- Pour faire que les raisins frais cueillis, &
semblablement les pommes de grenades
& autres tels fruits, se garderont toute
l'annee sans pourriture. 4
- Pour faire vne poudre, laquelle mise sus
le papier, & frottee, ou essuice avec le
doigt. puis en escriuât sus ledit papier,
avec de l'eau simple, fait la lettre de-
uenir tres noire. 4
- Pour voir les estoilles à plein midy, ou à
quelle heure du iour qu'il te plaira. 5
- A cōgnoistre si vne personne est vierge,
soit male ou femelle, i'entens si elle est
corrompue ou de soy ou autrement. 5
- Pour faire bruler vn mouchoir, & apres
qu'il sera brulé, il n'y perra aucune-
ment; & demeurera encor entier sans
auoir eu aucun dommage. 6
- Pour sauoir de quelle grâdeur est le pied
d'un homme, ou d'une femme sans le
mesurer. 7
- Pour faire vne chandelle, laquelle mise
sus la table, bien tost apres s'estaindra,
& fera peur à la compagnie; & adonq
pourras faire sus ladite table ce que
voudras. 7
- Pour mettre vn œuf de geline dedés vne

fiote , ou bocal de verre , qui ayt le col estroit.	8
A garder que les cheueux d'une person- ne ne deniendront gris ou blancs.	8
Pour faire que vn drap qui auroit perdu sa teinture , retourne en son premier estat.	9
Pour laver l'escarlata & la desgresser.	9
Pour refreschir du sandal, qu'il semblera estre tout neuf.	9
A faire retourner en couleur tous draps de soye.	9
Pour la douleur des dents , à garder que iamais plus ne retourne.	10
A faire que le poil cherra soudainement en quelque lieu que tu voudras sus la personne.	10
A faire eaue pour endurcir tellement le fer qu'il taille & coupe vn autre fer, comme si cestoit bois.	11
Pour faire venir les cheueux & la bar- be.	11
Pour faire vn papier noir, sus lequel pour- ras escrire sans encre.	12
La maniere de faire appastis pour accueil- lir grãd nombre de pigeons en vn cou- lombier.	12
Eaue pour blanchir les dents.	13
A rassembler tout verre ou cristal s'opn	14

T A B L E.

Pour mollifier, faire consommer & rompre toute qualité de fer, quelque gros qu'il soit.	14
Pour faire vn chassís qui semblera de verre, & rendra plus grande clarté que le dit verre.	14
Pour bailler à vn vin la saueur de muscadeau.	15
Autre maniere.	15
Pour faire que vne grappe de raisin sera fresche, & aussi bonne à mengervers la saison de Noel, comme si on les venoit de cueillir en Septembre.	16
Pour faire savon, qui degresse & oste toute tache que ce soit.	16
A garder & conseruer roses en leur frescheur tous le long de l'année.	17
Pour oster toute tache de sus vn drap de couleur, ou bien tout blanc, tant de laine que de lin.	17
Pour oster vne tache sus escarlate, ou veloux de couleur, en sorte que la couleur ne s'en chagera ou corrópra point.	18
Pour oster tache d'huile de sus parchemin ou fin papier, ou papier escrit.	18
Pour oster tache d'huile ou gresse sus le papier.	19
Pour oster toutes taches d'encre respandues sus les liures.	16

Pour faire parchemin azuré, verd, ou violet, jaune, ou noir : sus lequel pourras escrire en lettre d'or, ou d'argent : mais la manière de poudroyer & accoustre lesdits métaux pour escrire, te sera monstrée apres ceste recepte. 19

Abroyer or fin, ou argent pour escrire avec plume, ou pinceau sus tel cas que tu voudras. 21

Pour escrire lettre d'or ou d'argent sus tout papier que ce soit. 22

Pour escrire lettre d'or, ou peindre en couleur qui semblera d'or toutesfois ne sera point vraiment or. 22

Pour escrire en lettre d'argét, ou peindre avec le pinceau, qui semblera vray argent, toutesfois ne sera point. 23

Pour escrire en papier ou toile, que riens n'y apparoiſtra, & chauffée l'escriture au feu, deuiendront les lettres noires. page 24

Pour escrire lettre qui n'apparoistra iamais sinon de nuict, ou bien de iour à l'obscur & lieu tenebreux. 24

Pour faire or artificiel, duquel tu pourras escrire. 24

Pour faire vne caue, laquelle mise dés vn verre ou fiole, rendra lueur de nuict. page 25

T A B L E.

Pour faire rosette tresbelle, de laquelle pourras escrire en quatre manieres, à sa noir couleur de rose, migraine, violet, & moree: desquelles cōfection ou cou- leurs, tu pourras encor teindre ce que tu voudras, soiét peaux de marroquin, ou autres telles choses.	25
Reigle generale, pour ceux qui ont les cheveux noirs.	27
Pour faire beaux les cheveux.	27
Pour faire croistre les cheveux, & deve- nir beaux.	28
Pour faire les cheveux noirs.	28
Pour oster le poil en quelque partie du corps que tu voudras, & iamais ne re- uiendra.	28
Pour le mesme, en vne autre sorte.	29
A faire noircir vne barbe blanche, & le semblable des cheveux.	29
Pour faire le visage beau au femmes. pa- ge	29
Pour faire vn rouge à teindre le visage aux femmes.	29
Pour faire belle face.	30
Autrement. & Autrement.	30
Pour faire partir les lentilles & rousseur du visage & embellir la peau.	31
Pour faire eau qui blanchisse la face.	31
Pour blanchir & embellir la face.	31

T A B L E.

Pour faire auoir les fleurs à vne femme qui les eust perdues, ou qui en fust des- reiglee.	32
Pour faire restraindre le cours neturel à vne femme qui l'eust trop abundant & oultre mesure.	32
Contre les lentilles du visage.	32
Cótre les rougnes grosses & espesses.	33
Contre les darts du visage, ou autre par- tie du corps.	33
Pour faire partir & en aller les cyrons.	34
Pour faire saouon odorant contre les ron- gnes.	34
Pour faire eue, qui chasse & face en aller toute tache & ordure des mains des ma- nouuriers: & rend lesdites mains fort blâches. Et est encor bonne ladite eue, pour vne personne qui auroit les mains & le visage cuits & brulez du Soleil.	35
Pour faire partir vn poreau.	35
Pour faire que les punaises ne te nuiront point la nuit.	35
Pour faire oignemét qui tue les punaises en la couche ou couchette.	36
Pour faire qu'il n'y ait nulles pucees en vne chambre.	36
Pour faire onguent qui tue les punaises, ou morpions.	36
Pour tuer les poux & lentes.	37

T A B L E.

Pour faire encre commun.	37
Autre façon, sans le feu, & avec eau de cistern.	37
Autre façon pour faire parfaitement bon encre.	38
Pour côroyer vne peau de cheurotin toute esêrue.	39
Pour donner couleur verte à vne peau conroyee, ou bien aux aiz de cartons, desquelz ont relié les liures.	39
Pour teindre peaux en autre maniere. page	40
Pour faire belle couleur iaune, sus peau, ou cartons.	40
Pour teindre fil en noir.	41
Pour teindre fil en gris.	41
Pour teindre du fil en couleur de terrac.	42
Pour faire que en vne ferme ou metairie que tu auras, en peu de temps viendra vne tresbelle haye viue, ou clos d'espinet.	42
Pour faire venir en vn iardin, ou heritage, grande quantité d'asperges.	43
Beau secret, pour voir bien cler la nuict, & sans corrompre la veüe, tant pour vieux, que ieunes : & soit pour esêrire, ou estudier, ou faire quelque ouvrage desliée comme taille & autres cas.	43

T A B L E.

Pour sauoir mollifier le cristal , en sorte que de plusieurs pieces , tu en pourras faire vne seule.	44
Pour faire que quand vn cheval ne peult vriner, incontinent vrinera.	44
Pour chasser les mouches de quelque lieu. page	44
Pour faire meiche, qui dure sans fin, en la lampe, & au feu.	44
Pour coler tout ce qu'il te plaira.	45
A ceux qui pissent la nuit souz eux en dormant.	45
Pour sauoir si le moust à eue dedens.	46
Pour faire vne colle qui ne se deffera ne au feu ne à l'eue.	46
Pour faire vernix excellent d'eue clere; duquel vseras avec le pinceau; & tost se seiche, & sent bõ, pour mettre sus le pa- pier, bois, tablettes, ou autre part.	46
Pour prendre tous oiseaux que voudras avec la main, sans autre instrument. pa- ge	47
Pour prendre les gelines ou pigeons, & tous autres oiseaux avec la main.	47
Pour faire paste qui face estourdir les poissons soudainement en l'eue.	48
Autrement.	49
Pour sauoir teindre , & colorer les crins & queues d'un cheval , comme tu vou-	

T A B L E.

dras.	49
Pour tenir les armures, ou bastons de Guerre nettement, qu'ils ne s'enroil- lent.	49
Pour faire feu incontinent.	50
Pour trouuer moyen de faire engrossir vne femme, qui ne peut auoir enfans de son mary.	50
Pour sauoir si la femme pourra cōceuoir, ou non.	51
Pour sauoir combien d'enfans doit auoir vne femme, en voyant son premier.	52
Pour sauoir cōbien d'enfans males pour- ra auoir vne femme.	52
Receptes pour faire choses à plaisir, & par ioyeuseté.	53
Pour faire que vn chien ou chēual se sem- blera estre tout verd.	53
Pour faire vn cierge ou flābeau de neige, que tu pourras allumer & faire ardoir.	53
Pour faire que vne chandelle puisse ar- doir souz l'eau.	54
Pour faire vne chandelle, qui ne s'estain- dra jamais au souffler.	54
Pour faire vn cierge de glace, qui brule- ra.	55
Pour faire saulter vn anneau par la mai- son, sans que nul le touche.	55
Pour sauoir cuire vn œuf sans feu.	56

T A B L E.

Pour faire que vne chair cuitte semblera encore estre crue.	56
Pour faire que vne chair cuitte semblera estre toute chargee de vers.	56
Pour faire sembler que en vne chambre y ayt plusieurs grappes de raisin.	56
Pour faire que quelcun ne puisse reposer la nuit.	57
Pour faire sembler, que en vne chambre y ayt vne chasse de bestes sauvages.	57
Pour faire venir le poil sus vn bras, ou au- tre partie du corps, qu'il te plaira.	57
Receptes de confitures.	58
Pour faire pompons confits.	58
Pour sauoir faire venir pompons sucrrins & doux en perfection.	60
Pour sauoir confire escorces d'Orenge, laquelle confiture se fait tout du long de l'annee, mais beaucoup mieux au moys de May, que lesdites escorces se- ront plus grosses & grandes.	60
Pour confire noix verdes.	62
Pour confire des courges.	63
Pour confire poires musquettes,	63
Pour confire merises.	64

Le second receptaire.

Pour accoustrer les roses, en sorte que mi-
ses en vn coffre plein de linge, ou veste-

T A B L E.

mens rendront odeur souveraine.	65
Pour parfumer les gants.	66
Parfum fin.	67
Pour faire savon rosat , à mettre en boe- tes.	68
Pour faire savon giroflat.	68
Paste d'ambre fine.	69
Oiselets de Cypre.	69
Pomade fine.	70
Huile odorante , qui fait les mains soup- ples,delicates,&restraint la peau.	70
Eaue odorante tresfine.	71
Saon pour les barbiers à peu de fraiz.	71
Parfuns odorans & bons.	71
Paste pour faire patenostres de scteurs.	72
Parfuns en poudre.	72

Le tiers receptaire.

Pour faire huile rosat , & autre huile me- dicinale,d'herbes,fleurs,& racines.	73
Pour faire saue d'herbes,fleurs,racines de toutes sortes.	74
Pour purifier le sang,qui est chose propre à la plus grãd'partie de toutes les mala- dies,mesmemet à la maladie de naples, & toutes rōgnēs lepreuses,qui pour on ctiō quelcōque ne se veulent partir.	76
Contre toutes gouttes de quelque sorte qu'elles soient , ou de la verole ou au-	

T A B L E.

tremement,	77
Remede tresbon quand tu iras en lieu suspect de peste.	77
Pour faire vne pomme d'odeur, qui serue contre la peste.	77
Remede notable pour mettre sus la peste.	78
Remede pour ayder vn malade, abandonné des medecins, pour auoir esté trop long temps à la diette.	78
Restaurant pour ledit malade.	79
Pour faire que vn qui sera à l'article de la mort, & ayt perdu la parole, puisse parler autant d'espace qu'il seroit besoing à disposer de son cas.	79
Eaue precieuse, cõtre rougeur, & mal des yeux & cataracte, ou suffision.	80
Pour faire vne huile tresprecieuse, qui fait r'affermir, & reprendre toute playe, grande & petite.	80
Medecine merueilleuse, laquelle guarit les gouttes, pour l'heure presente qu'elle est appliquee.	81
Contre la pierre.	82
Pour faire pisser la grauelle.	82
Pour sauoir si ton enfant ha des vers.	82
Contre le mal des vers, qui vient aux enfans.	82
Remede au mal deschinancie.	83

T A B L E.

Pour guarir soudainement l'escorcheure qui vient sus le mēbre, tant d'hommes, que de femmes, à raison de trop grande eschauffure.	83
Contre la fièvre quartē.	83
Pour faire partir incontinent, & en vn in- stant la douleur de la teste.	84
Pour faire reprendre & guarir playes, ou lours des iambes.	84
Contre la teigne.	84
Pour guarir les rubis qui viennent sus le visage. Autrement.	85
Pour estancher le sang d'une playe.	85
Contre la douleur des dents, & genciues enflēes.	85
Contre eschaubouillure, ou bien eschau- dure d'eau.	85
Contre eschaudure de feu.	86
Contre la toux & difficulté d'alaine.	86
Contre trenchees, expressions, & flux de ventre.	86
Pour guarir les broches.	86
Contre les escrouelles.	86
Pour faire bonne veüe, tant aux ieunes, que aux vieux.	87
Pour faire partir les cicatrices des playes, ou bien venues de nature.	87
Pour guarir les genciues pourries.	87
Pour guarir de iarceure, & mal du nez, pour	

T A B L E.

pour cause de quelque humeur nuisante.	88
Vnguet pour oster les lentilles, & saphirs de sus le nez.	88
Côte la surdit�, & douleur d'oreilles.	88
Pour tirer vn fer de vireton, ou fleche, ou vne espine sans aucun ferrement.	89
Pour faire eau merueilleuse, qui destruira le gros gosier qui vient c�tre nature, tant aux hommes que aux femmes.	89
Pour conseruer la sant�, le long de toute l'annee � la personne.	89
Pour faire descroitre , & en aller le gros gosier qui vient contre nature, tant aux hommes que aux femmes.	90

Pour le secret des femmes.

Pour congnoitre quand vne femme ha conceu enfant.	92
Pour congnoitre si la femme est grosse de filz, ou de fille.	93
Contre douleur de mammelles.	93
Autrement.	93
Pour faire auoir abondance de lait aux nourrices.	93
En autre maniere.	93
Autrement.	94
Pour auoir l'arriere fais des femmes nouvellement accouchees,	94

T A B L E.

Autrement, & Autrement.	94
Autrement & meilleur de tous, car il est approuvé.	94
Pour femme qui ne peut auoir ses fleurs.	95
Autrement.	95
Contre grand flux desdites choses, & au- trement.	95
Pour mondifier la matrice.	95
Autrement.	96
Pour femmes qui sont en trauail d'en- fant.	96
Pour deliurer d'enfant incontinent.	96
Autrement, & est chose approuuee.	96
Pour femme qui est longuement au tra- uail d'enfant.	97
Pour faire mellicrat, ou hidromel bon pour la femme qui travaille.	97
Pour auoir enfans.	97
Pour conforter la femme, quand l'enfant est mort dedens son ventre.	97
Pour restraindre femme qui est trop lu- xurieuse.	97
Pour femme qui vuide trop.	98

F I N D E L A T A B L E.

A V L E C T E V R

S A L V T,



Comme ainsi fust, bening Lecteur, que ces ans passez, non sans mon grãd travail & fatigue, i'eusse prins plaisir d'assembler & accumuler plusieurs sortes de receptes experimentees, lesquelles peussent enseigner grand nombre de beaux secretz, & lesdits secretz eusse monstrez & conferez avec aucuns de mes amis : iceux en fin m'ont prié, ou plustost contraint pour l'vtilité publique, de les faire Imprimer, & mettre en forme: à ce qu'ilz, & tous pareillement qui se delectent & prennent plaisir à semblables honnestetez, en peussent avoir la copie. Par ainsi voulant obeir à leur bon desir, me suis deliberé faire Imprimer mon dessusdit Receptaire, duquel à mon aduis vn chacun pourra recevoir grande vtilité & plaisir. Et sera iceluy traité, diuisé en trois petites parties.

En la premiere, seront escriptes plusieurs tres vtilles Receptes, desquelles on pourra avoir quelque esbat, & delectation, comme en lisant plus amplement se congnoitra.

En la seconde, verrez escripts grand nombre de beaux & nobles secretz touchant l'art, & composition de plusieurs odeurs suaves, & confortatiues.

Le tiers & dernier receptaire traittera d'aucuns secretz necessaires à la santé du corps humain, desquelz n'y ha si petit qu'il ne vaille bonnement vn thresor: car pour tout certain sans les beaux secretz de l'art medecinale, il ne faut aucunement douter, que nostre vie seroit beaucoup plus courte, & brieue. Pourtāt donques amy Lecteur, prens garde à viure, & t'entretenir en santé.



P R E M I E R

Receptaire, qui est des diuerſes
Vertus & proprietez
d'aucuns ſe-
cretz.

*Remede contre toute puanteur & ſeteur de
bouche, ou mauuiſe alaine proce-
dante de corruption en l'eſto-
mach, ou autrement.*

REXS poudre de Sauge vne
ouce, fleur de Romarin, trois
onces, clou de giroſle, cinq
dragmes canelle batue, vne
dragme & demie, noix Muſcade, demi
dragme, vn grain de Muſc, ou tant qu'il
te plaira : Puis prendras autant de Miel,
qui ſera neceſſaire à incorporer la com-
poſition ſuſdite, de laquelle vſcras, quand
bon te ſemblera, à la groſſeur, ou valeur
d'vne noiſette, plus ou moins à ta volun-
té. Telle compoſition eſt vtile & proufi-
table pour l'eſtomach, & rend vne alaine

plaisante & delicate: de sorte que qui prétroit encores de ladite composition en temps, ou lieu suspect de peste: l'odeur & alaine tressuaue d'icelle pourra garder la personne de mal auoir à cause de corruption d'air.

Pour sauoir à qui tient que la conception ne se face, ou s'il tient à la femme, ou s'il tient à l'homme: en cas qu'ils ayent long temps esté mariez ensemble.

Tu prendras deux escuelles, & en chacune d'icelles mettras du son de froment, ou seigle, ou orge, quel que ce soit: puis feras en l'une desdites pisser l'homme, & en l'autre la femme: & laisseras celà reposer trois iours ainsi: puis regarde dens les escuelles, & tu trouueras, que en celle qui est de la personne à qui tiét que la conceptiō ne se face, y aura des vers, & en l'autre nō: parquoy diras qu'il tient à celuy, ou celle de qui l'vrine ha engendré tels vers que le fruit ne se produise.

Pour auoir bonne memoire soit à l'homme, ou à la femme.

Prens le cœur d'une arondelle, & des fleurs de Romarin, Bourroche, buglose de chacun deux dragmes: puis prens canelle batue fine, Noix muscade, macis, poudre de clou de girofle, poiure long de chacun

demie dragme, musc fin, deux grains, sucre violat, sucre rosat, de chacun vne once, puluerise le tout subtilement & le cicotrine tresbien: puis melle ladite poudre, avec vne once de syrop rosat, & en faix elctuaire: duquel prendras tous les matins, tant que seroit la grosseur d'vn noisette, en continuant l'espace d'un mois, & cela te fera auoir memoire tresferme.

Pour faire auoir bonne voix à chanter, ou diminuer, ou disputer, ou lire en chaire.

Prends du cumin, de la semence de genecure, du poiure, du calament (qui est mente double, laquelle on trouue chez les apoticares) canelle, piretre (que lon nôme pied d'Alexandre) de chacun deux onces, miel tant qu'il en sera besoing: fais en cõposition, & en vse le matin, ton cas ira bien.

Pour faire poudre à blanchir les dents quõ purifie les catarres, Et guarit le mal desdites dents, & les conferme qu'elles ne lochèt.

Recipe les quatre parts de corail rouge, & piretre couppé bien menu, & seiché au feu sus la palette à peu de chaleur, tant q tout en fin se reduise en poudre tresdelice: puis prés vne part de mastic: & demie part de macis: & vn peu de sucre fin, le tout bié puluerisé, & melle ensemble, garde pour ton vſage, & t'en frotte les dents

quand il te plaira, ou te les fais frotter à vn qui voye en quelle par tu les auras plus or des, celà te les blanchira du tout. Semblablement aussi, quand la dent te fera mal, ou qu'elle te croillera, frotte la de ladite poudre, & en tiens quelque peu de tēps dēs la bouche, tu verras operation merueilleuse.

Pour faire que les raisins fraiz, cueilliz, & semblablement les pommes de grenades, & autres telz fruits, se garderont toute l'annee, sans pourriture.

Prends eae de Cisterne, & la mets en vn chauderon sus le feu, avec quelque peu de miel: & quand le tout commencera à bouillir, mets y dedens, & plōge les grappes de raisins, ou bien les pommes attachees à vne cordelette que tu tiendras à la main, & quand tu verras qu'elles commenceront à s'eschauffer vn petit, adonq tire les hors, & les poudroye de farine d'amidon, puis les attache au plancher: ou sans les poudroyer garde les freschement en la caue dens la dessusdite eae reposee, & tu auras fruit pour toute l'annee.

Pour faire vne poudre, laquelle mise sus le papier, & frottee, ou essuiee avec le doigt, puis en escrinant sus ledit papier avec de l'eae simple, fait la lettre deuenir tresnoire.

Recipe noix de galles , & coupperose Rommaine tant de l'vn que de l'autre , & vn peu de vernis à escrire : puluerise le tout bien delié , densvn mortier ou cicotrin : puis mets ladite poudre sus le papier , & l'essuie avec le doigt , incontinent si tu veux , escriis dessus avec eae clere , & subitemét tu verras que les lettres deuiendront tresnoires : tu peux porter de telle poudre par voyage en quelque lieu que tu iras pour en vser à ton besoing.

Pour voir les estoilles en plein midi, ou à telle heure du iour qu'il te plaira.

Pres vn bassin bien net, & l'emplis d'eae clere de fontaine, ou cisterne : ayes vn mirouer d'acier, & les mets audit bassin estât au droit du Soleil , tellement que les raiz frappent iustement sus l'eae qui est au dessus dudit mirouer , & tu verras leans clerement vne estoille, comme si elle estoit au ciel.

A cognoistre si vne personne est vierge, soit masle, ou femelle, d'entens si elle est corrompue, ou de soy, ou autrement.

Prens vn fillet, ou fisselle, & mesure la grosseur du col, ou gosier de la personne, & taille ce qui sera de surplus de ladite fisselle, ou fillet : apres ce, estens iceluy fillet selon la longueur depuis le sommet de

la teste, iusques au bout du menton de la personne de qui tu auras prins la mesure, & si tu vois que le fil ne puisse aduenir au méton, ou iusques à la barbe tel masse, ou femelle est vierge: mais s'il passe le méton il n'en est riens. Car sache que si tost que la personne est corrópue, le gozier s'engrossit, & la teste accourdist: & si tu le veux voir par experiéce, prés la mesure que j'ay dite sus ceux que tu sauras pour certain estre vraiment vierges, soiét masses ou femelles en l'aage de neuf à treize ans, car tu trouueras qu'elle ne passe point le méton: au cas pareil, prens la mesure sus vn que tu sauras n'estre point vierge, & tu trouueras que le filet passera oultre ledit mentó plus de deux doigts, tellement que ce que iete dy sera vray par experience.

Pour faire bruler vn mouchoir, & apres qu'il sera brulé, il n'y perra aucunement, & demourera encor en son entier, sans auoir eu aucun dommage.

Prens le mouchoir, & le baigne, & mouille tresbien en caue de vie: puis mets y le feu dedens avec vne chandelle allumee, & incontinent le verras ardoir depuis vn bout iusques à l'autre, tellement que apres que le feu aura couru par tout, ledit mouchoir demourera en son entier,

sans aucune rompure ou corruption.

*Si tu veux saviour de quelle grandeur est le
pied d'un homme, ou d'une femme sans
le mesurer, fais ce qui s'ensuit.*

Prends vn filet en double, & le mets ou attache au sommet du grand doigts de la main droite, ainsi en double, & le fais passer le long de la paulme de la main iusques à la jointure de ladite main, & tu trouueras que le pied de la personne sera aussi grád que la mesure que tu auras prise l'experience est facile.

*Pour faire vne chandelle laquelle mise sus la
table, bien tost apres s'estaindra, Et sera
peur à la compagnie, Et adonc pour-
ras faire sus ladite table ce
que tu voudras.*

Prends vn petit baston, de la longueur que voudras faire ta chandelle, & de la grosseur d'une plume de cigne, & à l'entour dudit baston, fais vn canon de papier, ou parchemin, lequel tu lieras par vn bout, puis empliras ledit canón de poudre à couleurine, peu battue, ou poudroyee: & puis lie ledit canon ainsi que on fait les saulciffes (car autant de plis, ou liures que tu feras, autant de bruit fera ledit canon sus la table) puis prends vn peu de meiche, & la mets dens ledit canon enuiron la largeur

deux doigts, pressant, & soullant avec vn poinçon ladite poudre dás le canó autour d'icelle meiche, puis tu couleras autour du baston cire blanche, ou iaune, ou suif, tant qu'il y ait forme de chandelle, & icelle seichee, & accoustree, mettras ardoir sus la table, & tu verras quand ce viendra à la poudre, le bruit qu'elle fera, & s'estaindra incontínét, adocq feras sus la table ce qu'il te plaira.

Pour mettre vn œuf de geline dens vne fiole, ou bocal de verre, qui ait le col estroit.

Prés vn œuf, & le fais cuire dur : & après qu'il sera cuit, mets le tremper dens le plus fort vinaigre que pourras trouuer, & le laisse là l'espace de quinze ou vingt iours, & tu verras que ledit œuf avec la coquille s'attédrira comme paste, de sorte que avec la main, tu feras si long, ou court que il te plaira: ainsi le feras doucement entrer dás la fiole: puis l'empliras d'caue fresche, & tu verras que ledit œuf retournera en s^{on} premier estat, en moins de quinze iours.

A garder que les cheueux d'une personne ne deuiendront gris ne blancs.

Prends du laiçt de chienne, & t'en oinds la teste, & les cheueux ne blanchiront iamais c'est chose approuuee.

Pour faire qu'vn drap qui auroit perdu sa teinture,retourne en son premier estat.

Prends chaulx viue deux onces, cédre de chesne vne once, eaue claire deux liures: mesle toutes ces choses ensemble, & les lais se là l'espace d'vn quart d'heure, & en laue le drap, cela le fait retourner en couleur.

Pour lauer l'escarlata, & la degresser.

Prends tartre blanc pilé quatre onces, fais les bouillir en deux liures d'eaue tant que la tierce partie soit diminuee: puis coule le tout, & passe par vn linge: & quád tu en voudras vsér, fais que l'eaue soit tie de, & laisse essuier l'escarlata, & incont inét apres tu la verras retourner en son pre mier estat.

Pour raffreschir du sandal, qui sem blera estre tout neuf.

Prends de l'eaue, & la fais quelque peu bouillir avecques du son: puis la laisse re poser quelque espace de temps, iusques à ce qu'elle commence à deuenir vn petit aigre: & d'icelle tiede laue le sandal, incó tinent se nettoiera.

A faire retourner en couleur tous draps de soye.

Prends vne once de chaulx viue, cédre de chesne once & demie, mets le tout en vn bassin plein d'eaue, & le mesle, puis appro

che le du feu, & laisse le tout esclarcir: puis baigne la tache de la dite eane avec vne esponge, & ne mouille point ailleurs, ton cas ira bien.

*Pour la douleur des dents, à garder
que iamais plus ne retourne.*

Prés vingt fueilles de lyerre, & les mets dedens vn petit-pot en bon vin vieil, & vn peu de sel cōmun: laisse le tout bouillir tāt que les fueilles soient bien cuittes: puis oste les du feu, & les laisse refroidir autāt que tu les puisse tenir en ta bouche, puis prens vne gorgée dudit vin moyennemēt chaud que tu le puisses endurer, & le tiens du costē que tu sentiras la douleur, & elle se partira incontinent.

*A faire que le poil cherra soudaine-
ment en quelque lieu que tu
voudras sus la personne.*

Prens chaulx viue freschement venue de la fornaisē huit parts: vne part d'orpin: melle tout ensēble, & en fais poudre biē cicotrinee, laquelle puis mettras en lessive bien forte, dans vn pot neuf bien plombē aupres du feu, & melle le tout tresbiē iusques à ce qu'il s'espoississe. Et si tu veux voir quād elle sera bonne, & parfaite, prés vne plume de canard: & la mets dēs lā mixture, si la plume se pelle ton cas va bien: si

elle ne se pelle, remets encor le pot au feu, iusques à tât que tu voye que ladite plume se pelle. Et quand tu voudras vser de ladicte cõpositiõ, va aux estuues, ou bié en lieu chault, ou baigne d'eau chaude la partie que tu voudras depiler, puis y mets de ceste susdite confection, & incontinent le poil se partira. Note bien quand tu sentiras la chaleur d'icelle estre vn peu vehemente, laue toy soudain d'eau chaude, à ce que le cuir ne se gaste, ou corrompe.

A faire eau, pour endurcir tellement le fer, qu'il taille, & coupe vn autre fer, comme si c'estoit bois.

Prens lumbriz, ou vers de terre telle quantité que bon te semblera, & les distille en la chapelle, & fais autant distiller de raves à part, & fais semblablement eau de racines de pommes: puis mesle lescdites eaux ensemble autant d'vn que d'autre: & apres ce destrampe ton couteau, ou espée, ou tel fer que voudras en icelle eau, & aura l'effect comme dessus. Et si tu le veux plus dur, ou plus aigre, trempe le par deux fois.

*Pour faire venir les cheueux,
& la barbe.*

Prens mouches à miel, en quantité, & les fais seicher en vn pannier pres du feu:

puis en fais poudre, laquelle destremperas avec huile d'olif: & de telle onction, frotte par plusieurs fois le lieu, ou voudras auoir poil: & tu verras merueilles.

*Pour faire vn papier noir, sus lequel
pourras escrire sans encre.*

Prends vne lampe ardente ou y ait assez bonne quantité d'huile, puis mets vne escuelle sus ladite lampe, & la laisse l'espace q toute l'huile soit consommee: prends la fumee qui sera accueillie en l'escuelle, & d'icelle brouille ton papier, & l'ennoircis: en apres taille ou coupe vne piece ou quartier dudit papier teint, & le mets sus vn autre papier blanc, ou le replie seulement sus le costé que tu auras laissé blanc au fucille: puis écris dessus avec la pointe d'un poinçon d'argent, ou picon (qui est vne fourchette dont les Italiens prennent leur manger) ou d'autre tel fer que tu voudras, sus ledit papier noircy, & tu verras que apres auoir leué la piece apposee, les lettres apparostrent noires sus le papier blanc de dessous: entens que le costé que tu auras replié ou apposé sus le papier blanc, soit le costé teint en noir, non pas l'autre.

*La maniere de faire appastiz, pour accueillir grand nombre de pigeons en
vn columbier.*

Prends autant qu'il te plaira d'une sorte de legume que les Italiens appellent sorgo ou melge (il croist plus hault que paniz ou cumin, & a la graine plus grosse & plus rouge) faiz le bouillir avec eue cõmune, & quand sera presque cuit, essuie le aucunement, & mets dedens vne quantite de miel, & de cumin, & le fais bouillir deux bouillons tousiours en remuant & mellar, pour les garder de bruler: puis le tout ainsi chaud mettra dans le columbier, & en barbouilleras les trous dudit lieu, à fin que les pigeons se y viennent frayer, tellement que encore se tu en peux frapper quelque uns d'iceux, brouille leur les cuisses & les pieds de ceste cõfection, à fin que la senteur d'icelle, leur en demeure par quelques iours: & cela fera que les autres pigeons qui sentiront telle odeur, suivront ledit pigeons brouillez iusques en leur nids, & ne s'en partiront iamais: qui est chose approuuee, & consonante à raison.

Eau pour blanchir les dents.

Prends sel nitre, alun de roche non calciné, autant d'un que d'autre: fais le teut distiller: & la premiere eue qui en sortira, sera clere: icelle gardera pour les dents car elle est bonne, & en useras, en les lavant d'icelle eue avec un peu de cotton.

À rassembler

A rassembler tout verre ou cristal rompu.

Prends la piece du verre qui sera rompu, & l'oints de vernix, destrempé avec blâc d'Espaigne, & huile de lin : & ainsi conjoins les deux parties rompues ensemble, & le laisse seicher, car il s'affermira.

Pour mollifier, faire cōsommer & rompre toute qualité de fer quelque gros qu'il soit.

Prends ce que les Italiens Alchimistes appellent totto magico maggior, ou laist camaroné (les vns le nomment en vne maniere, les autres en vne autre) deux onces, sublimé vne once, orpiment cinq onces, vinaigre blanc vne once: mets le tout ensemble: & de ceste compositiō si tu moules souuent le fer tu verras qu'il se consummera petit à petit, & ainsi tu auras ton intention.

Pour faire vn chassiꝝ qui semblera de verre.

& rendra plus grãde clarté que ledit verre.

Prends parchemin de velin, ou mouton, bien rasé & poli des deux costez, le plus delié & blanc que sera possible: mouille le, & l'estens & colle sus la croisee de ta fenestre. & le laisse ainsi seicher: apres ce, prends les deux parts d'huile de noix, ou de lin, & vne part d'eau clere, & vn peu de verre pillé: mets le tout bouillir dens vn verre, sus vn tuiileau près du feu: & quãd

il cessera de boullir, oste le du feu, car cest adonq' signe que l'eau est ia toute consommee: & si tost que ton huile sera attiedie, va t'en au soleil, & eubue ton chassís, & incontinent sera beau & reluisant, & s'il aduient que par espace de téps l'obscurcisse, prens vne esponge avec eau fresche, & le laue, par ainsi retournera en son premier estat: & si tu ne veux faire les despens du parchemin, prens du papier le plus beau, & le plus delié que pourras trouuer, & il te fera la mesme operation.

*Pour bailler à vn vin la saveur
de muscadeau.*

Prés fleur de raisin sauuage, ou de haye, quand le téps sera: fais en cueillir tât qu'il te plaira, & la seiche à l'óbre, & la garde en vn sachet: puis quád le vin nouveau se fera, tu mettras vn sachet desdites fleurs dés le muy que voudras faire sentir, & auoir saveur de muscadel, & pour certain le vin en prendra l'odeur & force. Le semblable pourras faire en vin vieil si tu veux.

Autre maniere.

Prens de la toute bonne, seiche, ou fresche cueillie: fais en plusieurs bouquets, & les lie l'un à l'autre avec vne fisselle: & mets le tout dens le vaisseau de vin, par le bondon, en sorte que te vin n'y touche

point : car il fault que le vaisseau ne soit point plein : & que ladite herbe soit pendue au dessus, & le bondon bien estoupé: cela fera que le vin prendra l'odeur & saveur de muscadet.

Pour faire que vne grappe de raisin sera fresche, & aussi bonne à manger vers la saison de Noel, comme si on la venoit cueillir en Septembre.

Prends autant de fioles, ou boccaux de verre q̃ tu voudras garder de raisins, puis quand la grappe du raisin commence à se former en la vigne, mets la dens la fiole, & lie ladite fiole au sep de la vigne, & la cœuure ou estoupe de sorte que l'eau ne puisse entrer à pourrir la grappe: laisse ainsi les grappes iusques à Noel, puis rôps les fioles, & tu auras fruit nouveau pour l'heure, bon & beau, à faire present à quelque amy, ou seigneur.

Pour faire savon qui desgreffe & oste toute tache que ce soit.

Prends alun de roche brulé vne liure, mets le en poudre : racines de flambes de florence puluerisees demie liure, vn œuf fraiz, deux liures & demie de sauo blanc: incorpore lescdites poudres avec l'œuf & le sauo, & en fais pelottes: & si tu vois que vn seul œuf ne suffise, prends en tant que il

te plaira, ou que tu verras estre de besoing à faire ta paste. Et quãd tu voudras essuier la tache, prens de l'eau commune, & en baigne ou laue ladite tache des deux costez du drap, & puis frotte avec la balotte ou pelotte susdite & drap sus drap : cela fait, essuie l'ordure avec eau fresche, en tordât le drap pour faire saillir la gresse : puis relaue ledit drap avec eau fresche, & il demourera net.

A garder & conseruer roses en leur frescheur tout le long de l'année.

Prens roses fresches cueillies : mets les en vn flacon de bois de chesne, tât qu'il soit plein desdictes roses, estouppe bien iceluy vaisseau que nulle eau y puisse entrer : puis lie le en eau courante, & tu esprouueras qu'elles se maintiendront fresches le long de l'année.

Pour ôter toute tache à vn drap de couleur, ou bien tout blanc tant de laine que de lin.

S'il estoit par fortune cheut vne goutte ou plusieurs d'encre, ou autre noirceur sus vn drap de couleur, ou blanc, fust de layne ou de lyn, fais ce qui s'ensuit. Prens lymons crus, ou grosses pommes d'oranges à dure escorse que les Italiens nomment pommes d'Adam, ou si tu veux prés seulement du iust aigre qui est dedens le

citrô, & le presse pour en faire saillir suc, duquel fault q tu frottes bié la tache, puis laisse essuier la place, puis aye de l'eau tiede, & laue ladicte tache & laisse de rechef essuier, & si apres la premiere fois ne te semblera bonnemét passée ou ostee, fais le dessusdit frottement pour la seconde fois, & le drap reuiendra au premier estat qu'il estoit deuant qu'il receust tache, ne pource en perdra aucunement sa couleur.

*Pour oster vne tache sus vne escarlata, ou ve-
loux de couleur, en sorte que la couleur ne s'en
changera ou corrompra point.*

Prends d'une herbe que les herbiars vulgaires appellét Saponaria, ou herbe à foulons: fais en iust, lequel mettras sus la tache, & le y lairras l'espace d'une heure si cest en esté, & si cest yuer l'espace de quatre heures: puis aye de l'eau tiede, & laue le drap par dessus au droit de la tache. S'il te semble qu'elle ne sen voise nettement, remets y encor du iust dessusdit: & si l'escarlata n'est point teinte en graine, mets moitié saumon noir & moitié iust de l'herbe susdite, & empaste sus: puis laue avec eau tiede, & la tache se partira, c'est chose esprouée & experimentée.

*Pour oster taches d'huile de sus parchemin
ou fin papier: ou bien papier escrit.*

Prés os de montó brulez, & en fais pou dre bié cicotrinee, & mets de celle poudre d'un coste & d'autre de la tache, avec vn ais de carton sus & souz en pressant bien fort, ou le mettât en presse par l'espace de deux iours, & tu trouueras quád tu l'osteras que toutel'huile sen sera partie, demourant le parchemin ou papier en son premier estat: c'est chose experimantee.

*Pour oster tache d'huile ou gresse
sus le papier.*

Prends cendre de serment ou bourgeons de vigne, & collats de febues seiches, & ladicte cendre mets sus la tache de ton liure, puis l'enfermeras bien serré dens vne presse: le laissant en cest estat vn iour & vne nuit, & se nettoyera.

*Pour oster toutes taches d'encre respan-
due sus les liures.*

Prends chalmagne (qui est pierre calamine d'Almaigne) sel commun, alun de roche, de chacun deux onces, sel ammoniac quatre onces: le tout fais distiller en chapelle, & de l'eau qui en istra, mouileras les places de ton liure, escriptes ou tachees d'encre, & tu verras les lettres ou taches sen partir incontinent.

*Pour faire parchemin azuré, verd ou violet,
jaune, ou noir, sus lequel pourras escrire en*

lettre d'or, ou d'argent : mais la maniere de pondroyer & accoustre lesdits metaux pour escrire te sera monstree apres ceste recepte.

Prens peau de cheurotin, parcheminee, bien deliet, & encor de rechef bien rasée de costé & d'autre: mets la tremper en eau ue clere, & laue la tresbié: puis la destords avec la main pour l'essuyer mieux: aye vn cerceau, de telle grandeur que ladite peau se puisse tirer dedens avec des cordes ainsi que font les parcheminiers: puis si tu la veux faire azuree, prens azur d'écre que lon vend chez les espiciers, & semblablement verd de gris, ou telle couleur que tu voudras faire sus ton parchemin, mets les dites couleurs tremper l'espace d'un Credo, puis avec vne esponge mouillee en icelle bailleras le lustre au parchemin tel que voudras, puis laisse le seicher, & encor vne autre fois retourne à la metre en couleur iusques à la troisieme fois, tant que la couleur te semble estre parfaite à ton plaisir: & apres qu'elle sera essuice, tu verras le parchemin tel que auras desiré, sus lequel pourras escrire en lettre d'or ou d'argent: & si tu veux faire le semblable en couleur noire, ou iaune, prens encre ou pierre noire, safran ou orpin, ou terre iaune, faisant à la maniere susdite.

A broyer or fin, ou argent, pour escrire avec plume, ou pinceau sus tel cas que tu voudras.

Prends autant de feuilles d'argent ou d'or batu qu'il te plaira : ayes vne grande coquille d'enlumineur, ou peintre bien polie par dedens, ou bien vne tasse de verre, qui ne soit ne fellee, ne rabboteuse: mouille la d'eau claire: & estens dedens autant de feuilles d'argent, ou d'or, que voudras l'vne sus l'autre, puis avec le grãd doigt de la main broye tout beau ledit or, petit à petit, iusques à ce qu'il soit bien deslié en ce mouillant par fois le doigt du quel tu broyeras: & ne prens point plus d'espace en broyant, que pourroit estre la largeur d'un grand teston ou brelinguet: & tousiours broye iusques à ce qu'il soit parfaitement desfait, & va poursuivant en cest estat, tant que tout ton or soit diminué, & destrépié, peu à peu. Cela fait, mets dans la tasse, ou coquille vn peu d'eau, en broyant tousiours, pour incorporer: apres empliras la tasse comble d'eau, & melle encore avec le doigt: & puis laisse reposer ladite eau l'espace de demy heur: coule & icette hors toute l'eau, & tu verras au fons de la tasse, ou coquille, cōme vn petit ciel d'or, tu le verras seicher, en le couurant tresbien, que poudre n'en-

tre leans. Et quand tu voudras escrire d'iceluy or, prens vn caniuet, ou petit couteau, & avec la pointe esgraine ou deffaits en tant qu'il te plaira, mets le dens vne autre petite coquille ou cornet, le desrompant avec eaue gommee, & en écris avec la plume ou pinceau sus le papier, ou parchemin susdits, & tu verras lettres bié belles & plaisantes, & si tu les veux apres brunir avec vne dent de loup sus la pierre, il n'y aura rien mal, car l'esécriture d'or par ce moyen en aura meilleur lustre.

Pour escrire lettre d'or, ou d'argent, sus tout papier que ce soit.

Prens fauilles de geneure, & en fais iust, puis ayes de la limaille d'or ou d'argent, & la mets dens ledit iust, laisse le ainsi reposer l'espace de trois iours entierement, & de cela pourras escrire parfaitement ce que voudras.

*Pour escrire lettre d'or, ou peindre en couleur qui semblera d'or, toutesfoi
ne sera point vrayement or.*

Prens rose que les Italiens appellent purpurine (c'est vne couleur qui se vend chez les espiciers) mets la dés vne escuelle & avec vn peu d'vrine, melle petit à petit avec le doigt de la main: puis emplis l'escuelle comble d'vrine, ou l'esuiue: laisse re-

poser : oste l'eau , puis broye bien fort avec le doigt, tant que la couleur vienne à estre bien deliée:réplis l'escuelle d'eau, laisse la reposer, puis la iette , & en ceste maniere laue ladite couleur tant de fois que à la fin l'eau reposée apparaisse clere, & à chacune fois que chageras d'eau, broye la couleur avec le doigt, à fin qu'il le soit en fin plus deliée, apres tu y mettras dedens vn peu de safran avec eau gommee, & de telle composition pourras escrire, ou faire champ de grosses lettres & cadeaux , ou peindre en quel lieu, ou façon qu'il te plaira, & semblera or de ducat broyé, & mis en couleur, qui est tres beau secret.

Pour escrire en lettre d'argent, ou peindre avec le pinceau, qui semblera vray argent, toutes fois ne sera point.

Prends estain de glace, premierement pile le dens vn mortier de fonte, puis broye comme on fait les couleurs, mets le dens vne saulciere, & le destrempe avec eau, puis le laisse reposer, & iette l'eau qui deuiendra noire, & ainsi laue par deux fois, puis prens ledit estain qui te restera au fons de la saulciere, destrempe l'eau gommee, & en escripts, ou peints champ de cadeaux & grosses lettres à ton plaisir, laisse seicher la

peinture, puis la polis avec la dêt de loup, ou pourcelette, & semblera fin argent.

Pour escrire en papier, ou toile. que riën n'y apparoistra, & chauffée la dite toile. ou papier au feu deviendront les lettres noires.

Prends iust de lymon, ou d'oignons, & en escripts sus toile ou papier, & quand tu voudras lire ce qui sera escrit, fais bié fort chauffer le papier, ou toile deuant le feu, & sera faite la lettre noire. Note qu'il faut bien chauffer ledit papier, car pour vn peu ne se noirciroit la lettre.

Pour escrire lettre qui n'apparoistra iamais sinon de nuict, ou bien de iour en lieu obscur & tenebreux.

Prends poudre de cristal, les ventres des vers qui volent & luisent de nuict, destrépe le tout avec glaïre d'œufz, escripts de telle mition, & laisse seicher, & tu verras luire la lettre de nuict, en sorte que pourras lire en tenebres.

A faire or artificiel duquel tu pourras escrire.

Prends deux dragmes d'estain doux, fonds les, & y mets sus vne once de vif argent, & melle cela bien fort, puis adioints y demie dragme de souffre vif puluerisé, & deux onces de sel ammoniac pillé, melle toutes ces drogues ensemble, & les

mets dès vn vrinal au feu sus vn pot plein de cédre bré criblée, & y fais feu autour par l'espace d'un iour entier: & quand le tout sera resfoidi, tu trouueras l'or artificiel, duq̃l pourras escrire: il ne le fault pas piler ne broyer, mais tu le dois mettre dès vn cornet, & le destremper avec glaïre d'œuf batue & coulee avec vne esponge.

Pour faire vn eue laquelle mise dens vn verre, ou fiole rendra lueur de nuict.

Prends quantité de vers qui volent, & lui sent la nuict en esté, mets les en vne fiole, ou boccal de verre: puis mettras le tout dès du siens par l'espace de quinze iours: fais distiller ce qui restera dens le boccal en alambic de verre: & que ce soit à petit de feu: ceste eue mise dens vn verre relira de nuict, en sorte que tu pourras lire & voir clairement à la lumiere d'icelle.

Pour faire rosette tresbelle: de laquelle pourras escrire en quatre manieres, à sauoir couleur de rose, migraine, violet & moree, desquelles confectiōs, ou couleurs tu pourras encore teindre ce que voudras, soient peaux de marroquin, ou autre telle chose.

Prends bois de brasil, & le fais cuire en eue clere telle quantité que tu voudras, iusques à la diminution de la tierce partie, & plus: & si tu veux esprouuer s'il ha

boulu assez, pré. du papier net, & le mets
dés. ledit brasíl, & si tu voís qu'il ayt bõne
couleur, le cas va bien, sinó, laisse-le enco-
re ainsi cõsommer iusques à ce que la cou-
leur te contente, c'esta sauoir que le papier
soit bié rouge : puis distribue l'eau de dudit
brasíl en quatre portions, selon les diuer-
ses couleurs, q̃ voudras faire. Et si tu veux
faire couleur de pourpre, ou fort rouge,
prés vne desdites portions, & n'y fais au-
tre chose. Pour vouloir faire couleur vio-
lette, mets y dedens quelque petit d'eau
de chaux, que ló dit calcinee (ceste eau se
fait en mettát vn peu de chaux viue estain-
dre dens assez bonne quántité d'eau, en la
laissant reposer iusques à ce que la chaux
voís au fond) de ceste eau mise avec la
secóde ptie de la susdite rosette feras cou-
leur violette: mais note qu'il fault q̃ l'eau
du brasíl ou rosette, soit tiede quand tu y
mettras l'eau susdite. En l'autre partie
mets y de la lessiue, & tu auras couleur
violette. En la quarte part, mets vn peu
d'alun de fente, que les Italiens appellent
lume diseza, & tu auras couleur moree.
Tu as dóq aprins à faire quatre couleurs,
avec lesquelles tu pourras escrire comme
d'encre : desquelles aussi pourras teindra
peaux en telles couleurs que voudras.

Item aussi par ceste mesme confection pourrôt les femmes donner couleur à leur fil de laine, qui est beau secret & vtile à qui en voudra vser.

*Reigle generale pour ceux qui ont
les cheveux noirs.*

Il fault noter, que ceux qui ont les cheveux noirs naturellement sont ords de la teste, & rendent assez d'ordure. Et pour la vouloir tenir nettement, fault qu'ilz se lavent avec du son lequel premierement fault que mettent en plusieurs eaves destremper iusques à ce que la derniere eave deuienne clere, à fin que toute la farine dudict son, soit hors: puis fault mettre ledit son dens vn chauderon bié net sus le feu, & bien le meller, en sorte qu'il ne puisse bruler: puis quand il sera chaud, fault que d'iceluy son, se face bien frotter la teste, en se peignant apres de plusieurs peignes, & la teste se nettoiera. Encore sans le son, tu pourras faire autrement en te peignant bien fort, & longuémét te frottant la teste avec gros linge, puis encore te peignant de rechef avec peignes de toutes sortes, puis oinds toy la teste d'huile de benioin, car elle noircist, & tient les cheveux noirs, & rend bonne odeur.

Pour faire beaux cheveux.

Prends les escailles de cinquante œufs ou enuiron, calcine les tresbien, & les fais distiller en chappelle, avec bon feu, & tu auras eae, de laquelle tu t'oindras au lieu auquel voudras oster le poil, & tu en veras grande experience.

Pour le mesme en vne autre sorte.

Prends fiente de chat qui soit seiche, & la puluerise bié deliée, puis detrempe icelle poudre avec vinaigre bien fort, & de telle confection laue le lieu dont voudras oster le poil, & il s'en yra, & iamais plus ne retournera.

A faire noircir vne barbe blanche, & le semblable des cheueux.

Prends fucilles de figuier, & les fais seicher, puis mets les en poudre, ayes huile de camomille, & la mesle avec ladite poudre, & de cela oinds t'en la barbe, elle noircira.

Pour faire le visage beau aux femmes.

Recipé semence de persil & d'ortie, almêdes de pesches, fais le tout bouillir ensemble, & de telle eae, ou purce laue t'en ou il te plaira.

Pour faire vn rouge à teindre le visage aux femmes.

Prends sandal rouge, pillé & brayé bien delié

delié, & ayes du vinaigre bien fort, qui soit distillé deux fois: puis mets ledit sandal, dens telle quantité dudit vinaigre, que bon te semblera: fais bouillir ensemble, & quand sera au feu, mets y vn petit d'alun de roche pillé, tu verras vn rouge tresparfait: si tu veux qu'il soit odorant mets y dedens vn peu de musc, cyuette, ambre gris, ou autre telle odeur, que tu aymeras le mieux.

Pour faire belle face.

Prends febues, pois communs, pois chiches, fais en poudre laquelle destremperas en eaue tiede, & glaïre d'œuf, & lait d'asnesse, puis la mettras ainsi seicher, & quand tu en voudras vser, deffais vn peu de ladite confection en vne eaue commune, de laquelle te laueras la face, & elle deviendra belle & claire.

Autrement.

Prends fleurs de febues fresches, & en fais eaue distillée en chapelle, de laquelle laue t'en la face, & elle deviendra belle & reluisante.

Autrement.

Prés fleurs de Romarin, & les fais bouillir en vin blanc duquel laue t'en le visage, ou bien (si tu veux) bois en, & cela te fera beau visage, & bonne alaine.

*Pour faire partir les lentilles & rouffeur
du visage & embellir la peau.*

Prends vn peu d'alun de roche, & le pil-
le bien menu, puis aye le blanc d'vn œuf
bien fraiz ponnu, & venant de la poulle,
mets les deux choses ensemble dens vn pot
bien plombé pres du feu, & le remue sans
ceffe avec vne buchette, & le laisse au pres
du feu, tant que tu voyes qu'il ayt leué vn
bouillon, car apres incontinent ladite cō-
fection s'endurcira: d'icelle tu te oindras
la face, ou la peau p l'espace de trois iours
& tu verras qu'elle deuiendra nette & po-
lie, c'est chose experimentee.

Pour faire eau qui blanchisse la face.

Prends litarge, argent sublimé pour
dixhuit deniers, ou deux soulz, mets les
dens vn bocal de verre, avec du plus fort
vinaigre q pourras trouuer, & fais bouil-
lir le tout iusques à ce que le goulet du
bocal soit vuide, puis laisse le reposer &
garde celà pour ton vser. Tu pourras aus-
si pareillemēt garder du lait avec suc d'o-
renges, & mesler celà avec huile de tartre,
& incorporer le tout ensemble pour en v-
ser comme dessus.

Pour blanchir & embellir la face.

Prends amer, ou fiel de lieure, & de coq,
& de geline, & d'anguille, destrampe le

tout avec du miel : & les mets en vn vaisseau d'airain bien estouppé. De ceste confection oinds t'en la face , & elle deuendra belle. Mais garde bien qu'il ne t'en entre rien dens les yeux, car celà te les pourroit gaster, & enflamber.

Pour faire auoir les fleurs à vne femme qui les eust perdues, ou qui en fust desreiglee.

Prends de l'espargoutte , & la fais bouillir en eue, puis coule la dite eue, & d'icelle faiz que la femme boiue par trois matinees , à chascune fois vn grand verre, cela luy fera venir le temps.

Pour faire restraindre le cours naturel à vne femme qui l'eust trop abondant, & outre mesure.

Prens encens pilé avec linardo , & noix de galle, & melle le tout avec bon vin vermeil, puis telle paste mettras sus le penil, & autour de la nature de la femme, celà desfeiche les fleurs. Encore l'aluine verde cuite en huile, peult beaucoup à ceste affaire: de la decoction tiede d'icelle herbe laue le ventre , & l'eschine de la femme , & en ce faisant le cours se restraint.

Contre les lentilles du visage.

Prends lezarde verde qui soit en vie, & la fais bouillir en huile , iusques à ce que

la tierce partie en soit diminuée: coule la-dite huile, & y adioints cire blanche pour faire oignement, duquel oinds toy la face souvent, & tu verras l'experience.

Contre les rangles grosses & espesses.

Prends beurre laué, trois onces: tormentine lauee trois onces: sel commun bien pillé, deux onces & demie: boliarmeni, ou terre sigillee, deux onces: les iaunes ou moyeux de cinq œufz: iult d'oréges, deux onces: du tout ensemble fais oignement duquel tu t'oïdras le soir de deux en deux iours, c'est adire vne fois sy, & l'autre non: iusques à tât que tu soyes guarý: & oinds toy principalemét les poignets des mains, le ply des bras, & les iarets: & apres que tu seras guarý, fais vn baing d'herbes odoriferantes, & te baigne tresbien. C'est chose parfaite, & tresbonne, éprouuée de plusieurs personnes.

Contre les dartres du visage, ou autre partie du corps.

Prends racines de oseille, ou patience (qui est oseille bien grande) & les laue tresbien, puis ratisse les, & les coupe par menues, & bien petites rouelles, lesquelles mettras tremper en fort vinaigre blanc l'espace de deux iours, & deux nuits: puis prendras des rouelles susdites, & d'i-

celles frotteras tresbien la dartre, ou esleueure du visage quatre fois le iour, & autant de nuict, & tousiours laisse le reste desdites rouelles en trempe des ledit vinaigre sans les oster, tant que tu n'en ayes plus que faire.

Pour faire partir, & en aller les cyrons.

Prends encens, sain doux, lard de porc masse, faiz le tout bouillir ensemble en vn pot bien plombé, & en faiz oignemēt duquel vseras & guariras.

Pour faire saun odorant cōtre les rongnes.

Prends lessiue bien forte, dens laquelle mettras vn peu de sel, & fais, que le tout soit dissoulz ensemble, prends puis vn peu d'eaue rose, & iust de limons, & autant de la susdite lessiue salee: mets y dedés du saun blanc cassé, & taillé bien menu, & vn peu de poudre de clo de girofle: laisse le tout reposer, tant que deuienne comme vne paste, laquelle remueras avec vn baston dens vn plat creux, puis mets le au Soleil, & le laisse là tant que ledit saun deuiēne dur, en sorte que tu en puisse faire & composer facilement pelottes de telle grosseur qu'il te plaira: apres que tu les auras faictes laisse les seicher: & d'icelle tu te laueras les mains tous les matins: & n'aye peur de rongnes puis apres, car tu es cer-

tain qu'il n'y entre rien dedens ceste cōposition qu'il te puisse nuire.

Pour faire eue qui chasse, & face en aller toute tache, & orduce des mains des manouvriers: & rend lesdites mains fort blanches: & est encore bōne ladite eue, pour vne personne qui auroit les mains & le visage cuits, & brulez du Soleil.

Prends iust de limós, dens le quel mettras vn peu de sel cōmun: avec ce, laue toy les mains, & les laisse essuier de par elles, puis laue te les derechef, & fais celà par plusieurs fois: & verras que ce iust te rōgera, & emportera toute tache des mains. Et est bōne encore ceste eue contre la rongue.

Pour faire partir vn poreau.

Prends lie d'huile d'olif, & alun succarin de chacū vne dragme, bray (q est pois de bateau) verd de gris dragme & demie, incorpore le tout ensēble, & en fais onguēt, duquel mettras sus le poreau apres l'auoir vn peu taillé ou couppé, & il s'en yra.

Pour faire que les punaises ne te nuiront point la nuit.

Prends herbe de fuchere, mets la sus la paille de ton lit, vers le cheuet, & autre part, & soye certain que toutes les punaises qui iront sus ladite herbe demourerōt prisonnières, tellement que plus ne s'es-

mouuerōt pour te donner empeschemēt.

*Pour faire oignement qui tue les punaises
en la couche, ou couchette.*

Prens vis argent , & le mets en vne escuelle avec vn peu de sauon noir : & du doigt de la main tu le mesleras, & deslayeras tant que le vis argent soit incorporé avec ledit sauō: apres mets y de lautre sauon tant qu'il te plaira , & comme dessus incorpore avec les autres drogues , puis oindras la couche, ou couchette de tel sauon , & soye sur que les punaises mourront , & feras ensemble estaindre leurs œufs que iamais plus nen reuiendront.

*Pour faire qu'il n'y aye nulles puces
en vne chambre.*

Prens argēt sublimé, & le mets en poudre , puis fais le bouillir en eauue dens vn pot, ou choderō l'espace d'vn quart d'heure. Et d'icelle eauue arrose ta chambre tous les iours par l'espace de quatre iours , & plus ne sentiras aucune puce par terre.

Pour faire onguent qui tue les punaises, ou morpions.

Prens sauon noir deux dragmes , soufre pilé vne dragme , aloes pilé demie dragme, vis argent destaint avec la salieue dragme & demie, fais en ongoement duquel oindras le lieu, ou sont les punaises.

ou morpions sus la personne, & tous mourront.

Pour tuer les poulx, & lentes.

Prens savon noir, once & demie: aloes pilé demie dragme: soufre vif aussi pilé vn scrupule: toutes ces choses mellees ensemble, reduis les en forme d'onguêt: duquel oinds le lieu ou sont les poulz, & tous mourront avec les lentes: c'est chose approuuee.

Pour faire encre commun.

Prens eaue de pluie qui chet des gouttieres, & feras dedés bouillir des noix de galle rompues par morceaux: laisse le tout bouillir vn peu: puis oste les galles, & mets dens ladite eaue de la gôme arabic, & couperose tant qu'il te plaira: laisse le encor bouillir, & puis esprouue si l'écrite sera assez noire, & quâd tu verras qu'elle te semblera assez bone, oste la du feu, & la coule par vn drapeau, & tié la de nuict à l'air, & de iour au Soleil: & la visite souuét, car selon qu'elle se diminuera, il faut que tu y mette de l'eau, & melle tresbien, & par ainsi ton encre durera long temps.

*Autre façon, sans le feu, & avec
eaue de cistern.*

Prens quatre liures d'eaue de cistern, dens laquelle mets quatre onces de galles

broyées grossièrement, comme grains de fèves: puis mettras aussi trois onces de gomme arabic, & quatre onces de couperose bien pilees, & puluerisees: laisse le tout reposer de nuit à l'air, & de iour au Soleil l'espace de dix iours, le mellât chacun iour si bon te semble: & si tu voyois, que tō cas deuint vn peu trop espes, mets y au surplus quelque petit de vinaigre, puis oste le du Soleil, & ton cas ira bien.

Autre façon pour faire parfaitement bonne encre.

Prends huit onces de vin blanc, vne once de galles rompues en trois, ou quatre pieces, lesquelles mettras tremper dens ledit vin blanc par l'espace d'vn iour & vne nuit, puis ostes les galles, & mets dens ledit vin once & demie de gōme arabic, vn quart d'once de couperose bien pilee & puluerisee, laisse le tout reposer au Soleil par plusieurs iours. Et si l'encre n'est assez noire à ton plaisir, mets y encor vn petit de couperose rommaine, & sera fait.

La perfection de la noix de galle, se cognois quand elle est menue, crespelue, & ferme, ou pleine dedens, non poudreuse.

La perfection de la couperose se congnis quand elle est de couleur celeste par dedens, & par dehors.

La bonté de la gomme arabic, se con-
gnois quand elle est clere, & s'esmie faci-
lement quand on la pile.

*Pour conroyer vne peau de che-
urotin toute escreue.*

Prens peau de cheurotin, & la mets en
eau tiede l'espace d'un iour entier, puis
destords la tresbien, & luy oste l'ordure,
& pour l'acheuer mets de l'eau sus le feu
dens laquelle iette vne poignée de sel, &
quatre onces d'alun de roche, & fais le
tout eschauffer iusques à ce qu'il cōmen-
ce à bouillir: puis oste ladite eau du feu,
& la laisse reposer tant qu'elle demeure
tiede: alors mettras dedens ladite eau vn
ceuf battu avec vn peu d'huile d'olif: ce-
la fait mets la peau de cheurotin dedens
icelle eau, & la remue bien avec la main
par trois ou quatre fois, & elle sera con-
royee.

*Pour donner couleur verde à vne peau
conroyee, ou bien aux aiz de cartons
desquelz, on relie les livres.*

Prens grains bourg espine, ou nerprun
lesquelz se cueillent au mois d'Aoust
quand ilz sont bien meurs, & biens noirs,
mets les dens vn boccal, ou grand pot bié
plombé, & les laisse là par dix iours, puis
mets y dedens quatre onces d'alun de ro-

che, & les laisse bouillir ensemble cōme si c'estoit du moust, & puis coule le par vn linge, & ce que tu auras coulé, mets le dés vne vessie de bœuf, ou pourceau, & la lie bien qu'elle ne prenne vent, & la mets vn peu au Soleil. Et quād tu voudras vser de la couleur pour teindre, mets vn peu de ladite teinture dens de la lessiue tiède, & le tout bien meslé mettras sus la peau, ou carton que tu voudras teindre, & d'icelle couleur encore tu peux escrire à plaisir.

*Pour teindre peaux en autre
maniere.*

Prends limaille d'arain, miel, & mesle ensemble, & l'incorpore avec de l'vrine, tāt qu'il prenne crote, ou couuerture, puis de ce, teints la peau, & la laisse seicher à l'ombre.

*Pour faire belle couleur iaune sur
peaux, ou cartons.*

Prends grains de nerprum meurs, seiche les au Soleil, & quand tu les voudras mettre en œuure, mets les tremper en lessiue avec vn peu d'alun de roche, & les laisse tant à la destrempe qu'ilz prennent couleur iaune, mais ladite lessiue veult estre vn peu tiède.



Receptes pour les femmes, quand elles aurót filé leur fil, de quelque sorte que ce soit, pour le teindre en diuerſes couleurs.

Pour teindre fil en noir.

Rens vne quantité de galles rompues & caſſées, laiſſe les bouillir en eaue dedens vn petit pot, & quâd aurent vn peu bouillu, oſte toute la galle, & y remets dedens le pot autant de coupperoſe rommain que tu auras oſté de galle, & avec ce vn peu de gomme arabic, puis donne encor vn bouillô : & mets apres ton fil dens le pot, & le laiſſe vn peu bouillir en ladite teinture, puis tire le, tu verras qu'il aura bonne couleur noire, & bon luſtre.

Pour teindre fil en gris.

Prends de la ſuſdite teinture noire, autant que voudras, & mets y dedés la moitié d'eaue, plus ou moins, ſelon que tu voudras ta couleur chargée, ou deſchar-

gee, & feras bouillir ton fil leans, tu auras du gris de telle façon que voudras, ou brun ou palle, ou de peau de soriz.

Pour teindre du fil en couleur de terrace.

Prends escorces de pommes de grenade & pelures d'orenges seiches, & fais bouillir avec vn peu d'alun de roche, la grosseur d'vne noisette, puis coule la teinture, & dens ce que sera coulé, fais bouillir ton fil, & tu verras la couleur.

Pour faire que en vne ferme ou metairie que tu auras, en peu de temps: viendra vne tresbelle haye vive ou cloz, despinés.

Prends boutons de ronces desglantier, despine, vinette, & d'aubespín sauage, & encor quelque boutons de roses de iardins pour aornement & honnesteté de ta haye, & iceux fault que tu face cueillir quád serót meurs, & les feras seicher: puis quand le temps est de semer, feras faire vn petit fossé autour du lieu que voudras enclore, & soit ledit fossé ou rayón large de deux paulmes, & creux d'vne paulme, & autour d'iceluy rayon, iras semát les susdits boutós, puis les feras couvrir de leur terre mesme, puis y feras mettre despinés seiches par dessus & autour, à fin que le bestial ne t'y face desplaisir: & selon que lesdites seméces croistront & aggrandi-

ront, tond les & les esbarbes ou esbranches à ta fantaisie, à fin que la haye en soit plus espoisse & egalie ou vnice, & tu la verras avec le temps belle, plus que peintre du monde ne sauroit contrefaire.

Pour faire venir en vn iardin ou heritage grande quantité d'asperges.

Prends grand nombre de cornes de belier, ou thoreaux & les enterre en ton iardin loing l'un de l'autre enuiron deux palmes, & apres qu'elles seront pourries en terre, te viendra au dessus grande quantité d'asperges.

Beau secret pour voir bien cler la nuit & sans corrompre la voie tant pour vieux que ieunes, soit pour escrire, ou estudier, ou faire quelque ouurage delié comme taille & autre cas.

Prends vne fiole de verre, ou cristall qui soit bien clere & delicee, grande & grosse comme vn pain bourgeois, icelle emplis d'eau de cisterne distillee en chapelle, car elle en est bien plus clere: puis quand tu voudras besongner la nuit, mets la lāpe, ou chādelle au derriere, vers le milieu de ladite fiole, & tu verras vne tresgrande lueur deuāt tes yeux, laquelle te fera voir si clere qu'il n'y aura si petite chose, que tu n'apperçoieue.

*Pour ſavoir mollifier le criſtal en ſorte
que de plufieurs pieces tu en pour-
ras faire vne ſeule.*

Préns du plomb brulé, & du criſtal au-
tant d'un que d'autre, & broye ſus le mar-
bre, en les meſlant bien enſemble, puis les
mettras dens vn creuſet, & les feras fon-
dre: puis iette en telle forme que tu vou-
dras, par ce meſme moyen pourras faire
d'autres choſes ſemblables comme verre
& pareilles beſongnes.

*Pour faire que quand vn cheual ne peut
vriner, incontinent vrinera.*

Prens de l'eau clere & la fais attiedir
ſus le feu, donne la à boire au cheual, &
incontinent il piſſera.

Pour chaffer les mouches de quelque lieu.

Prens vn rameau d'arbre fraiz cueilli,
ou bien vn drap de linge blanc & l'oinds
de iuſt de pimpenelle, ou d'orpiment
royal, tu verras que toutes les mouches
du lieu auquel mettras ledit linge ou ra-
meau ſe iront aſſeoir deſſus, & autât qu'il
y en ira, autant en mourra, & change le
rameau de ſix iours en ſix iours.

*Pour faire meſche qui durera ſans fin
en la lampe, & au feu.*

Prensalun de plume en grand pieces
ou morceaux, puis le taille menu en for-

me de meiche & la mets dens la lampe en l'huile, & tu verras que iamais ne se consummera.

Pour coller tout ce qu'il te plaira.

Prends peaux d'anguilles seiches non salées, & les laisse tremper en eau l'espace de deux iours & deux nuits, puis pile les ou les bats tresbien avec vn baston, fais les bouillir en telle quantité d'eau que à peine soyent toutes couuertes, & fais feu bien moderé, tant que elles se cuisent, & mesle tousiours quelque peu en destrem-pant, puis coule ce qui restera de l'eau, & le mets en vn vaisseau de metal, & le laisse seicher à l'ombre, tant que la colle devienne dure, & d'icelle colle tu pourras coller ce que voudras.

*A ceux qui pissent la nuit souz
eux en dormant.*

Prends semence d'ortie tât que seroient deux cueillerees, fais en poudre, puis prés encor du mastie autât que seroyent deux grosses febues, & fais en poudre bien delice: puis prens de la paste gros comme le poing, & incorpore ou pestriz lesdites poudres dens ladite paste: & en feras vn tourteau bien delié & tenue, leql mettras cuire au four, & quand sera cuit, fais en trois parties, lesquelles tu feras prédre au
person-

personnage par trois iours au matin, & les trois pieces mangée, fais encor de rechef vne tourte cōme dessus, & ainsi continue iusques à quinze iours tu en vertas l'experience.

Pour sauoir si le moust ha de l'eau dedens.

Prends vne poire & la mets dens ledit moust, & si tu vois que la poire puisse aller iusques au fond de la cuue, croy qu'il n'y ha point d'eau, mais s'elle nage au dessus, croy qu'il y ha de l'eau, le sembla ble peux esprouuer avec vn œuf.

Pour faire vne colle qui ne se deffera ne au feu ne à l'eau.

Prends chaulxviue mise en poudre & destrāpee avec huile de lin, de telle cōfectiō feras vne colle, de laquelle quād tu auras collé quelque chose mets la seicher à l'ōbre, & puis approche la du feu, & tu verras qu'il durera autant que si c'estoit fer.

Pour faire vn vernix excellent d'eau clere duquel vseras avec le pinceau, & incontinent se seiche, & est odoriferant, pour mettre sus papier, bois, tablettes, ou autre part.

Premierement tu prendras cinq onces d'eau de vie, & vne once de beuioin pillé entre deux papiers ou carton, ou bien en vn mortier, mais qu'il ne soit pas si me-

nu, puis près vne fiole de verre moyenne-
ment grosse, & y mets dedés la moitié de
ladite eue, à sauoir deux onces & de-
mi: apres mets y ledit benioin ainsi gros-
sement pilé & meslé à proufit avec ladite
eau: laisse le reposer l'espace d'un iour &
demi: puis près ladite eue & la mets de-
dens vne autre fiole, & l'estouppe tresbié,
& sus le reste du benioin qui demeurera
au fond de la premiere fiole mets y le res-
te de l'eau susdite & fais comme deuât,
tu verras le cas bien aller: mais la premie-
re eue est meilleure que la seconde: par-
quoy d'icelle premiere eue tu te pourras
ayder en choses plus nobles.

*Pour prendre tous oiseaux que voudras
avec la main sans autre instrument.*

Prends fiel de boeuf vieil, avec elleboré
blanc, puis ayes millet ou autre grain: &
le fais bouillir vn peu avec les choses sus-
dites: & de telle pasture donneras à man-
ger aux oiseaux que voudras prendre,
croy que incontinent qu'il auront man-
gé d'icelle pasture, cherront à terre en
sorte qu'ilz sembleront morts l'espace de
demi heure, & ainsi les pourras prendre
avec la main.

*Pour prendre les gelines ou pigeons &
tous autres oiseaux avec la main.*

Prends lie de vin, iust de segue, destrempe les ensemble, puis laisse tremper, avec froment, ou bien quelque autre grain, & laisse lesdites choses ainsi reposer l'espace d'une nuit, puis mets le froment (ou graine que auras mis tremper) en la court ou seront les oiseaux que voudras prendre, & tu verras qu'apres qu'ilz auront becqueté de ladite graine pour manger, cherront comme morts, & alors tu les pourras prendre.

Pour faire paste qui face estourdir les poissons soudainement en l'eau.

Prends coque de leuant, & selon la grosseur de chacune coque poudroyee prens autant de fromage gratté, & deux fois autât de farine, & mesle toutes ces choses ensemble & en fais paste, de laquelle prendras aucuns petis morceaux ou grans selon les poissons que voudras prendre : iette lesdits morceaux ou tu scez qu'il y ha du poisson, & tu verras que tous les poissons qui en mangeront deuiendront estourdis, & viendront la pance amont sus l'eau comme morts. Mais note, que si tu les laisse ainsi l'espace d'un quart d'heure à la fin digereront cestè paste & retourneront au premier estat. Saches aussi que la paste doit estre fresche faite.

Autrement.

Prends du fouliz & le taille bien menu, puis iette le dedens l'eau, au lieu ou tu pouseras que les poissons frequentent le plus, & tu verras que tous monteront sus l'eau, cōme esuanouis. Alors les pourras prendre facilement de la main. Car sache que les poissons ayment bien ceste herbe.
Pour s'auoir teindre & colorer les crins & queues d'un cheval comme tu voudras.

Prends vn petit pot & le mets au feu avec de l'eau, fais le chauffer iusque à ce quelle soit tiède: puis mets y dedens de la garence broyé ou du brasil, lequel que tu voudras, puis prés du tartre (qu'il est lie de vin seiche qui tient aux muys) & mouille les crains du cheval, puis ébroille les avec ledit tartre poudroyé, & le laisse ainsi toute vne nuit: puis mets la bouillir avec la couleur susdite iusque à tāt qu'il ait prins teinture telle que bonne te semblera.

Pour tenir les armures ou bastons de guerre nettement qu'ilz ne s'enroillent.

Prés plomb & le lime bien menu, mets le en vn vaisseau avec autant d'huile d'olive qui suffise à le couvrir: laisse le ainsi l'espace de neuf iours, puis de telle huile frote les armures ou espee & bastons de guerre, tu verras de quoy.

Pour faire feu incontinent.

Prends vne once de pierre calaminaire, trois liures de chaux viue, trois onces de poix noire, melle les avec ladite chaux, mets le tout dens vn pot, lequel soit bien lutté tout autour, & bien bouché avec le couuercle, en sorte que l'air n'y puisse entrer dedens, & mets ainsi le pot dens vne fournaise à plastre ou autre, & quand le plastre sera cuit, tire hors le pot. Et saches que la paste de laquelle tu luteras ou boucheras ton pot, doit estre faite avec de la croye ou fiéte d'asne: cela fait comme dessus, tire hors ta calamine, puis la mets tremper en huile de laurier l'espace de quinze iours, & quand tu voudras vser de ladite pierre pour auoir feu, mouille la de ta salive, & tu verras qu'elle fera feu tel que d'iceluy pourras allumer ta chandelle. Et quand tu voudras amortir ledit feu, torche la pierre avec la mesme humidité, & tu verras comment s'estaindra. Mais garde toy bien de la tenir en lieu moite, car il le fault tenir en lieu sec, & cela est vn tresbon secret.

Pour trouuer moyen de faire engrossir vne femme qui ne peut auoir enfans de son mary.

Prends citrons secs & en fais farine, laquelle puis mesleras avec miel & iust

d'absynthe ou aluine, & quād le tout sera bien mēlé, fais en pillules, & alors que les mois cesserōt à la femme, fais que ladite femme prenne vne desdites pillules & l'enveloppe dēs vn peu de sandal, lequel soit lié d'vn fil long: icelle pillule mettra ladite femme dens sa nature quād elle ira dormir & laissera leans iusques à mynuit, ou plus s'elle peult, & cela face l'espace de trois nuits: mais ait plusieurs drapeaux appareillez pour l'essuier: car elle doit estre certaine qu'il sortira grande corruption. Cela fait, repose la dame & s'abstiēne par trois iours, & au temps dudit repos se face vn baing d'herbes odorantes & propices à son cas, & apres qu'elle sera sortie dudit baing, aye de la cōfection qui s'ensuit cy apres, & la mette en vn œuf frais, & la hume au retour du baing: cela fait boiue vn verre de bon vin, puis se mette au liēt bien & chaudemēt, & ait bonne compagnie de son mary, pour certain elle engrossira. La cōfection qu'il fault prēdre avec l'œuf est, citrō & melisse, autāt d'vn que d'autre bien puluerisēz: adioustez y vn peu de muguette, & vsez de cela avec l'œuf c'est la cōfection susdite.

Pour sauoir si la femme pourra cōcevoir, ou nō.

Prends mauue sauuage ou guymauue &

fais que la femme pisse dessus par trois iours chacun iour vne fois. Si tu vois que ladite mauue meure, dy q̃ la femme ne peult auoir enfans: si la mauue demeure viue & entiere sans estre corrompue, pour certain la femme peult auoir enfans.

Pour vouloir sauoir combien d'enfans doit auoir vne femme, en voyant son premier.

Fais en la maniere qui s'ensuit: Quand la creature premiere produite de la femme sera venue sus terre: si tost que la sage femme ou matrone l'aura receu, regarde combien de neuds tu verras au boyau qui luy pend au nôbril par lequel estoit conioint & attaché à la matrice, & dis: que autât de neuds que tu verras audit boyau, autant d'enfans aura la femme, en faisant les cœures. Et si tu vois qu'il n'y ait aucun neud, dy qu'elle n'en aura plus, & qu'il tiendra à elle non pas à l'homme. Et saches que à chacune fois que la femme enfâte, se perd vn neud du boyau susdit.

Pour sauoir combien d'enfans masles pourra auoir vne femme.

Prés garde au premier enfant masle que la fême enfâtera, & autât de petis cercles ou chappelets de cheueux, ou bié la place & trace d'iceux q̃ aura l'enfant sus la teste, autât de masses pourra porter ladite fême.



Receptes pour faire choses à plaisir,& par ioyeuseté.



Yant cy dessus escrit plusieurs
receptes de diuerses vertus,
lesquelles sont pour te dōner
grande vtilité: maintenāt par
maniere de passetemps (Lecteur discret)
ie te vueil escrire autres petites choses plai
santes, desquelles pourras prendre plaisir
& recreation.

*Pour faire que vn chien ou cheual te
semblera estre tout verd.*

Prens deux liures de cappres,& les pul
uerise, puis mets distiller en alembic: mais
note que la premiere eau n'en vault riē,
& fault que tu la face distiller de rechef,
& sera bonne. De telle eau mouille le
cheual ou le chien:& ilz sembleront estre
verts à ceux qui les regarderont.

*Pour faire vn cierge ou flambeau de
neige que tu pourras allumer
& faire ardoir.*

Prends cotton filé , ou meiche de cotton à plusieurs filz , de telle longueur qu'il te plaira , & mouille la meiche par plusieurs fois en gomme bien chaude & deffaite, & quand icelle meiche sera seiche, prends de la neige, & en mets à l'entour autant que tu voudras faire groston cierge : & quâd il sera fait , laisse le reposer la nuit au serain : & de iour mets le en lieu frais auquel le Soleil ne batte aucunément , & quâd tu voudras, allume le tu verras qu'il ardra . Cela fault que tu faces au téps des grandes gelees.

*Pour faire que vne chandelle puisse
ardoir souz l'eau.*

Prends demie liure de cire , deux onces de soufre , & autant de chaulx viue , vn once de tormentine devenise. Incorpore toutes ces choses ensemble, & en fais vne chandelle, & l'alume, tu verras qu'elle ardra aussi bien dens l'eau, côme dehors.

*Pour faire vne chandelle qui ne s'estain-
dra iamais au souffler.*

Prends vne chandelle ou vne meiche de chanure, & du soufrevif en poudre, & enveloppe tresbié ladite meiche dens icelle poudre, & ayes vn morceau de linge delié, lequel éuolppe autour de la meiche, puis couure le tout de cyre, & en fais for-

me de chandelle, allume la, tu verras que pour souffler ne s'estaindra iamais.

*Pour faire vn cierge de glace
qui brulera.*

Prends vne chandelle de cire, & attache la par la meiche en temps de grande froideure, avec de la fisselle, au lieu auquel coule & descéd l'eau de la neige qui chet des gouttieres, ou bien en quelque autre lieu semblable: en sorte que les gouttes de ladite neige fondue descendét sus la chandelle, & signamment sus la meiche, & tu verras que se fera vne couuerture de glace sus ladite chandelle, de telle grosseur ou espaisseur que tu voudras: mets ladite chandelle deus vn chandelier sus la table & l'allume par la meiche. Car quoy qu'elle soit engelce, la chaleur la deffera peu à peu, & ainsi ardra, dont seront esmerueillez les assistans.

Pour faire saulter vn anneau par la maison sans que nul le touche.

Fais faire vn anneau de leton, qui soit creux, mets dedés iceluy anneau sel nitre, soufrevif, vis argét, autant d'un que d'autre: estouppe le pertuis par lequel auras mis ces choses, si bié que riens n'en saille hors, mets ledit anneau aupres du feu, à lastre, tu verras que si tost que ledit an-

neau sentira la chaleur, incontinent commencera à sauteler par la chambre sans que nul y touche.

Pour sauoir cuire vn œuf sans feu.

Prends chaulx vive, & enterre leans l'œuf que tu voudras faire cuire, tu verras l'experience.

Pour faire que vne chair cuite semblera encor estre crue.

Prends sang de lieure ou de pourceau, cuits le, puis le fais seicher & en fais poudre, & quand la chair sera cuite mets vn peu de ceste poudre dessus, & laisse la reposer, la chair te semblera encor crue.

Pour faire que vne chair cuite, semblera estre toute chargée de vers.

Prends cordes de luc, & les trenche bien menu en façon de petis vers, & quand la chair sera au plat encores toute chaude, mets de cesdites cordes coupees dessus, puis couure ladite chair d'vn autre plat, incontinuent que les cordes seront estouffees, & sentiront la chaleur se viendront à mollifier, & s'estreciront & retireront en sorte qu'il seblera q'ce soient vers en vie.

Pour faire sembler que en vne chambre y ayt plusieurs grappes de raisins.

Prends vn bocal de verre, & l'emplis d'huile quand la vigne sera en fleur, lie

ledit boccal ou fiole au sep de la vigne, & prens vne grappe fleurie, & la mets dens icelle fiole, estouppe la bien en sorte que rien n'y puisse entrer dedens: laisse la iusques à tant que le raisin soit meur. Tu prendras de ladite huile, & la feras bruler avec de la meiche en vne chambre où n'y ayt autre lumiere, elle te semblera toute plaine de grappes de raisin.

*Pour faire que quelqu'un ne puisse
reposer la nuit.*

Prés alun de plume broyé, & en frotte la chemise ou bié les draps de sô liét, ou luy mets désle dos qu'il ne s'en apperçoiue: il ne sera iamais possible q'l repose la nuit, s'il ne change de chemise ou de draps.

*Pour faire sembler que en vne chambre y
ayt vne chasse de bestes sauvages.*

Prends deux testes de lieure, & la teste d'un chien, & les mets dens vn pot plombé, pour seicher au four, & quant seront bien seiches, fait en poudre, laquelle fault que tu melles avec vn peu de safran & soufre vis, en y adioustant autant de cire que sera besoing, fais bruler ladite composition dens vne chambre où n'y ayt autre lumiere: tu verras merueilles.

*Pour faire venir le poil sur vn bras ou autre
partie du corps qu'il te plaira.*

Prends mouches à miel , & les fais bruler
dés vn tetz de pot, & les mets en poudre,
laquelle mesleras avec huile commun , de
telle onction pourras mettre ou tu vou-
dras, & le poil y viendra : mais garde toy
d'en mettre autre part : car le poil y vien-
droit aussi bien, & fault continuer ladite
onction par plusieurs fois.



Receptes de confitures.



Pres t'auoir escrit en ce pre-
mier receptaire , bening Le-
cteur, choses diuerſes, dont les
aucunes ſont bien vtils, les au-
tres à plaſir deſq̃lles la meilleure partie a
eſté par moy experimétée, le reſte ie te les
laiſſe eſprouuer : Maintenant me ſemble
hôneste pour encor mieux te ſatisfaire &
delecter q̃ ie te mette & propoſe cy apres
aucunes autres Receptes de cōfitures , qui
eſt choſe honneſte & bonne à gens meſ-
nagers, tant pour ſubuenir à ſoy comme à
autrui: car n'y ha choſe qui plus conforte
l'eſtomach debilité que la confiture.

Pour faire pompons confits.

Prends pompons en telle quantité qu'il te faudra, & les prens vn peu verds & mal meurs, mais fais qu'ilz soient bons : & d'iceux taille tant de cartiers qu'il y ha de rayons au pompon, & les escorce tresbien avec le couteau, puis mets les tremper en bon vinaigre l'espace de dix iours : puis chage les de vinaigre & les laisse encor reposer autre dix iours, mais fault que tu les melles chacun iour, puis tire les hors & les mets dens vne grosse seruiette, & les nettoye tresbien en essuiant, puis mets les l'espace d'vn iour & vne nuit à l'air. Celà fait, les mettras bouillir en miel, & ainsi chacun iour baille leur vn bouillon iusques à dix iours, mais ne les tire iamais hors dudit miel, & ne les laisse bouillir chacū iour que bien peu, car il suffit qu'il ayent vn petit bouillon. Apres fault que tu prenes les trenchés susdites, & que tu les mettes en tel vaisseau qu'il te plaira : auquel vaisseau fault que tu mettes ensemble les espiceries cy dessus escriites.

Recipe poudre de clou, gingembre, muquette, ciuamome, autant d'vn que d'autre : melle les ensemble, & apres vne rengee des trenchés de pompon susdits mets vn liét desdictes poudres, puis encore vne régee, & encore vn liét, iusques au dessus du pot, puis ayes du miel blanc fin, & le

iette par dessus le tout, & voila ta confiture faite.

Pour sauoir faire venir pompons sucrins, & doux en perfection.

Prends sucre fin, & le dissoulz en eau claire, mais qu'il n'y ayt non plus d'eau qu'il fault à deffaire ledit sucre: puis ayes semence de melons, & esclatte les vn peu du costé ou tu vois que le germe doit sail-
lit, mets les en leau susdite à laquelle ad-
ioindras de sucre, vn peu d'eau rose ou de damas: & laisse ainsi reposer lesdites se-
mées l'espace de trois ou quatre heures,
puis ostes les hors, pour essuier: & tu verras
que si tost qu'elles seront essuies se resser-
reront: alors seme les en vne couche bien
fumee, & tu verras que les pompons qui
iïtront desdites semences seront tous suc-
crains & tres bons, Et si tu les veux faire
musquez, mets dens l'eau susdite quelque
peu de musc & de canelle fine, tu en auras
l'effect. Le semblable pourras experimen-
ter en semence de courges.

*Pour sauoir confire escorces d'orenges laquelle
confiture se fait tout du long de l'annee: mais
mieux au moy de May que lesdites escor-
ces seront plus grosses & grandes.*

Preus escorces d'orenges entieres, tail-
le les en quatre ou six cartiers; & les laisse

tremper par dix iours en eae claire, deux iours moins ou deux iours plus, ny ha pas grand interest: selon que te semblera l'escorce mise au iour estre claire & resplendissante, car à ce cognoiras se lesdites escorces auront trempé assez: & si tu vois qu'elles ne soient claires comme de raison, laisse les encore tremper iusques à ce que tu voye le iour au trauers. Celà fait, essuie les tresbié sur vne table entre deux seruiettes nettes, ou bien entre vne nappe repleyee. Et quand tu verras qu'elles seront bien essuittes mets les en vn chauderon ou pot sus le feu avec autant de miel qui puisse couvrir la moitié desdites escorces, plus ou moins à ton plaisir: fais les ainsi bouillir vn petit tousiours meslant: toutesfois de peur qu'elles ne se brûlent, soudain, oste les du feu que le miel ne soit trop cuit, & que les escorces ne tiennent l'vne à l'autre. Laisse les reposer par quatre iours ainsi, & chacun iour souuienne toy de les messer, & retourner tres bien, car tu scez qu'il n'y ha pas tant de miel qu'il puisse couvrir toutes les escorces, tellement que si tu ne les meslois, toutes ne prendroient pas confiture: puis les feras encore bouillir par trois iours, vne fois par iour iusques au premier bouillon
seulement

seulement toujours mellant comme dit est: oste lesdites escorces de leur premier miel, & les mets en vn autre vaisseau, avec d'autre miel, en telle quantité qu'il te plaira, & les fais bouillir tant que seroit la loqueur de vn credo: puis oste les du feu, & les mets ainsi avec leur miel dens vn autre vaisseau pour les garder, auquel vaisseau pour confiture mettras les meilleures espices que pourras trouuer, c'est-à-sauoir, gingembre, girofle, canelle, muquette, le tout puluerisé melle avec la susdite confection, & ton cas ira tresbien. Note que le miel qui te restera sera tresbon pour confire d'autres escorces comme dessus.

Pour confire noix verdes.

Prens noix verdes petites avec l'escorce, fais leur à chacune quatre, ou cinq petits pertuis avec vne espingle, & les mets tremper en eue l'espace de quinze iours plus ou moins, puis nettoye ou pelle les vñ bien peu: fais bouillir en miel ainsi que ha esté dit les escorces d'orenges, mais il faut que tu faces bouillir les noix verdes quatre fois plus que les oranges, pour la quantité d'icelles, & leur adioustes les espices susdictes, quand les mettras aux pots pour les garder, mais boutes y moins

de clou, car il engendre amertume. Note que le miel est toujours bon, mais à mesure qu'il se diminue au bouillir, te y en fault mettre d'autre.

Pour confire les courges.

Prends le col de la courge, non pas le ventre, & le taille par long en cartiers à ton plaisir, puis eschaude lesdits cartiers en eaue bouillante, c'est à sauoir en les iettant dens eaue qui bouille: fais ainsi par neuf iours de matin, mais il fault que deuant q'les eschauder tu leur ostes l'escorce bien legerement, & non trop auant: & semblablement aussi que tu iettes ceste moelle, & pepins qui sont leans. Celà fait fault que tu les faces bouillir en miel dens vne chaudiere, non pas trop, mais honnestement qu'elles soient vn peu dures, puis mets les essuier sus vne table, comme dessus ha esté dit des courges, & les laisse aussi essuier piece à piece, en les retournant, l'espace de deux iours: puis mets les en pots telz que voudras avec especes telle que dessus ha esté dit.

Pour confire poires musquettes.

Il te les fault bouillir en miel vne fois seulement: puis avec ledit miel, & especes telles que dessus, les mettre en pots pour garder, & note que toutes les confitures

ſuſdites veulent eſtre vn peu fortes d'eſpices pour meilleure garde, & pour mieux conforter l'eſtomach.

Pour confire des meriſes.

Prends meriſes en telle quantité qu'il te plaira, & les mets au Soleil l'eſpace d'un iour qui ſoit chaud, puis oſte le noyau, & les remets au Soleil par trois iours, puis fais les cuire ainſi que deſſus ha eſté dit des orenges: mais les fault laiſſer au miel quinze iours, & par trois iours les mettre ſus le feutant qu'elles s'eſchauffent, pour garder qu'elles ne ſe moiſiſſent: apres cela mets les aux pots avec leur eſpicerie, & les eſtoÿppe tresbien. Note que toutes les confitures ſuſdites ſe peuvent garder pluſieurs ans, ſi chacun an tu leur accroiſſes leur miel, & les faces bouillir vn petit.



S E C O N D R E C E -
ptaire, de ce present liuret, au-
quel est traicté de diuerſes
ſortes d'odeurs, & la cõ
fection d'icelles.

*Pour accouſtrer les roſes en ſorte que miſes en
vn coffre plein de linge, ou veſtiments,
rendront odeur treſſouueraine,
& ſont delectable.*

P R E N s pampes de roſes au-
tant que tu voudras, eſpands
les ſus vne table, & quelque
linge deſſouz, & deſſus: laiſ-
ſe les ainſi iuſques à ce qu'el
les ſoient ſeiches, c'eſt à ſauoir bié eſſuiees:
& fais que le lieu ou tu les mettras ayt
vent, & bon air non pas Soleil, & quand
tu verras qu'elles ſeront bien ſeiches prés
eue roſe fine muſquee en ta bouche, &

espluie là sus lesdites roses tât qu'elles de-
uiennent vn peu moittes : puis recouure
les tresbien, & laisse les seicher encore de
rechef les espluant de l'eau susdite ius-
qu'à trois fois, ainsi que dit est. Apres ce
prendras benioin, storax calamite, de cha-
cun vn peu, avecques deux ou trois grains
de musc, & demy grain de cyuette, le tout
poudroyé, & mélé avec eau rose dens v-
ne petite escuelle, respandras menu sus les
roses que tu auras mises dés vn plat creux,
ou autre tel vaisseau, & ainsi les mesleras
tresbien plusieurs iours. Incōtinent apres,
mets les dens sachets de linge vieil, faits en
maniere de coussinets, & couds lesdites
roses leans, & les iette dens tes coffres, tu
verras que en moins de quatre iours ce q̃
sera dedens lesdits coffres aura prins vne
odeur parfaite.

Item si tu ne y veux faire tant de des-
pense, seiche lesdites roses comme dessus,
& aye vn petit pot, dés lequel mets de l'e-
au rose assez, & sus icelle eau rose iette
poudre de racine de flambes blanches, &
de girofle, & muguette, avec vn peu de
musc, laisse le tout bouillir à petit feu, puis
le jette bien menu sus les roses tant qu'el-
les en soient humides & moittes, mets les
dens leurs sachets comme dessus.

Pour parfumer les gants.

Prends huile d'amendes douces, mets le dens vne fiole avec les poudres qui s'ensuiuent : à sauoir vn peu de musc, storax calamita, racine de flambes : le tout bien puluerisé mettras dens la fiole, laquelle fault que tu laisses reposer, & se confire au Soleil l'espace de huit iours ayant tous les iours la soing de messer lesdites poudres parmi l'huile avec vne buchette, puis aye de l'eau rose musquée, & prens tes gants, & les mouille tresbien d'icelle eau sus vn taillouer: laisse les seicher, & fais en ceste maniere par trois ou quatre fois : & la derniere fois que les gants serôt essuiez, oinds les de l'huile susdite, & tu verras l'odeur qu'ilz prendront. Encore de ladite huile te peux oindre les mains quelque fois, elle te les rendra molletes, reluisantes, & de bonne odeur, pour encore mieux entretenir le parfum de tes gants par dens quand tu les mettras.

Perfum fin.

Recipe trois onces béioin, trois onces de storax calamita, poudroye le tout ensemble bié delié: vne once de charbō de saulx amorti, & destaint en eau rose, puluerise le avec la quarte partie de bois d'aloë, & demie once de sablō d'estâpes fort delié.

Les choses susdites fault que tu melle ensemble, & incorpores avec gomme de dragant destrempé en eaue rose: de ceste paste vseras pour parfums tresbon.

Pour faire saun rosat, à mettre en boettes.

Prends saun destrempé par plusieurs fois en eaue rose: puis ayes boutons de roses de prouins raillez bien menu: & chacun iour mets desdites roses couppees avec le saun quand sera au Soleil, & celà feras par quatre iours: puis quād tu le voudras mettre en boettes, ou petis vaisseaux, ayes vne once & demye de poudre de clou, & la quarte part de ireos de florence bien puluerisé, & cicotriné avec vn peu de benioin: le tout fault que tu melles parmi le saun. Saches que pour chacune liure de saun, fault liure & demie de roses, & quand tu les mets avec ledit saun, veulēt estre couppees de fraiz, & par fois y mettre de l'eaue rose, en messant, & pilant continuellement.

Pour faire saun giroflat.

Prends vne liure de saun, mets la tremper en eaue rose au Soleil par trois iours, & quand tu voudras faire ton saun, aye vne once & demie de clou bien battu, & la moitié dudit clou mettras dens

ton saupon, en messant bien diligemment: de l'autre moitié fais ce qui s'ensuit: Ayes vn petit pot avec eaue rose, & les fais bouillir au feu, & quand commencera à bouillir, mets le reste de ta poudre de girofle dedens, & oste le pot du feu, & le couvre tresbié, iusque à ce que le bouillō soit cessé, & que l'eaue soit attiedie, puis remue le avec vne buchette, & ainsi en remuât, mesle avec ton saupon: Et si tu y veux adjoûster vn peu de benioin tu le peux faire, ainsi tu mettras ton saupon dedés la boette, & il prendra forme, & odeur bien bonne.

Paste d'ambre fine.

Recipe storax calamita deux onces, ladanum quatre onces, irtos de florence demie once, beioin demie once, deux noix muguettes, avec vn peu de musc fin, toutes les choses susdites soiét bien puluerisees, & incorporees avec gomme dragant defaite en eaue rose, & avec ledit dragant si tu veux, tu y peux mettre encore vn peu de gomme arabie: & laisse le tout ainsi tréper toute vne nuit, iusques à ce que soit si bié incorporé qu'il semble de cire: & voila comme on fait la paste fine que lon nôme la paste d'ambre.

Oiselets de Cypre.

Prends trois onces de benioin, & autant

de storax calamita, vne once de charbon doux; vne once de myrrhe, demie once de lignaloës, le tout soit bien pilé, & cicotriné: puis ayes la quatre part de gomme dragant destrempee en eue rose fine l'espace d'une nuit, incorpore les susdites choses avec le dragant: & du tout bien manié, & melle, fais en piselets en forme de chaufsetrappes, & ilz seront bien odorants,

Pomade fine.

Prends sain doux de porc fraiz, ou de cerf pour le mieux, puis ayes pommes de rouveau, & racines de flambe, ou ireos de Florence, deffaits ledit sain de cers, mets y dedens les pommes bien pilees, & apres que le tout sera bien pestri adioustes y vn peu de poudre de clou & de canelle, avec ton ireos bien cicotriné, melle & deffaits bien le tout ensemble: puis assiez ladite cõposition en linge delié, & laisse reposer dedens caue clere, apres ce delaye la en eue rose bié odorâte, & la laue en ladite eue par neuf foys, voila ta pomade bonne.

Huile odorante, qui fait les mains souples & delicats, & restraint la peau.

Prends huile d'amandes douces, mets y dedens giroffes entiers, & les laisse reposer leans par l'espace de huit iours au Soleil, puis de telle huile oinds toy les maïs,

tu auras l'effect susdit.

Eau odorante tresfine.

Prends vne liure d'eau rose fine, vne liure d'eau de damas & fleurs de citrons, melle ces eaux ensemble, & y mets dedés trois trezeaux de poudre de cypre, demi trezeau de musc, & autant de cynette, vne once de benioin, le tout bien poudroyé & melle ensemble, soit mis en l'eau susdite dans vne fiole de verre, laquelle mettras reposer au Soleil par deux iours, & la tiés tousiours bien estoupee.

Sauon pour les Barbiers à peu de fraiz.

Prends fleur de sauon, ou sauon damasquin tât qu'il t'en fault & que tu en veux, trenche le en menues pieces, & le mets destremper en eau rose, puis aye ireos de Florence puluerisé, & clou bien battu, & le tout incorpore bien ensemble, & en fais pelottes de telle grosseur que voudras: voila bon sauon à lauer la teste & la barbe.

Perfums odorans & bons.

Prends gomme dragant, & la mets en eau rose tant qu'elle soit bien destrempee & liquide: puis poudroye les choses cy dessous escriptes.

Recipe ladanum vne once, storax calamita vne once, benioin vne once, ligna-

loës quart d'once, charbon de saulx ou de vigne deux onces & demie: pile le tout ensemble, & paîtriz avec la gomme susdite: & de ce fais autant de petites pelottes ou trociz qu'il te plaira, laisse les seicher à l'ombre.

Paste pour faire patenostres de senteurs.

Prends liure & demie de terre noire bien fort puluerisee & passée par le tamiz, quatre onces de dragant deslayé, & deffait en eau rose comme deffusant que ladite terre mise en vn mortier puisse estre couuerte de ladite gomme, pile bien le tout par l'espace de demie heure, avec trois onces d'odeurs cy deffouz escrites.

Recite vne once de storax calamita, demie once poudre de clou, & autant de ladanum, cinamome, & sandal citrin, poudroye le tout bien delié & le mesle avec la paste susdite, tire la hors du mortier & manie avec la main par l'espace de bié demie heure, puis forme tes patenostres.

Perfums en poudre.

Prés benioin, storax calamita, lignaloës, ladanum, grains de geneure, autât de chacun qu'il te plaira: pile les ensemble tellement quellemét: puis mets le tout ensemble autât d'un que d'autre: iette ledit parfums sus le feu, & tu verras si cela sentira bon.



TIERS RECEPTAI-
re d'aucuns secretz Medi-
cinaux, propres à con-
seruer la vie hu-
maine.

Comment ainsi soit que en plusieurs receptes & remedes mediciniaux y entre l'huile rosat, ou autres faiz d'herbes propres à nostre santé, c'est raison que ie t'enseigne en ceste part, la maniere de les composer.



PRENS telle quantité de feuilles de roses que bon te semblera, & icelle mettras en vn pot ou chauderon, auquel aussi mettras autant d'huile d'olif douce qu'il faudra, cestafauoir tant que tu la voye clero, & que toutes les roses soiēt au dessouz, & aye au dessus deux doigts de hault de roses, laisse bouillir à petit feu tant que la tierce par-

tie soit diminuee: & quand sera diminuee oste la du feu, & le laisse refroidir, puis le fault couler, & estraindre tresbien, à fin que la substance des roses demeure leans, & les roses que tu auras espraintes jette les, & ayes autres feuilles de roses fresches, & les mets deus vn vaisseau de verre en sorte qu'il soit à demi plein de roses: puis mets sus lescdites roses ton huile coulee iusques à ce que le vaisseau soit plein, & l'estoupe tresbien, puis mets le au Soleil, & le laisse là l'espace de quinze iours cōtinuelz pour le moins, & si plus y estoit mieux en vaudroit, mais garde le bien de la pluie & rosee: Et soye certain que si ladite huile estoit faite de roses sauages, mieux en vaudroit.

Par ceste mesme maniere tu peux faire l'huile violat, de camomille, d'aner, mēte, rue, & autres tāt fleurs que herbes: mais tu dois entendre que l'huile des herbes veult estre faite au mois de May, car alors lescdites herbes sont en plus grāde vertu: & si tu passois le mois de May: au moins ne passe point my Iuin: car les herbes ne sont plus bonnes depuis qu'elles viennent en graine, & alors perdent leur force & amour.

Pour faire eau d'herbes, fleurs, racines de toutes sortes.

Note pour vne reigle generale quant au distiller toutes herbes fleurs & racines, comme rauts, fumeterre, mête, sauge, hyssope & telles autres, tu ne dois point commencer à ce faire, iusques à my Auril, & puis perseuerer iusque à my Iuin : mais qui le peult faire, doit estre fait au moys de May, car alors fait meilleur pour plusieurs raisons. Item voulant distiller les fleurs comme de roses, origan, romarin, geneste, febues, & telles autres, tu dois obseruer & prendre bien garde au temps auquel icelles fleurs sont au meilleur estat & plus grande & parfaite beauté : cela ie dis pour autant que toutes fleurs ne viennent pas en vn mesme temps, mais varient selon la saison, parquoy te fault suivre leurs dispositions. Item si tu veux distiller eaux de racines d'herbes il fault que tu attendes le temps qu'elles saillent hors en graine, & que les fueilles cheent. Cela se fait au commencement d'Octobre iusques en Feurier entierement : car alors toute la puissance de l'herbe est à la racine, car comme elles commencent à saillir hors tu dois sauoir que l'amour ne est plus à la racine, mais se cōcomme en la fueille & à la tige. Cela doit estre mis entre les secretz de la reigle generale.

Donq si tu veux distiller fleurs, fueilles, ou racines d'herbes: il te fault observer le temps auquel elles sont plus en vertu & puissance: & selon cela te reigler, iamaïs ne pourras faillir.

Pour purifier le sang qui est chose propre à la plus grãde partie de toutes les maladies, mesmement à la maladie de Naples: Et toutes rongues lepreuses qui pour onction quelconque ne se veulent partir.

Prens deux onces de fueilles d sené mundees, polipode, epitime, mirabolans citrins, sebesten, reglisse, de chacun demie once, raponticon cinq dragmes, german-dree que lon dit yua arthretica trois dragmes: taille le tout avec les forcettes, & la mets en eue de houbelon, & de fumeterre de chacun deux liures, & le tiens leans l'espace de trentesix heures en infusion couuerte, puis mets y dedens fleurs de buglosse, bourroche, baselic, de chacun trois dragme: fais le tout bouillir ensemble l'espace d'un quart d'heure, apres coule la par un drapeau de lin: & en colature mettras syrop de houbelon & de fumeterre, de chacun deux onces, oximel fait avec des squilles once & demie, syrop violat vne once & demie, scrupule de safran, ambre, musc quatre

grains: toutes ces choses poudroyees mets les en la matiere susdite, & la laisse reposer l'espace de six iours en lieu froid, & puis de telle cõposition feras prẽdre tous les matins deux onces à celuy qui mal se sentira, & tu verras grande experience.

Cõtre toutes gouttes de quelque sorte qu'elles soient ou de la virole, ou autrement.

Prends les cãnes d'hyebles des plus grosses & plus fermes qui soient, oste leur la moelle qui est dedens, & au lieu de ladite moelle, mets vne quãtitẽ de vers ou lõbriz qui croĩsẽt souz terre, & encor de l'huile commun, estouppe tresbien lesdites cãnes de costẽ & d'autre, & les mets sẽcher dans le four l'espace de demy heure ou enuĩrõ, puis oste l'huile de dedens & le garde cõme vn baume, pour ton besoĩng.

Remede tresbon quand tu iras en lieu suspect de peste.

Prends perles fines pilees, coral fin, ambre gris, & musc, de chacun cinq grains, demie once de clou battu auec racine de campane: fais vn sachet de sandal cramoisi & mets les choses susdites puluerisees dedens, & te les applique sus l'estomach, cela te gardera tresbien.

Pour faire vne pommẽ d'odeur qui serue contre la peste.

Prends

Prens ladanum fin purgé, demié once, storax calamite fine trois onces, mirrhe & girofle cinq dragmes, sug de valeriane vne dragme, musc fin & ambre gris vn carat, ce qui se doit piler, pile le bien delié & le passe avec l'estamine, & les gommés mets les au mortier chaud, avec le pilon aussi bien chaud, & pile tresbien tant que tout s'incorpore ensemble, puis iette sus iust de melisse & de buglosse, & ainú faista pomme, laquelle en danger de peste porteras en ta main, & n'aye doute de riens.

Remede notable pour mettre sus la peste.

Prens vinaigre bien fort, eaue rose, safran, arsenic, & mesle tout ensemble, & cōtinuellement mouille de ceste confection le lieu ou tu as mal avec vne piece de scarlate teinte en graine. Cela ha esté souuent esprouué par la grace de Dieu.

Remede pour ayder vn malade, abandonné des medecins pour auoir esté trop long temps à la diette.

Prens vne quantité d'œufs frais, & en oste la glaïre, & la bats biē fort, & mouille toute la persōne de ladite glaïre, tousiours frottant avec la main entre deux feux, & ceste glaïre entrera toute en la chair du malade, en luy donnant substance, de sorte que cela le fera retourner en santé & a-

pres que tu l'auras tresbien fait rotter fais le porter au liét, & tu verras que à cause de la substance de la glaire qu'il aura prinse commencera à prendre appetit.

Restaurant pour ledit malade.

Prens l'eau d'une bonne poule distillée en alembic, & y mets dedens du sucre, & le baille au malade. Item prens vne geline & la fais cuire en tresbon vin blanc, & la fais tant bouillir qu'elle se defface toute, puis qu'elle sera ainsi deffaitte espraints la, & ainsi esprainte remets la de rechef à bouillir vn peu dens le vin, apres coule le brouet de ladite poule, & prens vn moyeu d'œuf & le deffais dedens ledit brouet aupres du feu, puis fais prendre de cela au malade, il s'en guarira.

Pour faire que vn qui sera à l'article de la mort & ait perdu la parole, puisse parler autant d'espace qu'il seroit besoing à disposer de son cas.

Prés vn bassin à barbier, ou bié vne bassinoire: & avec ce chauffe au malade le sommet de la teste tant que le cerueau se sente de la chaleur, c'est assauoir l'espace d'un ere doicroy que incōtinēt que le cerueau sentira ladite chaleur, la langue se desliera vn peu, & commencera le patient à parler, & peu apres s'il doit mourir il mourra.

Eau precieuse contre rougeur & mal des yeux, & cataracte ou suffusion.

Note que la premiere sepmaine de May il te fault recueillir les herbes qui s'en suivent, Chelidoine que lon nomme esclerc, veruene, rue, fenail, pile le tout tresbien à part l'une de l'autre, puis prens trois onces de iust de chacune & les mesle ensemble, puis prens vn peu de pampes de roses & trois onces de sucre cadi & quatre onces de tuthie fine & autant de sang de dragon, puluerisé, toutes ces choses ensemble & les mets avec les iusts susdits, & fais distiller en alembic de verre, & l'eau qui sera receue dès les materaz, laisse la leant par deux ou trois iours, puis mets la en oeuvre à ton besoing.

Pour faire vne huile tresprecieuse q fait r'affermer & repredre toute playe grande & petite.

Prens herbe qui se nomme mille pertuis vne poignée, & deux liures d'huile commun, & vne liure de suif de porceau coulé & d'effect, & quatre onces de tormentine de venise, vne dragme de saffra, & toutes les choses susdites trenchées menu, tu les mettras dans vne grande fiole de verre, laquelle estouperas tresbien avec cire & autremét, puis mets la environ deux piedz auant dans le fiens, en lieu ou le Soleil

frappe le plus du matin & du soir & laisse ledit boccal dens le fiens l'espace d'une annee entiere : puis au bout de l'annee , tire hors ton boccal, & tu trouueras dedés vne huile semblable à vn baulme: duquel quād tu voudras vser fais que la personne l'endure le plus chaud qu'il pourra, & tu verras que la playe sus laquelle tu mettras ladite huile soit grande ou petite, se guarira en moins de vingt quatre heures.

*Medecine merueilleuse laquelle guarit
les gouttes pour l'heure presente
qu'elle est appliquee.*

Prends hermodattes, turbit, de chacun dragme & demie, gingembre blanc, mastic, girofle, galanga, de chacun vn scrupule: anis, fenoiil, milium folis de chacū deux scrupules & demy: serapin demie dragme, diagrede deux scrupules, sucre fin le poix de la quantité susdite : fais en poudre, & note que le sacre doit estre mis, quand on vse de ladite poudre, selon la qualité & puissance ou temperature de qui la prend ou dragme & demie ou bien deux iusques à trois : & se préd au matin avec le brouet d'un poulet, ou en vin blanc, ou avec de l'eau: & ne fault dormir apres : mais peu apres fault prendre repas selon l'ordre des autres medecines.

Contre la pierre.

Prends sang de lieure, & en la peau du lieure dont tu l'auras prins remets ledit sang, & l'enueloppe tresbien, & le mets seicher au four, puis fais en poudre, & de la poudre dudit sang & peau ensemble pulverisee, baille à boire au malade tous les matins avec le brouet d'un poulet, & tu verras grande experience.

Pour faire pisser la gravelle.

Prends crottes de souriz poudroyees, bailles en à boire avec du brouet le matin au patient, & guarira.

Pour savoir si ton enfant ha les vers.

Premierement, si tu veux leiche luy le front avec ta langue, & si tu trouues que ledit front soit salé c'est signe qu'il ha des vers: oultre mets ta bouche sus la sienne, & si tu s'es puer ce qui sort de sa bouche, c'est encor signe qu'il ha des vers. L'autre signe est, que les yeux luy reluisent plus que de coustume. Si tu trouues telz signes, fais les remedes qui s'ensuiuent.

Contre le mal des vers, qui vient aux enfans.

Prends zinzanie, trementine dittame blanc, semencine, semence de choux, tant d'un que d'autre, fais en poudre, & en baille aux petis enfans vne dragme avec vin

doux ou miel rosat: & aux grandelets vne dragme & demie: tu verras l'effect.

Remede au mal de schinancie.

Prens siente de chien, de celle qui est blanche & seiche, que semble chaulx viue, mets en poudre, de laquelle ietteras dens la bouche du malade, au plus profond d'icelle avec vn tuyau de plume, & luy souffleras dessus la luctte le plus auant que pourras, & incontinent sera guarì.

Pour guarir soudainement l'escorchure qui vient sus le mēbre tant d'homme, que de femme, à raison de trop grande eschauffure.

Prens alun de roche vne once, verd de gris vne dragme, mets le tout dès vn bocal de verre avec eaue de forge, & le fais bouillir sus le feu l'espace de deux heures: puis espurge ladite eaue pour ton vsage, & d'icelle mouille la place ou tu as mal, avec vn peu de cotton, tu guariras incontinēt.

Contre la fièvre quarte.

Prens gingembre benist, macis, mugette, girofle, polure rond autant d'un que d'autre, le tout puluerisē mets en vn petit pot avec demi verre de maluaisie, & fais bouillir avec vne partie des especes susdites, puis ayes de l'encens en herbe tout frais s'il est possible, asauoir du masle: & quand la fièvre te prendra tu t'en iras cou-

cher, & auras vne tuile & la chaufferas tresbien, & mettras ledit encens dessus, & l'estouffe ou estains avec ceste maluaisie ainsi chaude qu'elle sera, fais te mettre la-dite tuile au droit de l'eschine du dos, & te fais enveloper tresbien & couvrir tant que tu puisse suer, dors en ceste maniere si tu peux, & fais ainsi par trois fois, ta fièvre s'en yra.

Pour faire partir incontinent & en vn instant la douleur de la teste.

Prends eue de marioleine, & la mets en vne escuelle, puis tire avec le nez ton vent amont tant que l'eue entre dedens, & incontinent la douleur s'en yra.

Pour faire reprendre, & guarir playes ou loupes des iambes.

Prends vne once de tormentine, & prends vn i'aune d'œuf & melle ensemble avec vn petit de cire neuue, & vn peu de sel, fais onguent, cela fait reprendre la playe incontinent.

Contre la teigne.

Prends vne liure d'huile dolif, lart de porc liure & demie, miel six onces, tormentine, amendes, des noyaux de pesches de chacun vne liure, soufre, alun de roche de chacun trois onces, fais oignement & en vse sus le lieu ou est la teigne.

*Pour guarir les rubiz, qui viennent
sus le visage.*

Prends sain de porc & soufre, pile le tout
enséble en forme d'onguêt, & t'en oinds,
tu guariras.

Autrement.

Prends eau faite de fueilles de pescher,
& de fueilles de saulx, autant d'une com-
me d'autre, mouille toy les rubiz de telle
mixtion & tu guariras, mais les eaux doi-
uent estre distillees.

Pour estancher le sang d'une playe.

Prends fueilles de vigne & les brule & en
fais poudre, laquelle mettras sus la playe,
ton cas ira bien.

*Contre la douleur des dents & V
gencives enflées*

Prends piretre, racine de colocynthe qui
est courge sauuage, semence d'asperges: &
& le tout mis en poudre mesleras avec bõ
vinaigre: puis sèche les, & deuant que tu
en vses, laue toy les dets & la bouche avec
vinaigre tiede lequel ayt bouillu avec de
la sauge: ce remede est parfait.

*Contre eschaubouillure ou bien
eschaudure d'eau.*

Prés vn moyeuf d'un œuf fraiz & d'hui-
le dolif, avec vn peu de sel & de farine, &
bats le tout tresbien ensemble: & tel em-

plastre mis sus vn drapeau applicueras sus le mal,tu verras l'experience.

Contre eschandure de feu.

Prens la seconde escorce du seuz, & la fais bouillir en cire neuue, & huile d'olif, tant que la tierce partie s'en diminue, puis coule le, & t'en oinds tu guariras : pour le moins celà t'ostera la douleur.

Contre la toux & difficulté d'alaine.

Prens figues seiches & hyssoppe bien pilée, & les fais bouillir avec miel cru & boy celà à ieno, il te profitera.

Contre trenchees, expressions,

& flux de ventre.

Prés vne teste de moutō & la fais bouillir avec de l'anis, puis prens le brouet coulé & y mets dedens demie escuelle d'anet, & du tout fais vn clistere, celà est bō à plusieurs douleurs de boyaux.

Pour guarir les broches.

Prés pois gris, & en faisz farine & pestriz la avec miel cru, & de ce oinds les broches deux fois le iour tu seras deliuré.

Item l'huile de spicenard fera le semblable.

Ité l'huile de petrolle fera le semblable.

Contre les escrouelles.

Prens closportes, qui sont bestelertes grises que lon trouue souz les pierres, &

les fais mourir en huile rosat, puis oste les hors de l'huile & les mets dens vn coffre de fer qui soit enrouillé, & les messe leans avec vn clou pareillement enrouillé, & messe celà tant qu'il vienne auoir forme d'onguent, & de telle onction frotteras tresbien la partie ou sont les escrouelles tât que tu les voye rougir: & fais celà tous les matins, tu guariras.

Pour faire bonne veüe tant aux ieunes que vieux.

Prés iust de eufraise que aucuns nōment cartophilago, & la laisse purger vne nuit entière, puis coule le & le mets en vne fiole, dens laquelle mettras vn peu de tuthie preparee & sucre fin: & avec ladite cōpositiō mouille toy les yeux au soir & au matin: & au milieu du iour & en terme de quinze iours ou à l'entour retournera la veüe, comme si tu estois ieune.

Pour faire partir les cicatrices des playes ou bien venues de nature.

Prends des cheueux & fiente de l'homme qui soit sain, seiche les, & en fais poudre, laquelle feras distiller en alembic & de telle eaue laue les cicatrices plusieurs fois, a sauoir en continuant quelque peu de temps, tout se partira.

Pour guarir les gencines pourries.

Prens iust de fueilles de vigne, & destrépe le en miel, & de ce oindras les genciues & la langue, tu guariras fust ce chancre.

*Pour guarir les iardeyres & mal du nez,
pour cause de quelque humeur nuisante.*

Prens rue, & presse la, puis fais la bouillir en huile commun ou bien en beurre avec vne escorce d'oignon, & quand aura bouillu, mets le sus le nez par plusieurs fois, te vela guarir.

*Onguent pour oster les lentilles, &
saphiz, de dessus le nez.*

Prens onguent de althea, huile rosat, eau rose, beurre fraiz, de chacun vn peu à ta discretion, mesle le tout ensemble, & de telle onction y feras tous les soirs, tu seras guarir.

Contre la surdité, & douleurs d'oreilles.

Prens fueilles de roses, sauge, mente, laurier, de chacun vne poigne, fais le tout bouillir en bon vin tant que la tierce partie en descroisse, & tient le pot bien couuert, & le soir quand iras dormir, pose ton oreille sus la fumee qui sortira dudit pot, l'espace de vne heure, puis prendras vn peu desdites herbes cuittes, & te les mettras dens l'oreille, ainsi t'en yra coucher bien chaudement, & te fais bien couvrir tu guariras.

*Pour tirer vn fer de vireton, ou flefche, ou
bien vne espine, sans aucun ferrement.*

Prens choux rauerdis, & recreiz qui
soyét bien tédres, fais en iust lequel met-
tras en cire neuue, applique l'ôguét sus le
lieu, ou est le fer demeuré, & tu verras q^l
sortira. Le mesme fait la gresse de lieure.

*Pour faire eau merueilleuse qui destruira le
gros gosier qui vient contre nature tant
aux hommes que aux femmes.*

Prens huile de laurier demie liure, oli-
ban, mastic, gomme arabic, tormentine
clere de chacun trois onces: melle le tout
ensemble en vn mortier, & puis fais disti-
ller en chapelle: & en l'eau qui sortira
mets y de la cendre & melle bié fort puis
distile vne autre fois, garde la derniere
eau comme vn baufme, & d'icelle mouil-
leras le gosier plusieurs fois le iour, tu ver-
ras que peu à peu se deffera par la vertu &
puissance de ceste eau.

*Pour conseruer la santé le long de
toute l'année à la personne.*

Prens trois sommets de rue & autât de
butefne, pile bien & melle tout ensemble
auec trois doigts de bon vin, & en bois à
ieun tous les matins tât q^l durera le mois
de May. Et soyé seur que ceste année ne
viédra mal sus la personne en buuât les-

dités substāces. Et pourtāt ne t'esmeruilles s'il y ha grandes vertus aux herbes.

*Pour faire descroitre & en aller le gros
gestier qui vient contre nature, tant
aux hommes que aux femmes.*

Prends neuf grains de poiure rond, & neuf noueds de graine de milica, & vne esponge d'un liard, la plus rouge qu'il sera possible de trouver: & quand la Lune commencera à descroitre, le premier vendredi seras bruler cestedit espoëge, & selon qu'elle brulera reçoïy là en vne escuëlle d'estain, ou de terre, tāt qu'elle soit toute brulee. Le semblable seras du milica, & en seras poudre, puis pile ces geains de poiure tresbien, & mets la susdite poudre battue avec le poiure à battre encore de rechef: puis prés vne petite poignée de farine de froment, & un moyeuf d'œuf qui soit pondu le iour dudit vendredi, & si tu n'en as assez d'un prés en deux, & de toutes ces choses fais paste, & les pétriz en forme de torteau, lequel mettras cuire sus le foyer bié essuié, & nettoïyé: puis ledit torteau cuit partiras en six pieces, & la mesme soiree quatre heures apres soupper prends vne des pieces de ce gasteau, & la mengeue, puis va au lit sans autrement boire, & les iours ensuiuans continue un

soir si, & l'autre non, iusques à ce que le
 torteau soit failli. Et cotemps pendât ab-
 stiens toy tresbien, & sois sobre. Celà face
 iusques au cōmencement de la Lune suy-
 uante, puis quand icelle lune sera encore
 en decours, recommence encore derechef
 le premier vendredi à faire la galette, &
 en vse comme dessus, & sans doute le go-
 fier descroitra.

DIZAIN AV LECTEUR.

*Vn Berger las de sa Musette
 Ne voulant plus muser ne riper:
 En menant sa trompe dancette
 Ha voulu son Esprit reduire
 Aux herbes, & d'elles escrire
 Quelque vertu à son plaisir:
 Et pourtant qu'il auost desir
 Satisfaire à sa Bergerotte,
 Pour elle ha cy voulu choisir
 Quelque recepte plus mignotte.*



3 AVTRES SECRETZ

M E D I C I N A V X, O V L-
tre ceux que l'Exemplaire Ita-
lien ha cy dessus proposé: ex-
pressément pour femmes.

Et premierement :

*Pour congnoistre quand vne femme
ha conceu enfant.*



A P R E s que la femme ha eu
compagnie d'homme, si tout
incontinent elle ha froid, &
douleurs de rains alors elle ha
conceu. Le deuxieme signe est, si le visage
de la femme change de couleur nō accou-
stumee. Le troisieme signe est, si la femme
appere à menger aucunes viandes nō ac-
coustumees comme charbon, vieux sou-
liers, terre, ou autres semblables.

*Pour congnoistre se la femme est
grosse de filz, ou de fille.*

Quand vne femme est grosse d'un filz
alors son visage est vermeil, son ventre
est rond, fort esleué au costé droit: & est
fort legere, gaye, & ioyeuse: sa mammel-
le dextre est plus grosse, & plus dure que
l'autre, son laiët est bien cuit, & bié espes,
duquel si vous mettez vne goutte sus vn
miroir, il ne couleroit ne çà ne là: Et
quand elle veult marcher, elle met tou-
iours premier le pied dextre.

Contre douleur de mammelles.

Pile, & broye plantain, & le lie sus le
tetin de la femme.

Autrement.

Prends sein de pourceau, c'est oing fort
vieil: trempé le en eau pour le dessaller,
puis prends oignons cuits en cendres, &
broye ton oingt avec lesdits oignons, &
apres en fais emplastre sus le tetin.

*Pour faire auoir abondance de
laiët aux nourrices.*

Prends biere, ou ceruoise nouuelle, & fe-
noil avec sa seméce, fais tout bouillir en-
semble, & de ce fais boire à vne nourrice,
& menger aussi dudit fenoil, & elle aura
du laiët abondamment.

En autre maniere.

Prends

Prens du pouliot, & melle avec du vin, & de ce baille à boire chacun jour à vne nourrice,

Autrement.

Prens la mentre, & en donne à menger le matin aux nourrices, celà fait auoir abondance de laiſt, c'eſt choſe experimenter.

*Pour auoir l'arriere fais des femmes
nouuellement accouchees.*

Prens poudre d'agate, & la donne à boire en vin à la femme.

Autrement.

Prens ſemence de plantain, & en fais boire ſouuent à la patiente, & guarira.

Autrement.

Prens du feu dens vn reſchauf, & mets plumes de poulets, ou quelque piece de vieil ſoulier ſus ledit feu, dedens vne ſelle percee, & fais ſeoir à nud la patiente en icelle ſelle, & ſera tout incôtinét guarie.

*Autrement, & meilleur de tous,
car ie l'ay eſſayé.*

Prens vn plein verre d'eau, & la fais chauffer ſus les cédres, puis la dōne à boire fort chaude à ladite femme, & vn peu apres elle eſtāt à la ſuſdite ſelle, qu'ō luy mette vne plume en la gorge bié par fōd, & en vomiffāt elle iettera ladite matiere.

Pour femme qui ne peut auoir ses fleurs.

Prés violettes herbe, & fleur, & les fais bouillir six heures avec vn peu de myrrhe, le tout dedés vn pot fort clot, & couuert, tant que la fumee n'en puisse sortir. En apres mets ledit pot dedens vne selle percee, en laquelle se seoye la patiente, & tant plus sera chaude la fumee qui sortira dudit pot, tant mieux vaudra: Ceste medecine aussi est bonne à celles qui n'eurēt iamais leſdites fleurs.

Autrement.

Prés absynte, & rue, avec douze grains de poiure, & cuits tout celà en vin, & puis baille à boire à ladite patiente au soir, & au matin, & elle aura son cas en brieſ.

Contre grand flux deſdites choſes.

Prends eſcorce de geneure, & la ſemence, & broye avec vinaigre, & baille à boire à toute heure.

Autrement.

Prends vne rane verde, fais en poudre, & la luy fais porter en vn ſac, & elle guarira. Si tu veux eſprouuer cecy, attache de ladite poudre au col d'vne poule, & trois iours apres coupe la teſte de ladite poule, tu verras q̃ de ſon ſang riēs ne ſortira.

Pour mondifier la matrice.

Prends perfil , & le fais bouillir en vin,
& le donne à boire à la femme.

Autrement.

Prends racine de violette avec les fueil-
les, & les cuits en eaue avec orge, seigle, &
auoine.

Pour femme qui sont en travail d'enfant.

Prends racine de verueine, & la mets sus
la femme qui trauaille, son mal & sa dou-
leur amoindriront , & la mettra hors de
grandes fantasies, & luy donnera bon re-
pos: aussi fera elle à l'enfant, se vous la luy
liez au col, ou aux mains: & fait dormir en
bon repos ceux qui ne peuuent dormir: &
si vous la liez aux crains d'un cheual avec
armoïse, en allât, il ne sera point las ne tra-
uillé.

Pour deliurer d'enfant incontinent:

Prenez racine de hannebanne, autrement
dite pottelee, & la mettez sus la cuisse gau-
che de la femme, & incontinent que l'en-
fant sera hors, ostez ladite racine de peur
qu'elle ne esmeue trop la femme.

Autrement c'est chose approuuee.

Prenez des fueilles de laurier, & les ma-
schez, puis les mettez sus le nombril de la
femme, & tout incontinent elle deliurera
d'enfant, sans grande douleur, cest vne me-
decine singuliere.

*Pour femme qui est longuement
en travail d'enfant.*

Prens mirthe, & la broyez avec du vin
& en baillez à boire à ladite femme.

*Pour faire mellicrat, ou bidromel bon
pour la femme qui travaille.*

Prenez vne pinte de miel fort clair, &
trois d'eau tiede, & meslez tout ensem-
ble, & en faites boire à la patiète, ou à vn
autre malade, car celà est bon en toutes
fieures, & maladies chaudes.

Pour auoir enfans.

Prens gui de chesne, qui est vne herbe
toufiours verde, croissante sus le chesne,
& nee de la fiente d'un oiseau, baillez à
boire dudit gui à la patiente avec du vin,
quand ses fleurs luy faudront, & elle cõ-
ceura, si elle ha cõpaignie d'homme: c'est
vn secret que recite Plinẽ.

*Pour conforter la femme quand l'enfant
est mort dedens son ventre:*

Prens fucilles de geneure, & miel; &
les cuits en eau, & la baille à boire à la-
dite femme.

*Pour restraindre femme qui est
trop luxurieuse.*

Prens butoesne, sametetre, & vinaigre,
& fais que la femme en boiue soir &
matin.

A femme qui vuide trop.

Si tu vois que la femme se vuide trop de ses fleurs oultre six iours, prens trois racines de plantain, & les fais cuire en eau de riuiera, ou de fontaine, & puis la baille à boire à ladite patiente, & incontînét elle guarira.

Ou prens eau rose, baille la à boire
soir & matin à ladite
femme, & elle
guarira.



F I N D V B A S T I M E N T
D E R E C E P T E S.

H iij



AVTRE PETIT TRAI
TÉ DE RECEPTES,
intitulé le Plaisant Iardin, culti-
ué par Medecins tresexperts en
Physique.

*La premiere partie traitera des remedes
pour maladies suruenantes au corps
humain.*

*La seconde, de plusieurs ioyens et de
faire en toute honnesté compagnie.*

*Item plusieurs receptes pour faire pou-
dre à Canon.*

*Traduit d'Italien en François, par
maistre Quilleri de
Passebrene.*



EPISTRE DV TRASLATEVR.



LE ne pèse point (amy Lecteur) que tant pour l'vtilité du pore peuple, que pour rebouir toute honneste compagnie il y ayt en depuis deux cens ans, liure Impri mé, qui se puisse accóparager à cestuy petit Liure, duquel ie t'ay bien voulu faire present. Comme non estât du nombre de ceux qui se estudiét estre totallemét proufitables à eux mesmes, desquelz ie ne veux tenir, ny estre de leur compagnie. Pource tresbeneuole Lecteur, ie te prie prendre en gré ce petit liure lequel te sera proufitable & vtile, avec le grád plaisir & ioyeu seté, que pourras trouuer en iceluy, en le lisant. Te priant m'excuser, si le langage te semble quelque peu rude, ou impoli. Et te faisant certain m'estre plus tost voulu abandonner aux sottés reprises de gens folz & estourdis, que d'estre noté du malheureux vice d'ingratitude.



Commencement des Receptes du Plaisant Iardin.

*Pour oster toute macule, &
rougeur des yeux.*



Prenez vn quarteron de sucre candi, & demi quarteron d'alun de glace, & de ce ensemble faites poudre, de laquelle poudrez limaçons rouges: lesquels metrez entre deux estamines, ou linge: & prendrez le limon qui cherra, lequel ferez passer encores vne fois par l'estamine, & d'iceluy lauerez voz yeux soit & matin, & vous serez guari.

Pour toute goutte.

Prenez chopine d'huile de chanure, & vn pot de vin blanc, avec deux bônes poignées de l'herbe nommee piepou, & par aucuns, du pas de Lyon, & faites bouillir en vn pot de terre, qui soit neuf, tant que le tout reuienne à la moitié, puis passez le tout par estamine, & de ceste decoction, lauez vous deuant le feu.

Pour estre preserué de peste.

Bouez deux doigts du iust de geneſt deuant deſcuer.

Pour guarir les hemorroydes.

Prenez l'herbe qu'on appelle en Latin *hedera terreſtris*, en François lierre de terre, ou l'herbe terreſtre, & la faites bouillir avec bon vin blanc, & en receuez la fume, la pl^e chaude q^e vous pourrez endurer par la ſelle percee : puis en eſtuez le fondement de ladite herbe la plus chaude que pourrez endurer, & vous ſerez guarý.

Pour faire mourir les cyrons.

Prenez de l'allun, & le deſtrempéz en eue claire, & en lauez les mains.

Pour leurs fendues.

Prenez maſtich mondifié, avec aubins d'œufz, & battez enſemble, puis mettez deſſus.

Pour oſter la gravelle.

Prenez racines de perſil & de fenoil, & en oſtez les cueurs, puis les mettez cuire avec de la rigeliſſe en vn pot de terre, avec de l'eue: de laquelle eue, quand elle aura eſté bouillie, & diminuee juſques à la tierce partie, il en faudra vſer de tiede, ſoir & matin, par pluſieurs fois.

Pour le boyau, qui auale.

Prenez ces petites eſponges qui croiſſent aux eſglâtiens, & les ouurez, & vous

trouuerez dedés aucũs petis verins, lesq̃lz mis dedés vne escuelle d'estain deuiẽdrõc tout en eaue, de laquelle avec autãt de vin blanc, fault vser par neuf ou dix fois.

Contre maladie du costé.

Prenez de la cygue vne bonne poignée, ou deux: & la liez comme vn petit fagot, lequel mettez cuire en l'atre ou dessus pierre, ou tuile chaude, & l'appliquerez chaud sus le mal.

Autrement.

Prenez la racine de brione, autrement dite vigne blanche: & de icelle taillerez des pieces en forme de rostie, & les ferez rostir, & mettez chaudes dessus le mal.

Contre le chancre.

Prenez l'herbe Robert, avec fucilles de nauets, & pilez tout ensemble, avec vn peu de gros sel, puis appliquez le tout souz la gorge, & il vous amendera.

Contre le boyau auallé.

Prenez des pieces de fil eseu, & les faites bouillir, & les appliquez chaudes dessus le boyau.

Contre la collique passion.

Prenez des choux, avec les trõcz, & faites fort bouillir, avec de l'eaue seulement, puis humez chaud ladite decoction, sans qu'il y entre autre chose.

Pour estancher le sang.

Prenez vno fueille de peruenche, & la mettez souz vostre langue, & vous estancherez incontinent.

Pour aller en la selle.

Prenez pour douze deniers de sucre de roses, & le mettez en poudre, puis le mettez avec deux doigts de vin blanc, & le beuvez, & vous serez guari.

Contre chancre.

Faites bouillir de fort vinaigre, duquel lauerez le chancre, puis effuie le mal avec du linge, & le poudrez avec poudre de galle.

Contre la verge en flec.

Prenez ceruse de l'huile rosat avec du iust de pourpier, & meslez tout ensemble, & oingnez le lieu malade.

Autrement.

Cuisez betoine, avec du vin blanc, & lauez souuent.

Autrement.

Faites bouillir en vin blanc de la farine d'orge, & lauez ledit lieu.

Contre mal de teste.

Prenez du mastic avec fleur de febues, & vin blanc, puis incorporez ensemble, & faites fronteau.

Contre tout venin.

Prenez la graine de fenail , & en faites poudre, que burez avec du vin.

Remede contre la goutte.

Prenez mauue, sauge seiche, hiebles, graine de genecre, poudre de poiure, enuiron de chacun demie once , & de vers de terre, huile d'olive, & sain de porceau malle autant , puis mettez le tout bouillir avec l'urine de la personne malade, iusques à la consumption de la moitié, puis le coulez, & de ceste coulure frottez le lieu malade, le plus chaud que vous pourrez.

Contre morsure de Chien.

Prenez pourreaux & en tirez le ius , & du sel blanc pilé ensemble, & en frottez & lauez le lieu malade, & vous guarirez.

Contre tremblement de membres.

Prenez sauge, & la lauez & en mangez tous les iours deuant desjeuner, ou beuez l'eau faite d'icelle en la chapelle.

Contre toute enflure

Prenez ache, fenail, espargoutte , puis faites bouillir ensemble, avec vin blanc, & autant d'eau, & en eschaudez le lieu mesmes, appliquez les herbes dessus , les plus chaudes, que vous pourrez.

Contre eschaudure.

Prenez mauues, & les cuisez en eau tresbien, puis les pilez avec huile de che-

neuis, & faites emplastre dessus le mal.

Contre arseure de feu.

Prenez rapsus barbatus, qu'on appelle en François mollaine, & en mettez des fueilles dessus le mal, deux ou trois fois le iour.

Pour escorchure par froter vn pied contre l'autre, ou semblablement.

Prenez vieilz drappeaux de lin, & les brulez, & la cendre meslez avec huile rosat, & mettez dessus le mal.

Bon onguement pour meurier bosses, apostumes, traire, recuire, & meurer tous fils.

Prenez buglé, espurge, senele menue, consoulde, agrimoine, l'herbe Robert, autant de l'une, comme de l'autre, puis les battez en vn mortier, & les mettez cuire en sain de pourceau frais en vn pot net de terre à petit feu, sans bruler, puis mettez tout dedés vn drapeau, & faites tout passer: puis pnez de ce q sera passé vne pleine escuelle, ou plus, & la mettez en vne netto poille sus le feu, & y mettez vn demy quarteron de cire vierge, par petits morselets, avec autant de suif de mouton, & autant de poix resine, & mouuez tant que tout soit bien incorporé, & meslé ensemble, puis ostez & mettez en boettes.

Eau singuliere pour la veüe.

Prenez verueine, rue, esclaire, & euphrase, & fenoil, & en faites eae en la chapelle, & en lauez voz yeulx, ou en versez soir & matin vn petit dedens.

Pour oster ordure d'entour l'œil.

Prenez deux ou trois grains de toute-bonne, & mettez dedens voz yeulx: & ilz osteront toute l'ordure, qui y sera.

Contre la toux.

Prenez semence d'ache, & d'anis, & pilez ensemble, avec vin & eae, & en menges au soir, & au matin, trois cuillerees, & vous serez guari.

Pour oster vers des oreilles.

Prenez ius d'escorce de noyer, ou l'escorce verde des noix, & mellez avec eae dedens l'oreille, & les vers sortiront.

Contre les manières enflées.

Faites vn tourteau en poisse, qui soit destrempé de ius d'ache, & le mettez chaud dessus.

Contre le mal des dents.

Prenez neuf racines de plâtain, & autant de lancelee, & mettez bouillir ensemble, avec eae, ou vin blanc, & de ce chaud lauez voz dents.

Pour les leures fendues.

Prenez dragagant, & mettez tremper en eae rose, & de ce oingnez les leures.

Contre le mal des oreilles.

Prenez ius de mente, & tiedifiez vn petit, & mettez es oreilles.

Contre les poulx.

Faites cendre de vigne sauuage, & meflez avec huile, & puis oingnez les lieux pouilleux.

Contre sourdeſſe des oreilles.

Prenez du ius de mente, avec de l'huile de lombries, & meſlez tout enſemble, & le mettez tiede en l'oreille.

Contre morſure de chien.

Prenez de la mente & pilez avec ſel, & mettez deſſus la morſure.

Pour oſter les verrues.

Prenez du ſang de ſouris tiede, & frottez les verrues.

Pour boire contre fièvre tierce.

Prenez de la racine de quinte feuille enuiron deux dragmes, & les pilez en vn mortier de marbre, puis faites diſſoudre en trois onces d'eau de roſes, & donnez à boire à ieun.

Contre les verrues.

Prenez aigremoine, du ſel & vinaigre, & pilez enſemble, & de ce frottez les verrues.

Contre fièvres.

Faites faire vn pain de ſeigle pur, du poix de demie liure, & incontinent qu'il

sera tiré hors du four, prenez la mie, & la faites tremper en vinaigre par vne nuit, puis prenez quatre onces de lombrics, ou vers de terre, & quatre liures de l'herbe de quinze feuille, avec sa racine, puis faites le tout distiller & garder pour vostre vser: & si les fleurs sont quartes vous prédrez pour le poiz de cinq onces d'eau de vie, avec deux onces de metridat, & vne once de poudre de racine de enula campana, & meslez toutes ces choses avec les autres, & faites eau par l'allambic, & quand le patient en aura beu il luy faudra frotter l'espine du dos depuis le col iusq's aux fesses.

Contre fleurs tierces.

Prenez de l'ortie griesche, de la tramee ou ceneué, dent de Lyon & de l'escoree moyenne de suz, de chacune vne bonne poignée, pilez tout ensemble avec vne poignée de sel, & vn petit de vinaigre bié fort: puis appliquez sus le poulx des bras & sur la plante des piedz.

Contre la douleur des dents.

Prenez de la racine de iusquiamo, ou hancbane, & la faites cuire en vinaigre & eau rose: puis tenez d'icelle decoction la plus chaude que pourrez en vostre bouche.

A ce mesme.

Faites

Faites bouillir ensemble, en vin, pire-tre, mente, & rue, & tenez chaud en la bouche.

*Pour percer toute apostume, ou bosse
qui ne se peut percer.*

Broyez l'herbe nommee pas de lyon ou piepou avec estrons de pourceau, & liez dessus.

*Pour teindre cheveux, ou poil de quelque
beste qui ne se pourra des teindre.*

Si tu veux teindre en rouge, destrempe poudre d'oreanete & la destrempe en vinaigre. Si tu veux teindre en noir destrépe nelle en huile. Et pour teindre en iaune fais la destremper en salive d'homme, & celle teinture ne se pourra deffaire, sinon par iust de pommes d'orenges.

Contre fistules.

Prenez Betoine & pilez, & mettez du iust dedens la fistule, & faites emplastre de ladite herbe pilée dessus.

Contre sieure quotidienne.

Donne au patient à l'heure de l'exces deux dragmes de betoine, & vne dragme de plantain, avec de l'eau chaude, & tu verras bon effect.

*Pour tirer os, fer, bois, ou autre chose
de dedens le corps,*

Prenez racine de fougere avec escorce

de racine de fenoil, & vn petit de miel, & faictes tout bouillir ensemble puis coulez & gardez pour vostre vsr.

Contre les punaises.

Prenez l'eau ou lapins seront adoucis, & jettez au lieu ou seront les punaises.

Contre les rubis de la face.

Prenez des lentilles cuites & mondees de leurs escorces, puis les mettez avec iust de pomme de grenade, & en faictes petites emplâtres, ou en frottez le lieu ou seront lesdits rubis.

Pour faire cheoir dents pourries.

Prenez de la gôme de meurier, & en faictes vne petite calette enuiron la dēt q̄ voudrez faire cheoir & elle chettra sās douleur

Pour oster & faire mourir toutes dertres.

Crache en la main & y adioustes vn peu de sel, & en frotte la dertre: puis la gratte de quelque chose: puis près vne noix vieille, & du iust d'icelle frotte ladite dertre & elle guarira.

Autrement.

Prenez sel armoniac en poudre, & melez avec sacon, & en oingnez les dertres.

Contre douleur de la teste.

Prenez l'herbe de quitesfeuille, & la broycz, puis frottez le frōt & la teste de son iust.

Pour blanchir les dents.

Faites poudre de os de seiche & la mettez dedens vn mouchoir duquel frottez voz dents.

Pour ôster les lentilles du visage.

Faites cuire rys avec eaue, & d'icelle lavez la face.

Contre les pieds enfléz.

Prenez des fucilles de suz, & faites cuire avec eaue & sel, puis chaudiez les pieds.

Contre la douleur de teste.

Prens du serpollet ou pouliot, & en tire du iust lequel tu melleras avec vn petit d'huile rosât & le tiers de vinaigre, & de ce oindras les temples du malade.

Contre douleur de nerfs.

Soit fait lauemēt ou decoction de guy-mauues & fougere: puis soit fait emplastre desdites choses sus le mal.

Pour faire cesser le hoquet, ou sanglet.

Prenez l'herbe gariofilata ou sauemōde, & la tenez en vostre bouche.

Baume souverain contre toute playe.

Prenez vne once d'huile de petrole, demie once de terbentine lauee & autant d'huile d'olif, deux dragmes de mastic avec vn scrupule de mirrhe: puis mesleztout ensemble, & soit fait baume à petit feu.

Contre les verrues.

Prenez vne dragme de enforbe avec v-

ne demie dragme de lie de vin, & vne dragme d'huile de laurier, & d'huile commun autant, & faites onguement,

Contre la toux.

Prenez du iust d'ortie, & le meslez avec vn petit de vin odoriferant & beuvez.

Contre la grosse verole, & pour en estre guéri dedens huit iours pour le plus tard.

Prenez deux onces d'huile de laurier, demie once d'huile de petrole, demie once d'huile d'aspic, deux dragmes d'argent vif, & demie liure de sain de pourceau, avec deux onces de vermillon : & notez qu'il fault d'esteindre le vif argent de blanc d'œuf & de salive d'homme deuant delicuner . Puis faites fondre vostre sain de pourceau, & mettez voz huiles dedens la poisse ou sera fondu ledit sain, & puis quand il aura bien bouilli mettez vostre vermillon bien broyé dedens, & mouuez tresbien tant que tout soit bien meslé : puis prenez de cest onguement & gardez en boettes. Ce fait faites coucher le malade en vn bó liét bien chaud, & luy baillez draps frais lesquelz ne changerez pour l'espace de huit iours, puis oignez le patient de cest onguement deux fois le iour au soir & matin, par toutes les iointures de son corps, & vn peu au frôt, & à la plâ-

re des piedz . Mais notez que deuant que facez ce que dit est, qu'il fault faire prendre vn clistere audit patient ou autre medecine laxative & purgative. Et s'il luy vient mal à la bouche , faites luy lauer sa bouche & gargariser de verius tiede. Et si vous voyez que ledit mal de bouche soit fort grand, il faudra prendre l'herbe nommee en Latin *vermicularis* , & en François teste de souris , puis la piler avec du sel & luy donner le iust à lauer sa bouche & à gargariser & il sen trouuera bien .

Contre la goutte.

Prenez demie once de iust de guimauues & demie once d'huile d'aspic & meliez tout ensemble & en frottez le patient aupres le feu.

Contre la chande pisse.

Prenez de la terbentine de Venise bien laugee en eau de fontaine, puis en faites pillules que prendrez au coucher.

Autrement.

Prenez aigremoine & la faites cuire en vin blanc, & d'icelle composition beuvez au soir & au matin.

Pour les fieures.

Prenez la racine de valeriane masser & la pilez avec du sel, puis la liez aux poux des bras.

Autrement.

Prenez dela celidoine ou esclaire, & la pilez tresbien en vn mortier, puis prenez vne bonne pongnee de suie de four & la pilez encore avec ladite esclaire, tât qu'elle soit bien meslée, puis mettez le tout sus le poulx des deulx bras.

Autrement pour toutes fieures.

Prenez plantain, ortie griefche, bourso de pasteur, & reuillé matin que les apoticares appellent *stimuli coronati*, de toutes tant qu'il vous plaira, & pilez bien ensemble, & l'appliquez comme dit est.

Contre fistule.

Pilez l'herbe *alleluya*, en François pain à coucou, & mettez du iust dedés la fistule.

Pour des douleurs de nerfs ou de iointures.

Prenez quintefueille & pilez avec vieille gresse, & faites emplastre dessus le mal.

Contre puanteur & pourriture de gencives.

Pilez ladite herbe seule, & du iust frottez ou lavez tiedement les ioues.

Pour se faire seigner du nez.

Prenez l'herbe mille folium en Latin, & en François mille fueille, & de ladite herbe ou de son iust mettez dedens les narilles.

Contre morsure de serpent.

Pilez quinte fucille , & beuvez le iust d'icelle.

Pour enflures de genitoirts.

Prenez le pied de coulon , & de petite laictue verde, puis pilez tout ensemble, & mettez dessus.

Contre la gravelle.

Prenez anis & semences de persil , & mettez avec du sucre, & mengez au vespre & au matin.

Pour tirer fer ou espine du corps.

Prenez auoine & la pilez avec oing de pourceau, & mettez en forme d'emplastre sus le lieu blessé.

Autrement.

La fiente d'oye seule , mise sus le mal, tire tout ce qui est dedens le corps.

Pour oster la rougeur des yeulx.

Prenez armoise & la bouillez en vne poisse d'arain, avec vin blanc, puis gardez ceste decoction de laquelle lauerez voz yeux, mais gardez qu'il n'en entre dedés.

Contre toute obscurité des yeulx.

Prenez deux pongnees de fenail , vne pongnee de verusaine, & demie pongnee de celidoine , & le quart d'une pongnee de rue, & faites bouillir en eau, & d'icelle eau lauez voz yeulx.

Pour faire be aux cheueux.

Prenez tât que voudrez de fueilles d'or, & les dissouldez, & destrempez sus vne pierre de marbre, avec de l'eau forte, & oingnez voz cheueux.

Autrement.

Prenez de litarge d'or, & d'alun, tous deux ensemble, demie liure, puis y adioustez de miel, & saffian ensemble quatre onces, & faites distiller en la chapelle, & de l'eau lauez vostre teste.

Contre douleur des dents venue de froid.

Prenez deux onces de fort vinaigre, demie once de miel, puis prenez clou de girofle, hysope, & piretre, de chacû vne dragme, faites bouillir tout ensemble, & en lavez vostre bouche, le tenant dedens le plus longuement & chaustement que le pourrez endurer.

Pour embellir la face.

Prenez des rasures de corne de beuf, & meslez lesdites rasures, avec de l'huile d'armendes douces, & laissez tremper, & lavez vostre visage.

Contre morsure de serpens.

Prenez de la graine de moustarde deux onces, puis faites concasser ladite graine, & mettez avec six onces de vinaigre, puis faites distiller & lavez la morsure.

Pour homme qui ha perdu le sent.

Prenez sémence de laitue , & grosses noix , autant de l'un comme de l'autre , & de ce faites poudre , faites oppiate , & que le patient en prenne deux dragmes par chacun matin.

Pour embellir les ongles.

Prenez gomme appelée serapin , & mezlez avec poudre d'orpinot , & soit fait onguement , duquel frotterez voz ongles.

Contre morsure de chien.

Soit oignon broyé avec miel & vinaigre , & mettez dessus.

A ce mesme.

Soit oignon cuit , avec miel & vin , & soit appliqué dessus.

Pour les piedz enfléz.

Prenez oignons , & les broyez , & mettez dessus.

Autrement.

Prenez iust d'oignons , & mezlez avec grésle de geline , & frottez de ce les piedz ,

Pour garantir vn malade du hault mal

Prenez ratine de peoine , & luy pendez au col.

Contre enfluxe de membres,

& paralysie.

Prenez fueilles de enula campana , & liez dessus souuent.

Pour blanchir les mains.

Prenez ortie, & les faites bouillir, & en tirez le iust, duquel lauez souuent voz mains.

Contre les cyrons.

Prenez iust de melice, ou de mente, & lauez voz mains.

Autrement.

Prenez du soufre, & mettez sus les charbons, & frottez voz mains à la fumee.

Pour celuy la qui a la parole perdue.

Prenez iust de meure, & destrempez dedens du clou de girofle, & mettez avec vn petit de vin, & donnez luy à boire.

Pour faire les dens blanches.

Prenez des branches d'ortie, & les faites bruler, & de la cédre frottez voz dents.

Contre la toux vieille & ancienne.

Prenez de la gomme de cerisier, & la destrempez en vin, puis la beuvez.

Contre la gratelle des petits enfans.

Prenez de la gomme de prunier, & dissoudez en vinaigre, & en frottez la gratelle d'icelle mixtion.

Contre poux & lentes.

Prenez brande ou bruiere, & la faites bouillir en vin, & d'icelle lauez les lieux pouilleux, ou lenteux.

Pour faire bonne veüe.

Prenez pommes pourries, pain de seigle, & roses, & faites distiller ensemble, & de ce vsez en maniere de collyre.

Contre les verrues.

Prenez poudre du bois de sauenier, & mettez dessus.

Pour multiplier les cheveux.

Soit la racine de rozeau conuassée, & cuite en lessiue, de laquelle soit lauce la teste.

Contre hydropisie.

Prenez racine de hyebles, & la faites cuire avec vin blanc, & donnez à boire au patient.





La seconde partie de ce liure, contenant plusieurs choses, dignes d'estre sceues, par gens d'esprit.

Pour faire qu'un poulet qui semblera rosti au plat, s'en fuira, quand on le voudra toucher.



Rens semēce de fenoi & de pavot blanc, & luy faites mēger, & il s'endormira : ostez luy les plumes, & il ne sentira riē, puis prenez le moyeu d'un œuf, & l'en frotez par tout, puis le mettez deuāt le feu, tāt qu'il soit sec, puis luy faites boire vn petit d'eau tiede, & il se leuera, puis prenez dudit pavot blāc & de lamidon, & luy faites māger, puis mettez le au Soleil, par vne heure & demie, & quand il y aura esté, mettez le au plat, & vous verrez que quand on le voudra toucher, il chantera & s'enfuira.

Pour faire reuenir la veüe à vn poulet, auquel aurez creuē les yeulx.

Prenez pilosella, en François piloselle
pelluetre ou barbette, & la pilez bien, puis
liez sus les yeux dudit poulet.

*Pour faire leur & croistre du persil
en deux ou trois heures.*

Prenez de l'eau de vie, dedens laquelle
mettrez tremper de la graine du persil
par vne heure, & elle sera germée, puis iet-
tez ladite semence; car elle ne vault plus
rien, pource que toute la force est demou-
ree en ladite eau, laquelle prendrez, & la
ietterez sus des cendres qui seront criblées
ou passées, & vo^s verrez que le persil croi-
stra incontinent.

*Pour faire sembler que gens ayent testes,
comme de gens morts.*

Prenez de la cire vierge, & mettez en
fiés de cheval par neuf iours, & neuf nuits,
& vous trouuerez en ladite cire petits
vers, lesquels pilerez avec ladite cire, &
en ferez vne chandelle, laquelle allume-
rez, la ou il n'y aura autre lumière.

Pour n'estre point yuré.

Boy au matin vn beau verre d'eau clai-
re deuant manger.

Autrement.

Mange au matin de la graine de fenoil
ou des amandes douces, & tu t'en trouue-
ras bien.

Pour desenyurer vn homme ou femme.

Faites tremper les genitoires de l'homme yure en vinaigre: & si c'est femme, faites luy tremper ses mamelles, dedens le dit vinaigre.

Pour faire bonne rosette pour escrire.

Prenez deux onces de brésil, & autant de vinaigre qui suffira pour remplir vn petit pot, puis prenez vne once d'alun de roche, & deux dragmes d'os de seiche, puis faites le tout bouillir par demie heure, & en la fin, mettez y demie once de gomme d'arabic, & quelque petit de laiçt de figuer, si vous estes en lieu ou vous en puissiez recouurer, ou n'en mettez point si vous voulez.

*Pour faire peter & esterner
tout ensemble.*

Prenez vn petit de bois d'aloës, avec des œuf de formis, & pilez tout ensemble, & mettez avec du vin, ou du brouet, que ferez vser à qui vous voudrez.

Pour oster le poil.

Prends orpiment, & chaulx vive de chacun vne once, & vne once de litarge d'argent, melle tout ensemble, avecque l'urine d'homme, & de tout ce, frotte le lieu duquel tu voudras que le poil parte.

Appast pour enyurer le poisson.

Prenez des coques de leuât demie once, quatre onces de fourmage vieil, vn petit de gresse de mouton, vne dragmē de graine de laurier, semēce de chanure, iusquiamme, ache, de tout ensemble deux dragmes, avec tant de miel qu'il suffise, & faites ap-past duquel donnerez aux poissons.

Pour faire les cheueux longs & espais.

Prenez des fueilles & racine de patience avec de l'orge entiere, & mettez en la lessive, de laquelle lauerez la teste.

Pour porter feu en la main sans se bruler.

Prenez deux onces de ius de palma Christi, demi once d'alun de plume, & vn blāc d'œuf, & faites oignemēt pour frottervoz maīs, puis pnez hardimēt charbōs allumez en la main, car vous ne vo^s brulerez point.

Pour faire lettre d'or.

Prenez de l'arsenic rouge avec de l'orpi-ment, tant que voudrez, & en faites pou-dre subtile, que vous destremperez avec siel de thoreau, & puis escriuez.

Pour faire azur.

Prenez quatre once de verd de gris, & trois onces de chaulx viue, avec vne once de croye blāche, & vne once de sel armo-niac, toutes ces choses soient subtilement puluerisees, & mises en fiēs par vingt cinq iours, & vous aurez azur.

Pour faire vin blanc vermeil.

Prenez du vin blanc, & le mettez en un pot ou aura cuit du miel, & il deviendra vermeil.

Pour prendre Serpens à la main, qui ne feront point de mal.

Oingnez voz mains du ius d'une herbe, qui s'appelle en Latin hypericon, & en François mille pertuis.

Pour prendre pigeons en la main.

Prenez vne once de commun, sang de dragon, coque de leuant, & du miel, de tout ensemble vne once & demie, & demi once d'une drogue qu'on appelle en Latin frumentū plūduye, & faites pastes pour donner aux pigeons.

Pour faire assembler toutes les puces d'une maison en quelque lieu.

Prenez de la gresse de renard, ou du lait d'asneffe, & en frottés le lieu auquel vous voudrez qu'elles viennent, & elles s'y assembleront toutes.

Pour escrire lettres d'or sus pierre.

Prenez pierre de touche, & frottez la d'or, puis prenez le blanc d'un œuf, & du vinaigre, & mellez ensemble, & lavez la-dite pierre de cela, & en escriuez.

Pour faire assembler tous les poissons d'une riuere.

Prenez

Prenez vne fiole de voirre, & mettez dedens vne chandelle ardâte, puis estoupez ladite fiole de terre à potier, & la descendez dedens l'aue, & tous les poissous se y assembleront.

Pour faire monter vn œuf iusques au bout d'une lance.

Prenez vn œuf, & le vuidez totalement de tout ce qui est dedens par vn petit trou que ferez ou deux, puis ayez de la rosee du mois de may, & en emplissent ledit œuf, lequel estoupperez de cyre: puis quâd le Soleil lura fort, mettez ledit œuf au pied de ladite lâce, & vous verrez qu'il montera à mont.

Pour faire croistre du persil bien tost.

Prenez de la terre à potier, & la mettez dedens le four d'un Boulenger, quand elle y aura esté quelque temps, retirez la, & semez la graine de persil dessus, & il sera tost leué & creu.

Pour garder homme ou femme de dormir.

Mettez souz son cheuet les yeux, ou le cœur d'un rosignol.

Pour faire sembler que les gens ayent testes d'asnes.

Prenez la ceruelle d'un asne, & meslez avec huile d'oliue, & allumez les en vne

lâpe au lieu ou il n'y aura autre lumjere.

Pour auoir fen au Soleil.

Prenez vn vaisseau de verre, ou les Medecins ont accoustumé de iuger les vrines, & mettez du sel dedens, puis le pendez au au Soleil par quelque temps, tenez au contraire dudit vaisseau du linge bien sec, & il brulera bien clairement.

Pour congnostre si vn malade

mourra, ou non.

Prenez de son vrine, & du laiët d'une femme allectante enfant masse, & meslez ensemble, & si vous voyez que le laiët se caille, il viura, sinon il mourra.

*Pour faire que tous oiseaux naissent,
ou eschoent blancs.*

Prenez les œufs de quelque oiseau que voudrez, & les mettez par deux iours tréper en miel, puis les remettez au nid, & vous verrez l'experience.

*Pour faire que aurez, poulets de quelque
couleur de plumage que voudrez.*

Prenez les œufs que voulez bailler à couuer à la poule, & les peignez de quelque couleur que voudrez, & vous verrez que les poulets seront de la couleur que aurez peints lesdits œufs.

*Pour auoir moissons ou passe-
reaux blancs.*

Prenez petis moissons quand ils n'ont encores point de plume, & les frottez, & oingnez de huile de lin, & les remettez dedens le nid.

Pour faire corbeaux blancs.

Prenez de la gresse de chat, & meslez avec vis argent, puis en frottez les œufs d'un corbeau.

Pour faire qu'il semble que vn denier boine plein vn verre d'eau.

Prenez plein verre de rosee de mois de May & mettez vn denier dedens ledit verre; puis mettez au Soleil, & vous verrez merueilles.

Pour faire que vn pommier qui porte pommes sures, les porte douces.

Faites vn trou au pommier, & l'emplissez de miel, puis restoupez ledit trou, & vous verrez l'experience.

Pour faire vn œuf dur comme vne pierre.

Mets vn œuf dedens du fort vinaigre par trois iours, & trois nuits, puis l'oste, & les mets en terre en quelque lieu ou le Soleil ne luise point, par tât de temps qu'il est: & il sera dur comme vne pierre.

Pour faire que vn Chien demeure petit.

Faites le passer, quand il sera encores petit par l'anneau qui est communément

aux portes des Eglises, duquel on ferme la porte, & il demeurera tousiours de telle grandeur.

Pour faire sortir conins hors de leur terrier.

Prenez feu & soufre, & mettez au pertuis du terrier, & ils sortiront.

Pour faire demourer Serpens en vn lieu, sans faire mal.

Dictes ces vers, Super aspidem, & basiliscum ambulabis: & conculcabis leonem, & draconem.

Pour faire sortir vne piece de bois hors du feu.

Prenez vif argent, & le faites tant tremper en fort vinaigre, que tout deuienne noir, puis frottez la piece de bois, que vo^z voudrez, & elle sortira du feu.

Pour faire dancier & sauter vn chien.

Mettez deuant luy les genitoires d'une bellete, & il sautera & dâcera à merueilles.

*Pour effacer encre sus tout par-
chemin, & papier.*

Prenez deux dragmes de cher de Lieure brulee & puluerisee bien subtilement, avec quatre dragmes de chaux viue, pareillement bien puluerisee, meslez tout ensemble, & mettez sus papier ou parchemin: & le laissez par vn iour & vne nuit, vous trouuerez tout effacé.

*Pour faire eſcriture que on ne puiſſe lire,
que trempet en vinaigre.*

Eſcriuez de laiſt d'eſpurge.

*Pour autre que on ne peut lire,
que chauffee au ſeu.*

Prenez du ſel armoniac, & le deſtrempiez avec eue, & en eſcriuez.

*Pour autre qu'on ne peut lire, que
trempet en eue.*

Eſcriuez de ius de titimale, ou avec de l'allun deſſait en eue.

*Pour autre qui ne ſe peut lire, que
frottee d'huile de noix.*

Eſcriuez de leſſine faite des cendres du bois de Figuier.

*Pour autre qui ne ſe peut lire, que frottee
de charbon, ou autre choſe, qui marque.*

Eſcriuez de laiſt de vache, ou de cheure.

*Pour faire reuenir vne beſte à
la maiſon.*

Prenez vn oignó, nommé en Latin ſcilla, & en frottez le front de la dite beſte.

Pour faire que vn coq ne chante plus.

Il fault oindre ſa creſte, & ſa teſte d'huile.

*Pour faire que vn coq ne pourra rien
faire aux poules.*

Oingnez le cul & le ventre dudit coq d'huile commune.

Pour faire que quelqu'un se prendra par les cheveux comme homme enragé.

Donnez luy à manger du cerueau d'aigle , & il ne cessera de tirer iusques à ce que on le prenne, & qu'il soit pigté.

Pour faire dire à un homme son secret en dormant.

Prenez le cœur , & le dextre pied d'un chahum , & le mettez sus le dormant , & l'interrogez, & il vous respondra.

Pour faire un verre mol.

Prenez du sang tiede de bouc , avec du vinaigre , & ius de semillon , & faites bouillir le verre en vne poisse , ou bassin , avec toutes ces choses, & il sera mol.

Pour congnostre si filles sont pucelles.

Faites bruler le cœur d'un Gay au lieu cu vous voudrez esprouuer , & là ou seront filles : & celles qui seront pucelles pifferont sous elles.

Pour faire porter à un cerisier cerises sans noyan.

Coupez un ieune cerisier à deux pieds pres de la racine , puis le fendez en deux droitement iusques à la racine , & ostez toute la mouelle de dedens , & faites (s'il est possible) qu'il n'en demeure point , puis r'assemblez les deux parties , avec argille , ou croye , ou poudre de tuiles , &

quand il sera rassemblée, & repris il le fauldra enter avec branches qui n'aurent encores porté, & vous aurez cerises sans noyau.

*Pour faire lettre de quelque couleur
de metal, que vous voudrez.*

Prenez du cristal en poudre bié deliée, & le meslez & defaites avec vn, ou plusieurs aubins de œufs, & gomme Arabique, puis escriuez & laissez seicher, & quâd l'escriture sera seichè frottez les lettres d'or, ou d'argent, d'estain, ou de cuire, selon vostre fantasie, & vous aurez lettres de quelque couleur de metal, que vous voudrez.

Pour sembler estre tousiours ieune.

Cueillez fleur de suz deuant la saint Iean, & en mengez soir & matin.

Pour faire sortir feu d'une riuiera.

Prenez vn œuf & le vuidez, puis l'emplissez de chaulx vive, & de soufre vis, & estouppez le trou de cyre, puis le mettez dedens l'eau.

*Pour faire croistre vne perle au ventre
d'une oye, ou oison.*

Prenez poudre de perles, & l'enuelopez en parchemin, & le faites menger à loiso, & la perle se formera dedés levêtre de loison, dedés l'espace de trois heures.

*Pour acquerir amour d'homme,
ou de femme.*

Prenez deux anneaux d'or ou d'argët, & les mettez au nid des hirôdelles, & les y laissez par neuf iours : puis les ostez, & en donnez vn à qui voudrez, & retenez l'autre pour vous.

Pour faire mourir des pigeons.

Prenez du froment, & le faites tremper en fiel de bœuf, & donnez à manger aux pigeons, & ilz mourront.

*Paste pour nourrir vn Rossignol en
cage, tant en yuer, que en esté.*

Prenez six onces de chiches, & six onces d'amandes douces, avec quatre onces de beurre frais, & trois moyeux d'œufs frais, trois onces de miel espame, avec vne dragme de saffran, & de tout ce faites paste pour ledit Rossignol.

Pour faire eau à graver sus le fer.

Prenez vinaigre dedens lequel mettez couperose, & de verd de gris avec vn petit de sel armoniac, & laissez sus le feu par vn iour seulement.

*Pour r'assembler quelque beau plat
de terre, cassé.*

Prenez de l'encens, & mastic de chacun demi once, de boliarmenic, & de chaulx viue de chacun vn quart d'once, & faites

poudre de tout, laquelle destrempererez avec aubins d'œufs, puis en coulez les pieces, & laissez seicher.

Appast pour faire mourir les rats.

Prenez sublimé, reagal, & arcenic de tout demi once, vint figues grasses, vne once d'auelines que ferez rostir, douze grosses noix, & demi liure de leuain de fromêt, & de gresse de porceau vne liure deux onces, avec vn peu de miel pour incorporer les especes dessusdites, & faites petites pelotes pour donner aux Rats.

Pour auoir plaisante parole.

Allez au nid de l'hironde, quand elle ha des petis, ausquelz vous creuerez les yeux, & les laisserez dedens le nid, puis retournez quatre iours apres, & vous trouuerez vne pierre, laquelle prendrez, & la mettrez en vostre bouche, puis parlez à qui vous voudrez.

*Pour faire reprendre chair de bœuf
couppee en pieces.*

Prenez racine de la grande consoude, & en mettez enuiron deux, ou trois onces cuire au pot avec la chair.

Pour garder le pot de bouillir.

Prenez de la poudre des os d'vn cheual, & mettez sus le bost du pot tout à lentour.

*Pour faire que la chair qui est au pot
ne cuise point.*

Prenez vn morceau de plomb & le mettez dedens le pot deuant qu'il ayt bouilli, & le laissez dedens.

Pour prendre les taulpes.

Prenez oignons, ou porreaux, & mettez au trou de la taulpe, & elle sortira dehors.

*Pour faire dormir quelqu'un, iusques
à ce qu'il se plaira.*

Prenez aigremoine, & mente, & mettez sous la teste de celuy que voudrez faire dormir, & s'il ne dort il dormira, & s'il dort il n'esueillera iusques à ce, que lesdites herbes luy soient oïstees.

Pour oster la fièvre quarte.

Prenez les rongnures de voz ongles, tât des mains, que des pieds, & les mettez en quelque petit drapeau, ou bourslette de toile, ou d'autre chose qu'il vous plaira, & liez le tout au col d'une anguille viue, laquelle remettrez dedens de l'eau, & vous serez guarì.

Pour faire que deux bestes discordables à la charrue, ou au ioug, soient accordables ensemble.

Prenez vne herbe appellee lysimache, ou cornette, & la liez à la charrue, ou au ioug, & vous verrez l'experience.

Pour faire vermillon.

prenez deux liures de soufre, & le faites fondre, & mettez dedens deux liures de mercure, & si cele matiere s'enflâme couvrez la bien gentement, que l'air ne passe dedens le pot, puis mettez le tout, quelque temps apres dedens vn pot plombé au feu par l'espace de vingt quatre heures, vous aurez bon vermillon.

Pour estre craint de ses ennemis.

Prenez la langue d'une couleuvre, & la portez sus vous.

Pour garder que anfs ne puissent cuire en l'eau ou ils seront.

Mettez de la lessive dedens le pot ou ils sont, & ils ne cuiront point.

Pour prendre conills.

Ayez premierement vn conuil vis, & l'ouurez, & en prenez les pans du foye ou tient le fiel avec du sang d'entour le cœur, & une partie des petis boyaux, faites tout seicher en poudre, & prenez d'icelle, & mettez au lieu ou aurót esté les cónills: & viendrót bien tost apres, quád ils aurót senti ladite poudre, & se frapperót la museau contre terre: côme tous estourdis, & les pourrez facilement prendre.

Pour faire combattre gens à table.

Prenez les quatre pieds d'une taulpe, & les mettez dessous la nappe deuant ceux

que voudrez faire battre, & vous verrez beau ieu.

Pour faire que chiens n'abbayent plus.

Prenez vne belette viue, & luy coupez la queue, & la laissez aller, puis liez ladite queue au col d'un chien, & il n'abbayera tant qu'il l'aura liee.

Pour faire que quelque beste, ou oiseau semble estre mort, lequel pourtant ne le sera pas

Prenez semence de pavot avec la lague d'un chien: & de tout faites poudre, & faites menger à ladite beste, ou oiseau.

Pour faire qu'il semblera, que vn oiseau, ou beste peinte crie.

Prenez vne raine, ou grenouille, & faites vn pertuis en la paroy, & la mettez dedés, puis attachez vostre beste, ou oiseau peint devant le trou, & quand vous voudrez quelle crie, mettez la chandelle au deuât.

Pour congnostre si homme, ou femme est ladre.

Prenez de son sang, & le iettez en belle eau claire, & si ledit sang va au fonds, il n'est point ladre: mais si ledit sang nage dessus leau il sera trouué ladre.

Pour congnostre si vne fille est vierge.

Prenez du bois daloës, & faites poudre, laquelle appliquerez en son boire, ou méger, & si elle est vierge, elle pissera in-

continent.

Pour donner couleur au cniart,

& faire sembler or.

Prenez fiel dun ieune veau, & len frottez, & laissez seicher au Soleil.

Pour faire que vne chandelle

se allumera en leau.

Prènez trois liures de cire, vne once de soufre vis, deux onces de chaulx viue, vne once d'huile de petrolle, deux onces de terbentine, deux onces de sel armoniac, demi once de camphre, incorporez ensemble, & faites chandelle, laquelle se allumera, & brulera aussi bié en l'eau, que ferayne chandelle de suif de mouton dehors l'eau.

Pour deslier vn homme, qui seroit prins

d'amour de quelque femme.

Prenez mercuriale, & la liez à vostre bras fenestre, & si quelq femme vo^s auoit surprins de son amour, vous serez désslié.

Pour se faire suiure à quelque p^sonne, ou beste.

Prenez de la ceruelle d'un corbeau, & la donnez à manger à qui vous voudrez, & vous verres merueilles.

Pour faire dire le secret à vne femme.

Prenez le cœur d'un corbeau, & le mettez sus l'estomach de la femme, & l'interrogez, & elle vous respondra à tout ce

que demanderez.

*Pour faire que mammelles de
femme ne croissent plus.*

Prenez siente de liure, & la deffaites avec vin blanc, & l'appliquez dessus les mammelles par plusieurs fois.

Pour faire apparoir grãde quãtité de serpens.

Prenez la grande serpentine, avec tressile, & la mettez par quinze iours au fumier, & vous trouuerez petis serpens rouges, desquels ferez poudre, & d'icelle poudre mettrez en vne lampe, avec de l'huile de lin, puis allumez vostre lampe, au lieu ou il n'y aura d'autre lumiere.

Pour faire poudre à canon.

Prés six liures de salpestre, vne liure de soufre, vne liure de charbõ de saulx. Chacune desdites parties soit puluerisee seule tressubtilemẽt, puis soiẽt meslees ensemble, en les arrosãt d'eauẽ ardãte, & qu'elles soiẽt pilees p deux, ou trois heures, puis seichees au Soleil, & vo^s aurez bõne poudre.

Autrement.

Prends sept liures de salpestre, vne liure de charbon de saulx, vne liure de soufre, & fais poudre bien subtile.

Autrement.

Prẽns sel nitre cinq onces, vne liure de soufre, liure & demi de charbõ de saulx,

messe ensemble: & fais poudre subtile, laquelle arroseras d'eau de vie, puis la laisse seicher.

Autrement pour faire poudre à Canon.

Prends quatre onces de boliarmenic, dix onces de soufre, deux onces de charbon de saulx, vne dragme de cāphre, fais poudre, laquelle arroseras de eau forte, quād elle sera bien pilee, puis laisse seicher.

Bonne poudre à Canon.

Prends trois parties de sel nitre, vne partie de soufre, & vne partie de charbon de saulx, pile tout bien menu, & passe par vn sas, puis arroses le tout de fort vinaigre: & le laisse seicher.

Tu prendras donc (amiable Lecteur) ce petit Liure de bon cœur, lequel nous t'auons translaté du vulgaire lāgage Italien en Frāçois, pour l'vtilité du peuple, & pour la recreatiō des gés de bon esprit. Te priant si par cas d'auenture tu faillois à esprouuer aucunes des receptes cy mises, que n'imputes estre la faulte de L'auteur, deuant que tu ayes bien considéré les choses, & si tu as gardé la droite proportion des drogues mises en icelles.



LA MEDECINE DE
MAISTRE GRIMACHE,
avec plusieurs receptes & reme-
des contre plusieurs & diuerſes
maladies , toutes vrayes & ap-
prouuees.

*Premierement, pour n'auoir
iamais pourceté.*



Our n'auoir iamais pourceté,
(Sans enquerir d'autre cōſeil)
il fault que amassez en eſté:
Plein grenier d'eſc^s au ſoleil:
Après vous pourrez ſanſ traueil
En yuer menger la graſſe oye,
Et dormir quand aurez ſommeil
En paix, & recouurer monnoye.

Pour n'auoir point faulte d'argent.

En yuer durant qu'il faiſt beau,
Par vn temps ſec & pluieux,
Empliſſez moy vn bon gros tonneau
De beaux teſtons, & d'eſcus vieux:

Cela

Cela fait, soyez curieux,
De les despendre par mesure:
Et ie vous promets qu'en tout lieux
Il ne vous faudra tant qu'il dure.

Pour n'auoir iamaïs faim.

Si vous auez peur d'auoir faim,
Sans attendre grand n'y petis,
Mengez pour quinze solz de pain
Deuant qu'ayez point d'appetiz,
Puis si quelqu'un vient qui rossi
Quelque chapon ou poulle grasse,
Mengez les, si vous aduerti,
Deuant qu'ayez faim longue espace.

Pour n'auoir iamaïs soif.

Tant en yuer comme en esté,
Pour auoir le gosier plus frais,
Il fault sans contrarieté,
Boire souuent, & à longs traicts,
Et auoir tousiours le vin pres,
Bon de saueur, & de couleur:
Et retenez pour tout expres,
Qu'il vault mieux boire du meilleur.

Pour n'auoir iamaïs chaud.

En esté quelque chaud qu'il face,
Si vous redoutez la chaleur,
Garder vn plein tonneau de glace,
Des l'yuer de blanche couleur,
Et vous mettez sans auoir peur,
La dedens sans vous remuer:

Et je vous iure de bon cœur,
Que garde n'aurez de fuër.

Pour n'avoir jamais froid.

Si vous avez peur d'avoir froid,
Sans enquerir d'autre raison,
Faites bastir souz quelque toiet,
En vn four chaud vne maison,
Et vous tenez toute saison,
La dedens sans sortir dehors:
Et sans bruler bois ny tison,
Vous n'aurez jamais froid au corps.

*Pour n'estre point mouillé quand
on va dehors.*

Si vous voyez l'arc pers ou verd,
Ou le temps noir comme vne meure,
Mettez vous soudain à couvert
Deuant qu'il pleuve vne bonne heure,
Et faites là vostre demeure.
Jusques à ce que le temps soit beau:
Et pour certain ie vous assure,
Que vous n'aurez la goutte d'eau.

*Pour n'estre point tué en
bataille.*

En quelque part que debat aille,
Gardez vous bien que par expès
Vous n'approchez de la bataille,
Qu'à trente lieües au plus pres:
Ou que vous n'y allez qu'apres,
Que tous les coups seront ruez

Et si voz gens n'ont fort longs traicts,
Jamais vous n'y ferez tuez.

Pour auoir bon marché de vin.

Ainsi que ma dit vn deuin,
Qui ne voudroit point fouruoyer,
Pour auoir bon marché de vin,
Il ne vous en fault rien payer,
Aussi pour en bien effayer,
Beuvez en quinze ou seize fois,
Tant qu'il vous face larmoyer:
Voyla tout ainsi que i'en fais.

*Pour garder les chiens de vous
mordre.*

Premier qu'entrer en vn village,
Sans enquerir autres moyens,
Enuoyez homme qui soit sage,
Pour bien amuser les chiens:
Cela fait ne les doutez riens:
Car si bien sont amuselez,
Tenez vous seurs que ie soustiens,
Que ia n'en ferez affollez.

*Pour garder que les oyes ne vous
becquent.*

Si vous redoutez les batailles
Des oyes, faites leur bouter
Les testes en belles bouteilles
Que ne les puissent pas oster:
En apres s'ilz veulent iouster,
Laissez les iouster là dedens:

Car de fait vous pouuez noter,
Que garde n'aurez de leurs dens.

*Pour garder les puce de vous
mordre.*

Si des puce crainguez les mors,
Vous qui auez blanche tetine,
Prenez les moy toutes au corps,
Et mettez en vne botine:
Puis leur mettez de turbentine
Aufsi gros qu'un pois en la bouche:
Et ie paieray pinte & chopine,
Si de trois iours puce vous touche.

*Pour garder les poux de
mordre.*

Si de mordre voulez garder
Les poux, ainsi comme ie cuides:
Faites les moy trestous brider
Comme cheuaux, de bonnes brides:
Cela fait, ayez bonnes guides
Pour les abbruuer d'une tire,
Et s'ilz n'ont les ventres fort vuides,
Vous les ferez creuer de rire.

*Pour soy chauffer tout houzé
sans bruler ses bottes.*

Pour garder de bruler voz bottes,
Quand vous venez aupres du feu,
Sans les faire oster par les hostes
A Paris, Rouan, ou à Eu,
Il ne vous chault sans autre adueu,

Sinon vous chauffer à genoux:
Et ie vous dy, que tant soit peu,
N'en brulerez ia le deffouz.

*Pour guarir vne femme de
la pepie.*

Si vostre femme ha la pepie,
Et quel' ne sache plus parler:
Mouchez la, s'elle ha la roupie,
Et la luy faites aualler:
Soudain la verrez sangmeler,
Et decliquer à haulte voix,
Au diable puissez vous aller,
Ou ie vous donne vn cent de noir.

Pour faire taire vne femme.

Si vostre femme braie & crie
Quand vous venez à la maison,
Pour appaiser sa diablerie,
Sans prendre baston ny tison:
Enuoyez luy querir foison
De bon vin, quoy que couster doie:
Et ie vous dy, que, par raison,
Ne crira point tant qu'elle boie.

*Pour guarir vne femme de
la tropfile.*

Si vostre femme est espaulée,
Ou esbanchée par trop filer
D'une fusée qu'elle ha filée,
Tant quel' ne sache plus parler:
A fin de tost la consoler,

Prenez suin de jambes de grue,
Et l'en frottez sans flageoler,
Et tantost sera saine & drue.

Pour garder voz filles d'estre oisives.

Si voz filles mal aduerties,
N'ont aucune occupation,
Frottez leur fort le cul d'orties,
Et auront au cul passion.
Et croyez que sans fiction,
Temps passeront à le gratter,
Et trouueront l'inuention
De souuent leurs fesses frotter.

Pour guarir vne femme ialouse.

Si vostre femme est trop ialouse,
Et qu'elle crie incessamment:
Je vous conseille qu'on la touse,
S'elle ioue son enragement:
Puis luy frottez le fondement
D'orties griesches par temps chaud:
Et tout soudain l'entendement
Luy reuiendra au dit Michault.

Pour congnoistre vn preudhomme.

Si vous voyez souuent moucher
Du bout du coude vn homme à table,
Vous pouuez bien de luy toucher
Qu'il est preudhomme & fort notable.

S'il ne le fait, ce n'est pas fabler
 Car le cas est tout publié
 Par euident & vray notable,
 Que c'est vn ribault marié.

*Pour garder qu'un homme ne voise
 en garouage.*

Si vn homme s'esgare souuent,
 Dont sa femme soit mal contente,
 Plume luy le ventre deuant,
 Entre le nombril & la tente:
 Cela fait, quoy qu'il se tourmente,
 Il deuiendra plus froid qu'un iars:
 L'experience est euidente,
 Car ie l'ay veu faire aux canards.

*Pour guarir vn homme des
 haultes mulles.*

Si vn homme ha les haultes mulles,
 Et qu'il soit ialoux de sa femme,
 Pource qu'il ha meschantes bulles,
 Dont elle se plaint & le blasme:
 Prenez chopine de vray basme,
 Et luy en frottez les genoux
 Entre deux yeux: & sus mon ame
 Il ne sera iamais ialoux.

*Pour se preseruer de La grosse
 verole.*

Mais que ne tombez point aux pattes,
 Quelque chose qu'on en flaiole,
 Ie soustiens par euidens actes,

Que vous n'aurez point la verole:
Car les maistres de nostre escole
Demonstrent, comme vrays regens,
Quelle prend, quand par chaude colle
On se laisse choir sus les gens.

Pour guarir du chaud mal.

Pour guarir du chaud mal qui prend
Souz le nombril, au hault des lunes,
En sorte que le membre en tend
Souuent à aucuns ou aucunes;
Il fault qu'ilz n'vsent que de prunes
Verdes, durant vn six semaines:
Et ie vous donne tous mes ieufnes,
S'il leur tend rien entre deux haines.

*Pour sauoir si vne nourrice
est vierge.*

Pour sauoir si nourrice est vierge,
Ainsi comme on peult presumer,
Enuoyez querir vn grand cierge,
Et puis le faites allumer:
Et s'elle pisse sans fumer,
Ou mouiller les bords par dessus,
Vierge la pouuez estimer,
Au moins si vous n'estes deceuz.

*Pour faire venir le lait aux
nourrices.*

Si nourrices n'ont point de lait
Es mamelles, croyez d'vn cas
Qu'il leur fault quelque gros varlet,

Pour leur battre souuent le bas,
 Et je vous donne cent ducats,
 Si deuant la fin des dix moys,
 N'en voyez sortir les esclats:
 Je l'ay esprouué autresfois.

*Pour guarir cheual des
 auies.*

Ainsi que je trouue en mes liures,
 Et croy que cest chose approuuee,
 Que si cheual ha les auies,
 Et qu'il dorme la queue leuee:
 D'une nouuelle releuee,
 Prenez soudain le pucelage,
 Et luy versez à la volce
 En la gueule & vous verrez rage.

Pour cheual retif, ou pour mule.

Si vous voulez bien vous venger
 De cheual retif, ou de mule,
 Vers le lieu ou pensez loger,
 Tournez luy le cul s'il recule:
 Et ie vous dy, sans faulste nulle,
 Que si tant va à reculons
 Que autrement, mais que bien calcule,
 Vous serez tantost à Chalons.

*Pour garder vn chat de manger
 de moustarde.*

Pource qu'un chat est fort friand
 De moustarde communément,
 Et qu'il esgratigne en riant:

Les petits enfans lourdement:
Boutez luy dens le fondement
Vn fer tout chaud quand il se farde:
Et ie vous dy certainement,
Que iamais n'aymera moustarde.

Pour guarir vn chat de la toux.

Pour guarir vn chat de la toux:
Quand vous orrez qu'il esternue,
Dites luy tout hault devant tous,
Dieu vous sauue mitte pelue:
Pois luy mettez gresse menue
Toute bouillant dedens la gorge:
Et si soudain n'en perd la veüe,
Ie vous donne vn septier d'orge.

*Pour garder qu'un Prelat n'oublie
sa promesse.*

S'il y ha quelque gros Euesque,
Qui vous promette, & ne le tienne
Benefice, ou quelque Archeuesque
Qui sa promesse n'entretienne:
Quelque chose qu'il en aduienne,
Pendez luy, sans bourde ou sornette,
(A fin que de vous luy souuienne)
Aux oreilles vne sonnette.

Pour gaigner la grosse verole.

Pour auoir la grosse verole,
Il n'y ha rien, comme i'entens,
Qui soit meilleur, qu'en chaude colle
Cheoir aux pates dessus les gens.

Le chancre en vient, le mal des dens,
 La goutte aux piedz, & aux genoux.
 Et pour en parler en bon sens,
 Le danger est, loger aux trous.

Pour guarir des mulles.

Pour guarir sans pardons ny bulles,
 Morfondus & telle merdaille,
 Des talons esquelz sont les mulles,
 Doivent hurter à la muraille
 Pres l'huis d'un sourd, de telle taille
 Qu'il les oye en disant hola:
 Et puis iusques à tant qu'il faille,
 Il faut qu'il hurte tousiours là.

Pour guarir de la quoqueluche.

Si vous auez la quoqueluche,
 Faites en faire vn chaperon:
 Ou vous affulez d'une aumusse,
 Ou d'un vieil sac à coquillon:
 Et puis sachez d'un biberon
 Qui porte vn gros nez à pompettes,
 S'il est extrait d'un vigneron,
 Ou d'un vray souffleur de trompettes.

Pour auoir des poussins happez.

Quand vous mettez couuer les œufz:
 Mettez vn sac à coquillon
 Sus vostre teste, comme ceux,
 Qui vont au marché à Villon:
 S'il n'est vray, ie veux qu'un couillon,
 Ou tous les deux vous soient coupezz:

Et ie deuienne papillon,
Si n'auex tost poussins huppez.

Pour sauoir si vous mangerez du rost.

Si vn homme pont en se leuant,
Ou vn petit apres bien tost,
S'il se leue le cul deuant,
Il mangera au iour du rost.
Soit chez Baillif, Iuge, ou preuost,
Si la cuisine n'est meschante,
Du rost aura sans nul depost,
Veu qu'au matin le cul luy chante.

*Pour garder que les taulpes ne gastent
voz prez, ou iardins.*

Si vous auez peur que les taulpes,
Ne gastent voz prez ou iardins:
Par le conseil de vieilles gaulpes,
Vendez les tous à voz voisins:
Lors ne craignez que les lutins,
Ny les taulpes, soit loing ou pres,
Fouissent ny soirs ny matins,
En voz iardins, ny en voz prez.

*Pour garder que les mouches ou guespes ne
mengeussent les raisins aux vignes.*

Pour bien preseruer que les mouches
Ne vous gastent raisin ou grappe,
Mettez leur soudain en leurs bouches,
A chacune vne chausse trappe:
De peur que ne leur eschappe,
Bridez les par sus les oreilles:

Et pour aussi vray que suis Pape,
Ne gasteront vignes ne treilles.

*Pour garder qu'un chat ne vous
morde ou esgratigne.*

Si vous vous deffiez, qu'un chat
Ne vous morde ou vous esgratigne,
Faites luy chauffer tout à plat
A chacun pied vne botine:
Et puis l'emplissez de poix raisine,
Toute chaude, quoy qu'il s'en deule:
Après mettez luy, s'il se obstine,
Un lopin de liege en la gueule.

Pour garder les Cerfs de vous hurter.

Pour garder de hurter les Cerfs,
Ce pendant qu'allez à la chasse
Par les bois, ou par les forestz,
Guettez au trou par ou il passe:
Puis le prenez, s'avez espasse
Par la queue, soit mont, soit val,
Et le tenez tant qu'il trespasse,
Et ja des cornes n'aurez mal.

FIN DES VERS DE MAI-
STRE GRIMACHE.



Receptes Gentiles.

*Pour prendre les Canes
sauuages.*

Nyuer, durât qu'il fait grād froid, prenez vne vessie de pourceau pleine de pois & de febues, & l'attachez dedens la riuere, ou en vn estang avec vne corde, à vn pieu, en sorte q'le noue dessus l'eaue, sans qu'on voye le pieu, là ou les Canes ou Canards sauuages repairent, & la laissez là : & lors qu'ils viendront, & la verrôt pleine de pois, & de febues, ils la becqueront pour les auoir. Mais pource que ils ont le bec rond, ils ne la sauront entamer : & aussi quelle fouyra d'un costé & d'autre, en apres quand vous verrez qu'ils seront bien affriandez apres ladite vessie, faites vous raire la teste de bien pres, & puis prenez vn grand sac d'un septier ou deux, & vous despouillez tout nud, par vn beau matin deuant le iour, de peur qu'ils ne vous voyent, & allez la ou est

ladite vessie attachee, & la destachez, & vous mettez en leau iusques au menton, en sorte que vous n'ayez que la teste dehors : & lors, quand lesdites canes, ou canards sauuages viendront, ils penseront que ce soit encor la vessie, de vostre teste : & alors des incontinent qu'ils approcheront de vostre teste pour la becquer, prenez les avec les dets, par les pieds, & mettez dedés vostre sac tout soudain ; de peur qu'ils ne vous becquent, & cõtinuez cela, iusques à ce que vostre sac soit plein, & si vous les enfermez biẽ la dedens, iamaïs ne debatront dehors, & n'oubliez pas de ratacher la vessie pour en attirer d'autres, pour vne autresfois, quand vous aurez menagé toutes celles que aurez prises.

Pour prendre les Grues.

Faites des bons cornets de papier gris, & les engluez par les bords de hault ; & mettez des febues au fons : puis faites des trous en terre de la longueur de voz cornets emmy les champs, la ou les Grues repairent, & adonq qu'elles penserõt prendre les febues au fons du cornet, elles s'engliseront la teste, & les yeux, tellement qu'elles ne verront goutte, & adonq vous les prendrez par le col, & le leur tordrez, en sorte, que si elles en meurent, iamaïs

n'en reschapperont, & ne vous becquerôt plus, approuué est.

Pour prendre les Hairons.

Pource que Hairons sont oiseaux qui volent fort hault, quand ils sont batus des sacres & autres oiseaux, & qu'ils ont le col & le bec long, vous prendrez lesdits Hairons, & leur ferez passer le bec & le col par dedès le moyau de la roue d'une charrette, puis leur mettez vne longue de bois à trauers du col qu'ils ne le puissent retirer, & jamais ne voleront si hault qu'ils ont accoustumé, par ce moyen il ne vous faudra ny chiens ny oiseaux pour les prendre: car pourueu que vous courrez plus fort que eux vous les rattraindrez bien à la course.

Pour prendre les Ramiers

ou Bisets.

Prenez vne longue perche de bois verd, & la fendez par le milieu, en sorte que les deux bouts ne soient point fendus, & mettez vn coing de bois au milieu pour garder quelle ne se referme & reioigne ensemble, & attachez au bout de vostre coing par dessous la perche vne longue corde bien menue, & fichez ladite perche de trauers en vn trou de tariere que vous ferez en l'arbre là ou les ramiers
ou Bis-

ou Bisets iuchent , ou repairent . Et lors que vous verrez qu'ils seront tous arrengez dessus vostre perche, retirez le coing avec vostre corde tout soudain, & ils demourront tous prins par les ongles, ils ne reschappent: mais avant que partir de la maison n'oubliez pas à faire chauffer de l'eau pour plumer ceux que vous prendrez en ceste sorte, car ils seront forts à plumer sans eau chaude.

Pour prendre les lieures sans chiens ou fillez.

Prenez environ vne pinte gros pois & les rotissez ou fricassez sans aucune liqueur cōme les chastaignes en vne poêle sus le feu iusques à ce qu'ils soyent fort durs, & les semez du long des chemins par ou les lieures passent, & quand ils les trouueront ainsi durs, ils ne les pourront casser avec les dents sans cligner les yeux, & alors qu'ils auront les yeux fermez, vous viendrez avec vne massue leur bailer vn grand coup sus la teste entre deux yeux, & sans point de faulte si vous les tuez ils mourront & n'en reschapperont iamais.

Pour prendre les Renards.

Prenez vn auge de bois bien droite si longue que voudrez, & l'éplissez de cail-

lebottes ou frommages molz, & la mettez en vn bois, la ou il y ha grand nombre de Renards en sorte quelle ayt vn bout contre vn gros arbre, & vous cachez à l'endroit dudit auge à l'autre bout, avec vne bonne arbaleste de passe, & vn bon garrot, ou grosse vire attachee au bout d'une corde, tenât de l'autre bout à vostre ceinture, & quand vous verrez que lesdits renards seront bien arrengez pour manger lesdites caillebottes, & frommages molz, vous deslancherez vostre garrot tout à travers de leurs oreilles, lesquelles sôt tousiours droites, par ainsi vostre garrot ou vire demourra fiché au pied de l'arbre estant du bout de l'auge, adonques lesdits Renards demourront tout prins par les oreilles, avec la corde tenant au garrot, & à vostre ceinture, & ne se oseront remouuoir de peur de soy desirer & gaster les oreilles, cela fait vous attacherez le bout de vostre corde à vn pieu & irez querir voz coqs & voz poules, pour combattre lesdits Renards, & soy véger d'eux: & croyez pour certain que s'ils leur creuent les yeux tout net, qu'ils ne verront goutte, apres que ie l'ay autresfois esprouué, & n'en vy iamais venir faulte.

Pour prendre les Loups.

En la saison que les Loups sont en amour, & que les Louues sont chaudes, prenez vne corde de trente ou quarante toises de long qui soit forte, & de bon chanure, & l'attachez par vn bout à vn arbre, au trauers du chemin, par ou les Loups passent, puis attachez à l'autre bout vn lopin de lard gras, aussi gros qu'vn gros esteuf, & incôtinent que la Louue, laquelle va tousiours la premiere, quand elle va deuant, trouuera ledit lard, elle lauallera sans mascher : & à cause quelle n'ha q vn boyau, elle le rédra par le cul incôtinent, & adonq l'autre Loup qu'il la suiura lauallera tout soudain, & le rendra pareillement, & ainsi en feront tous les autres : & lors que vous verrez que le dernier l'aura rendu, prenez ledit bout de la corde, ou ledit lard est attaché, & la liez bien roide à vn arbre, ou avec vn gros pieu, par ainsi tous voz Loups demourront les vns, le nez au cul, les autres enfilez du long de vostre corde, ne plus ny moins que patenostres : à ceste heure la vous viédrez à celuy de derriere, avecques vn bon couteau de boucher, & l'escorcherez par la queue, en sorte, que vous luy renuersez la peau sus les yeux, & sus le museau, par ainsi il ne vous saura mordre, & en ce

point ferez de tous les autres, puis coupez le bout de devant de vostre corde, & les laissez fuir, & iamaïs ne se r'assembleront: car ils se descongnoistrôt l'un l'autre, & n'attendrôt iamaïs chien, pourueu qu'il ayt bonnes dents, ny ne se frotterôt aux chardôs, ny aux ronces, s'ils n'en approchent bien pres, & ne plaignez point vostre peine à ce faire: car vous gagnerez bien vostre iournee, à cause que les peaux en sont bônes pour faire des mouffles, & des cache nez, pour ces damoiselles, qui ont tant de peur du froid, & du halle.

Pour prēdre les poissōs sans filé, & sans rebus.

Pource qu'il n'est pas tousiours saison de brebis tondre, & qu'on ne mange pas chair en tous temps, & que lon n'est pas leué: quand vous serez leué au matin, prenez vn escu en vostre bourse (s'il est autrement, vous vous abuseriez) & le baillez à vostre maistre d'hostel, cuisinier, ou chāberiere, & qu'ils en achetēt du poisson tel qu'ils trouueront, puis le facent rostir, bouillir, fricasser, ou mettre en paste, & le mettent en vn plat deuant vous à table bié accoustré: & si vous auez bōs ongles, vous le pourrez prendre par tel endroit, que vous voudrez: & si vous le tenez bien, il ne vous eschappera point. Approuué est.

Fin de la medecine Maître Grimache



AVCVNES

Receptes de nou-
veau adioustees.

*Contre d'artres venans
d'aventure.*



PRENEZ eaue de morelle, eaue de plantain, eaue rose, de chacune deux onces, de sublimé, de sel armoniac, de chacune vne dragme, de sel commun demi once, tout cela mettras en vne fiole, & la feras bouillir iusques à la tierce partie, puis en frotteras les dartres deux, ou trois fois le iour: & continue iusques que tu sois guarí.

Contre cassure.

Prenez de fort, selon la cassure, & suis

de bouc, puis prenezvne tuile sortant du feu toute rouge, laquelle vous aurez mis au feu en cueillant vostre herbe, & mettez tout cela dessus ladite tuile en virant tousiours : & quand vous verrez que seront cuites cōme espinoches, mettez dessus tout chaud, & le bendez, puis le lendemain en referez autant. Aussi est bon vn emplastre de benioin tout chaud, aussi de poix noire, & ne point bouger les emplastres, iusques à ce que soyez guari.

Contre brulures.

Tout incōtinent que serez brulé trempez la brulure en fort vinaigre tousiours iusques à ce. que cest ongnemēt soit fait: Prenez demi liure d'huile de noix en vne escuelle, & la mettez dessus de cendre chaude, puis prenez le grōs d'vne petite noix de cyre neuue, & la hacherez menu dedēs vostre huile, en le mouuant tousiours dedēs l'huile; iusques à ce que la cyre soit fondue, puis l'ostez de dessus le feu, & la mouuez tousiours, tant que tout sera prins, & tout froid à tout vn petit baston, puis en oingnez la brulure à tout vne plume: & prenez du papier gris de Flandres, que mettrez dessus: puis au

bout de deux heures prenez vn peu de vin blanc, & le tiers d'eau, duquel vous lauerez la playe à tout vn linge net en sorte que la playe soit bien nette, puis l'esuyerez, & l'oingnez cōme dessus est dit: & y ferez cecy trois fois le iour, & vne fois la nuit, en maintenant vostre papier dessus, puis quand vous verrez que vostre playe se portera bien refaites d'autre oingnement, qui soit plus clair, que vous n'y mettez pas tant de cyre, & continuerez de ainsi faire iusques que soyez gueri, en faisant comme dessus est dit: & quand vostre playe nettoyez à tout vin blanc, nettoyez la si bien, & en sorte, comme si elle vouloit seigner: & quand vous verrez que la playe commencera fort à guairir, refaites encores d'autre onguement plus clair en mettant moins de cyre, puis non plus: & si ainsi le faites, comme il est escrit, iamaiz playe ny brulure ny paroistra.

Contre feu vologe.

Prenez terebentine lauee en eau rose demi once, & autant de beurre frais, & moyeux d'œufs, & le jus d'une orange: & tout bien incorporé ensemble, puis oindrez la maladie à tout vne plume deux fois le iour.

Pour enflures de visage.

Prenez eau de pluie, & de alun crud & cuisez ensemble, puis y trempez vn drapeau, & l'appliquez dessus le visage.

Pour enflure de genoux.

Prenez fiente de vache, & son de froment, & de vinaigre, & faites tout cuire ensemble, puis le mettez tout chaud dessus le mal.

Pour douleur des genoux.

Prenez de sauge, & fleurs de camomille, & de fort, & de lauende, & de mie de pain brun: & tout faites cuire ensemble à tout de vin blanc, puis en mettez dessus le mal tout chaud.

Contre la gravelle.

Prenez la racine de persil, & de fenail, avec vne poignée de chiche, & les mettez cuire ensemble en vn pot en eau claire, vne bonne ondee, & beuvez au matin & au soir vn verre de ladite eau, tant que vne pinte durera: & si le cas aduiét, qu'il soit enflé à cause de ladite gravelle, ou que sentez trop grand douleur au petit ventre en la vessie, prenez vne poignée de camomille, & vne poignée de pempchoisie, avec la cranche de farine de froment, & les mettez dedens vn petit sac tout ensemble, & puis les faites bouillir en eau

pour faire vn baing pour vous baigner, & puis mettez ledit sac, vous estant au baing enuiron vostre petit ventre, & améderez.

Item pour vous preseruer, gardez vous de menger chair salee, de fromage spécialement salé, ou vieux: & ne vueillez point trop tenir vostre vrine à heure que ce soit.

Pour le mesme.

Prenez du *miliun Solis*, des gremeaux de cerises, & d'une herbe appelée *philipandula*, la racine ou la fueille, ou tous deux ensemble, & la racine du persil, & les broyez ensemble en vn mortier en vin blanc, & puis beuez dudit bruuage deux ou trois fois, & vous guarirez.

Pour desfenster vn membre.

Prenez vn petit de fleur de camomille, & autant de fleur de mellilot, & vn petit de bon fort vinaigre, & faites tout bouillir en deux pots d'eauë tout ensemble trois onces, & le baignez trois fois le iour: & mettez emplastre de populeon dessus, & guarira.

Contre flux des menstres.

Prenez ruthe, & en frötez les iointures des mains trois ou quatre fois le iour, puis prenez vin rouge, & le faites bouillir, puis prenez trois dragmes de cinamo-

me blanc, & le faites boire tout chaud.

Pour pacifier grand douleur de costé.

Prenez graine de geneure, & en faites poudre, & mellez avec eue froide, & puis prenez vn drapeau, & le mouillez dedés, & le mettez vn petit au feu pour oster la froideur, & puis le mettez sus le mal, & vous passera.

Pour celuy qui ne peut piffer.

Cuisez la sauge, & la mettez en vin iusques elle soit bouillie au tiers, & luy donnez à boire.

Prenez apres disner, ou apres soupper les gremaux des pesches desquelles que vous voudrez, & les mengiez, & ne beuez de trois heures apres.

Pour faire piffer.

Prenez des mauues, avec de bon vinaigre, & faites bouillir iusques à la tierce partie.

Autrement.

Prenez orties avec huile d'oliue bien bouilli, & puis prenez de cest huile, & mettez dessus le penchenul, & dessus le ventre, & suera tantost, & piffera.

Autrement.

Prenez fimes viues, & les mettez de-

dens le membre, & enuëlopez d'un drap,
& tantost pisserez.

Contre les morruës.

Prenez pentaphilon avec sain de porc,
& le cuisez en la poïlle, & mettez dessus
tout chaud, & guarira.

Pour mal de reins.

Prenez la racine de esglantine, & de-
strempez en vin blanc, & le boire le soir
chaud, & le matin froid.

Pour faire choir verrues.

Quand on tuera vn porc, il fault que
celuy qui a des verrues reçoïue le sang
tout chaud dessus le membre ou sont les-
dites verrues, & incontinct qu'il sera sec,
qu'il le lue. Et si cest une femme qui aye
lesdites verrues, il fault remedier à cela
avec le sang d'une truë, & incontinct
gueriront.

*Contre les dartres, & enflures
des piedz, ou des ois.*

Prenez de la mie de pain & la pestri-
sez avec de gros vin, & puis le mettez sus
le mal, & ce le guerira.

Contre durté des artoilz.

Prenez de la grimoine, broyez la, & la
mellez avec oint, & en mettez sus la duren-
té des artoilz, & ce les guerira.

*Pour guerir les veines enflées
aux iambes.*

Quand la Lune est au signe d'Aquarius couillez vne racine de lierre, & d'icelle enuironnez lefdites veines, & ellé se perdront.

Autrement.

Prenez trois grains de l'yerre qui croist sus les murs, & les attachez au pied ou sont les veines enflées, & elles desenfle-
ront.

*Remede souverain contre les vertues
& cloux venans aux piedz.*

Prenez de la seméce de naueaux ronds tant que vous en pourrez empoingner avec trois doigts, broyez la & y mettez du benioin avec, puis l'appliquez sus le mal, & le liez, cela dechasse les cloux & ver-
rues, & les guerit.

*Pour ôster les cloux & furoncles,
où duretez des piedz.*

Prenez vne feue, mettez la tremper en vinaigre avec du benioin, & quand elle sera bien enflée, liez la dessus le clou, & elle le guerira.

Autrement.

Prenez des vers de terre, pilez les, & avec de l'huile appliquez les sus les cloux, & ilz les arracheront totalement.

Autrement.

Prenez du sang de lezard verd, & le mettez avec vn peu de laine sus les cloux, & ilz tomberont.


*Pour soulder & fortifier
les nerfs.*

Prenez des trous de choux avec les racines, & les brulez: & arrosez celle cendre avec vinaigre: puis adioustez y de vieil oing ou graisse, & pestri-
sez tout ensemble, & ce fait
mettez le sus les nerfs,
& ilz les forti-
fiera.

*

F I N.





Ce t^{re} t^{re} a partieent
a Jehan le nameroit
denoiant a Valenchien
a sonet excoletat de l'ant
noire dame de la carchi
Pence vous aïree
Le bre



Amers de L. S.